

欽定宋史

卷二十六之三十一

卷一

卷二

卷三

卷四

卷五

Blank rectangular area

宋史卷二十六

元 中 書 右 丞 相 總 裁 脫 屣 等 修

本紀第二十六

高宗三

四年春正月甲辰朔御舟碇海中乙巳金人犯明州張俊及守臣劉洪道擊却之丙午帝次台州章安鎮己酉遣小校自海道如處州問安太后庚戌金人再犯明州張俊引兵去浙東副總管張思政及劉洪道繼遁癸丑貶郭仲荀汝州團練副使廣州安置丙辰詔原兩浙州郡降金官吏丁巳婁宿陷陝州守臣李彥仙死之己未金人陷明州夜大雨震電乘勝破定海以舟師來襲御舟張公裕以大舶擊退之辛酉發章安鎮壬戌雷雨又作甲子泊温州港口乙丑以中書舍人李正民爲兩浙湖南江西撫諭使詣太后問安丁卯台州守臣晁公爲棄城遁處州衛兵及鄉兵相殺縱火肆掠三日劉可轉寇京西屢爲桑仲所敗至是爲其黨所殺復推劉超據荆門軍戊辰滕康劉珏仍奪職己巳換給僧道度牒人輸錢十千辛未命臣僚條具兵退之後措置之策駐蹕之所是月金人攻楚州守臣趙立拒之金人犯邠州曲端遣涇原路副總管吳玠拒戰敗之于彭原又陷同州張淡遣謝亮使夏國至則其主乾順已稱制遂還二月甲戌

朔鄜環率衆降于劉光世叛將傅選詣處州乞降乙亥奉安祖宗神御于福州詔復以盧益爲資政殿學士李回端明殿學士並權知三省樞密院事金人陷潭州將吏王暎劉价趙聿之戰死向子誣率兵奪門亡去金兵大掠屠其城丙子金人自明州引兵還臨安癸未虔州鄉兵首領陳新率衆數萬圍城叛將胡友亦犯虔州與新戰破之新乃去甲申禁逃卒投刺別軍丙戌金人自臨安退兵命劉光世率兵追之丁亥金人陷汴京權留守上官悟出奔爲盜所殺庚寅帝次温州浙東防遏使傅崧卿入越州辛卯金人陷秀州甲午知蔡州程昌寓棄城南歸鼎州民鍾相作亂自稱楚王乙未杜充罷丙申以金兵退肆赦張浚承制以陝西制置使王似知成都府罷諸路武臣提點刑獄李成入舒州金游騎至平江周望奔太湖守臣湯東野亦遁茶陵縣軍賊二千餘人犯郴州永興縣戊戌金人入平江縱兵焚掠辛丑白虹貫日鍾相陷澧州殺守臣黃宗權湖北制置使傅雱招諭孔彥舟彥舟聽命因爲湖南北捉殺使荆南守臣唐懋棄城去金人陷醴州守臣王淑棄城去是月張浚自秦州引兵入援三月癸卯朔孔彥舟入鼎州金人去平江統制陳思恭以舟師邀敗其後軍于太湖呂頤浩請幸浙西丙午趙鼎言金兵去未遠遂緩其行丁未命發運司說諭兩浙富民助米以備巡幸辛亥遣兵部員外郎馮康國等撫諭荆湖南北廣南諸路壬子金人入常州守臣周杞棄城去甲寅遣盧益及御營都統制辛企宗奉迎太后東還丙辰金人犯終南

縣經略使鄭恩戰敗死之丁巳金人至鎮江府韓世忠屯焦山寺邀擊之詔侍從官各舉可充監司者一
二人辛酉御舟發温州宣撫司節制軍馬李允文部兵至鄂州御營前軍將楊勅叛甲子張浚請便宜辟
官不許動改戊辰孔彥舟擊敗鍾相擒相及其子子昂檻送行在己巳戚方陷廣德軍殺權通判王儋夏
四月癸酉蠲江西州縣兵盜殘破民家夏稅戊寅吳玠及金人戰于邠州彭原店敗績部將楊晟死之己
卯以觀文殿學士朱勝非爲江西湖南北宣撫使是日張浚引兵至房州知金兵退乃還癸未帝駐越州
甲申下詔親征巡幸浙西韓世忠駐軍楊子江要金人歸路屢敗之兀朮引軍走建康乙酉以御史中丞
趙鼎爲翰林學士鼎固辭不拜戚方圍宣州劉光世遣統制王德誘誅劉文舜于饒州丙申用趙鼎劾奏
呂頤浩罷爲鎮南軍節度使醴泉觀使命三省樞密院同班奏事韓世忠及兀朮再戰江中金人乘風縱
火世忠敗績兀朮渡江屯六合縣丁酉復以趙鼎爲御史中丞戊戌振明州被兵民家己亥以張浚爲浙
西江東制置使辛丑王德破妖賊王宗石于信州貴溪縣執其渠帥諸縣悉平是月金人犯江西者自荆
門軍北歸留守司同統制牛皐潛軍寶豐擊敗之五月甲辰以范宗尹爲尙書右僕射兼御營使辛亥統
領赤心隊軍馬劉晏及戚方戰于宣州敗死壬子金人焚建康府執李稅陳邦光而去淮南宣撫司統制
岳飛邀擊于靜安鎮敗之是月紫微垣內有赤雲亘天白氣貫其中癸丑詔臺諫等官各舉所知二人以

張守參知政事趙鼎簽書樞密院事以白金三萬兩賜韓世忠軍贈戰歿將孫世訥嚴永吉張淵等官甲寅金人陷定遠縣執閭勅去勅不屈死之巨師古擊戚方于宣州數敗之方引去乙卯王綯罷丁巳命劉光世移軍捕戚方楊勅犯婺州戊午復置權尙書六部侍郎癸亥詔中原淮南流寓士人聽所在州郡附試甲子周望罷尋分司衡州居住置京畿淮南湖北京東西路鎮撫使乙丑升高郵軍爲承州以翟興孟汝趙立劉位趙霖李成吳翊李彥先薛慶並爲鎮撫使興河南府汝唐州立楚泗州濼水軍位滁濠州霖和州無爲軍成舒蘄翊光黃州彥先海州淮陽軍慶承州天長軍丁卯慶及金人戰于承州城下累敗之戊辰命江浙州縣祭戰死兵民分江東西爲鄂州江州池州三路置安撫使罷諸路帥臣兼制置使諸州守臣兼管內安撫使是月劉超據荆南分兵犯峽州又合叛將彭筠犯復州淮西敗將崔增陷焦湖水砦河東北經制使王俊舉兵及金人戰于襄城縣敗之復潁昌府張浚承制以金房州隸利路六月辛未朔緬紹興府三縣湖田米詔侍從臺諫諸將集議駐蹕事宜楊勅犯處州癸酉遣統制陳思恭討勅合江南兩路轉運爲都轉運使再貶周望昭化軍節度副使連州安置甲戌罷御營司以范宗尹兼知樞密院事乙亥王瓌遣統領林閏等追襲楊勅于東陽縣軍敗裨將李在死之丁丑以劉光世部兵爲御前巡衛軍光世爲都統制楊勅等焚建州戚方犯湖州安吉縣詔張俊捕之戊寅更御前五軍爲神武軍御營五軍

爲神武副軍以知建康府權邦彥爲淮南等路制置發運使滁濠鎮撫使劉位爲賊張文孝所殺命其子綱襲職庚辰置鎮撫使六人陳規德安府復州漢陽軍解濟荆南府歸陝州荆門公安軍程昌寓鼎澧州陳求道襄陽府鄧隨郢州范之才金筠房州馮長寧淮寧順昌府蔡州辛巳慮囚申命有司討論釐正崇寧以來濫賞罷諸州添差通判職官癸未詔劉光世赴行在甲申岳飛破戚方于廣德軍乙酉鍾相僞將胡源引兵入慈利縣執其黨陳誠來降丙戌以呂頤浩爲建康路安撫大使劉光世爲兩浙路安撫大使朱勝非爲江州路安撫大使郭仲威爲真揚州鎮撫使戚方詣張俊降庚寅召韓世忠率兵赴行在辛卯妖賊王宗石等伏誅壬辰權密州都巡檢徐文率部兵泛海來歸甲午置樞密院幹辦官四員乙未郭仲威犯鎮江府遣岳飛擊之是月兀朮聞張浚在秦州將舉兵北伐自六合引兵趨陝西秋七月癸卯劉光世援宣撫使例乞便宜行事不許詔軍興以來諸州得便宜指揮者並罷乙巳馮長寧復順昌府張浚罷曲端都統制丁未以劉光世爲集慶軍節度使開府儀同三司戊申以孔彥舟爲辰沅靖州鎮撫使張浚獻黃金萬兩助軍用宣撫司遣統制官呂世存王俊復鄆州其餘州縣多迎降後軍將王闢叛陷歸州鈐轄田祐恭擊敗之己酉王闢犯房州守臣韋知幾棄城走庚戌楊勅受劉光世招安尋復叛去迫泉州癸丑崔增犯太平州守臣郭倬拒却之乙卯金人徙二帝自韓州之五國城劉光世乞移司平江不許丙辰

張俊合諸將戚方等兵萬餘赴行在丁巳申命元祐黨人子孫于州郡自陳盡還當得恩數韓世忠張俊並罷己未禁閩廣淮浙海舶商販山東慮爲金人鄉導詔江浙福建州縣諭豪右募民兵據險立柵防遏外寇庚申以岳飛爲通泰州鎮撫使辛酉建州民范汝爲作亂命統制李捧捕之乙酉復李邦彥以下十九人官職聽自便復李綱銀青光祿大夫許翰顏岐端明殿學士張浚貶曲端階州居住丁卯金人立劉豫爲帝國號齊戊辰罷提領措置茶鹽司己巳詔王瓌部兵屯信州程昌寓遣將杜湛禽李合戎于松滋縣是月張用據漢陽軍沿江措置副使李允文招降之以便宜徙鄂州路副總管以右軍統制馬友知漢陽軍八月辛未朔以禮部尙書謝克家參知政事壬申李成請降于江州詔撫納之張浚停程千秋官文州編管癸酉選神武中軍親兵六百人番直禁中甲戌詔侍從官日一員輪直進故事關治體者丁丑以韓世忠爲檢校少師武成感德軍節度使張俊檢校少保靈武昭慶軍節度使贈監察御史常安民爲左司諫江公望左諫議大夫錄其後二人庚辰太后至自虔州薛慶及金人戰于揚州城下死之郭仲威奔興化縣辛巳侍御史沈與求戶部侍郎李陵以論宰相范宗尹皆黜宗尹復視事癸未盧益罷張浚復承興軍再貶曲端海州團練使萬州安置甲申陳萬信餘黨雷進作亂乙酉焚慈利石門二縣以御營司叅議官王擇仁權河東制置使山砦首領章忠侓爲都統制宋用臣馮賽同都統制丙戌命李成吳玠捍禦

上流翊棄城去以成爲四州鎮撫使命李捧便道過信州招捕靳賽戊子以饒信妖賊平赦二州徒以下
囚蠲民今年役錢貶勝康永州劉珏衡州並居住己丑詔岳飛救楚州仍命劉光世遣兵往援辛卯杜湛
渡江討羣賊復石首等五縣壬辰盜入梅州殺守臣沈同之大掠而去癸巳命福建安撫使程邁會兵討
范汝爲甲午知號州邵興遣統制閻興及金人戰于解州東屢破之金人陷承州命陳思恭屯兵明州以
防海道劉光世遣王德鄺瓊以輕兵渡江乙未遇金游騎于召伯埭敗之戊戌以桑仲爲襄陽鄧隨郢州
鎮撫使是月罷提舉廣西峒丁孔彥舟入潭州宣撫司參議官王以寧率兵拒之以寧敗遁去宣撫司主
管機宜文字傅雱在彥舟軍中承制以彥舟權湖南副總管劉綱以乏食率兵奔溧陽九月辛丑呂頤浩
入見請益兵命王夔巨師古顏孝恭兵隸之分屯境內壬寅詔諸路決囚甲辰徽宗皇后鄭氏崩于五國
城戊申命秦鳳將關師古領兵赴行在劉豫僭位于北京庚戌禁宣撫司僚屬便宜行事及京西湖南北
路勿隸川陝宣撫司節制癸丑涇原同統制李彥琦及金人戰于洛河車渡敗之乙卯罷中書門下省檢
正官桑仲陷均房州進犯白土關丙辰復增左右司郎官爲四員金人攻楚州趙立死之丁巳趙霖復和
州李成遣馬進犯興國軍戊午荆襄賊趙延壽犯德安府陳規拒却之己未金均房安撫使王彥及桑仲
戰于平麗縣敗之王闢詣彥降辛酉李捧擊范汝爲于建州官軍皆潰捧遁去金人犯揚州統制靳賽逆

戰于港河敗之金人陷延安府執呂世存又陷保安軍癸亥張浚遣都統制劉錫統五路兵及金將婁宿戰于富平縣浚駐邠州督戰官軍敗績丙寅給劉光世犒軍銀二萬兩絹二萬匹戊辰趙延壽焚郢州金人陷楚州鎮撫使李彥先求救兵敗死之冬十月庚午朔張浚斬環慶經略使趙哲于邠州貶劉錫合州安置命諸將各領兵歸本路浚退保秦州陝西大震辛未秦檜自楚州金將撻懶軍中歸于漣水軍丁禩水砦壬申命楊惟忠王瓊討李成丙子以孔彥舟爲鼎澧辰沅靖州鎮撫使戊寅鍾相餘黨楊華舉兵圍桃源縣己卯馬進犯江州癸未程昌寓入鼎州擊楊華破之甲申趣劉光世救楚州丁亥以李回同知樞密院事庚寅遣前御史臺檢法官謝嚮招范汝爲召張浚以兵入援追復李邦彥觀文殿大學士辛卯虜州賊李敦仁及弟世雄舉兵破虜州石城縣甲午命楊惟忠率兵屯江州乙未岳飛破金人于承州丙申詔劉光世節制諸鎮守禦通秦州伺便襲金人過淮是月馮長寧棄城去尋以淮寧附劉豫江東賊張琪犯建康府劉洪道招降之環慶路統制慕容洵叛附于夏國涇原統制張中彥經略司幹辦趙彬叛降金人劉忠據岳州平江縣白面山王善餘黨祝友擁衆爲亂屯滁州龔家城十一月癸卯慕容洵遂引金人圍環州呂頤浩復南康軍甲辰趙鼎罷乙巳秦檜入見丙午岳飛棄秦州渡江丁未金人犯秦州飛退保江陰軍沙上以御史中丞富直柔簽書樞密院事秦檜爲禮部尙書李允文殺岳州守臣袁植呂頤浩會楊惟

忠與馬進戰南康軍不利戊申頤浩遣巨師古救江州爲進所敗師古奔洪州金人陷涇原經略使劉錡退屯瓦亭己酉以孔彥舟爲湖南副總管部兵屯潭州庚戌命神武副軍都統制辛企宗討范汝爲壬子日南至率百官遙拜二帝乙卯改樞密院幹辦官爲計議官丙辰金人陷泰州丁巳通州守臣呂伸棄城去王彥攻桑仲于黃水破之房州平張浚以彥爲金均房州鎮撫使崔增犯池州劉洪道遣統制李貴擊走之增以兵萬餘詣呂頤浩降甲子詔諸路守臣節制管內軍馬丙寅金房州賊郭希犯歸州田祐恭擊郤之命王瓌部兵萬人速援呂頤浩祝友渡江大掠是月張浚退軍興州秦鳳副總管吳玠收餘兵保大散關東和尙原詔諸路轉運司括借寺觀田租蘆場三年十二月庚午安南請入貢郤之辛未遣度支員外郎韓球括饒信諸州錢糧凡江湖川廣上供皆拘之壬申命孔彥舟援江州丙子禁節制軍馬守臣便宜行事丁丑馬進分兵犯洪州乙丑李敦仁犯撫州崇仁縣命李山張中彥討之壬辰金人犯熙州總管劉惟輔戰敗之殺五千餘人甲午再犯熙州惟輔軍潰被執死之乙未以張俊爲江南招討使討李成丁酉范汝爲降詔補民兵統領是月張俊承制復海州團練副使曲端左武大夫興州居住是歲宣撫處置司始令四川民歲輸激賞絹三十三萬匹有奇

紹興元年春正月己亥朔帝在越州帥百官遙拜二帝不受朝賀下詔改元釋流以下囚復賢良方正直

言極諫科蠲兩浙夏稅和買紬絹絲綿減閩中上供銀三分之一戊申改命張俊爲江淮路招討使復江池路爲江東西路分荆湖江南諸州爲荆湖東西路置安撫司治池江鄂鼎州江南東西路各置轉運司荆湖東西路轉運司通掌兩路財賦以呂頤浩爲江東路安撫大使朱勝非江西路安撫大使馬進陷江州守臣姚舜明棄城走端明殿學士王易簡等二百人皆遇害己酉岳飛引兵之洪州金人犯揚州謝鸞率范汝爲討平建陽賊劉時舉金人犯秦州吳玠擊敗之庚戌又犯西寧州守臣俱重迎降辛亥謝克家罷壬子詔京官知縣並堂除內外侍從各舉可任縣令者二人犯賊連坐自今不歷縣令者勿除監司郎官不歷外任者勿除侍從著爲令張中孚以原州叛降于金癸丑李敦仁圍建昌軍蔡延世率鄉兵擊退之賊曹成入漢陽軍李允文招之成入鄂州復趨江西丁巳呂頤浩遣王瓌崔增擊賊于湖口大敗之頤浩及楊惟忠引兵趨江州辛酉詔太祖創業垂統德被萬世神宗詔封子孫一人爲安定郡王世世勿絕自宣和末至今未舉有司其上應襲封人名依故事舉行金人再圍環州是月張浚復曲端榮州刺史提舉江州太平觀閩州居住尋移恭州二月戊辰朔宜章縣民李冬至二作亂犯英連韶郴諸州祝友隆劉光世分其軍以友知楚州庚午改行宮禁衛所爲行在皇城司李成黨邵友犯筠州守臣王庭秀棄城去辛未犯臨江軍守臣康倬遁壬申初定歲祀天地社稷如奏告之禮癸酉桑仲自棗陽引兵還襄陽丁丑

鄜延將李永琦叛犯慶陽府戍寅禁州郡統兵官擅招安亂軍盜賊己卯日中有黑子四日乃沒以辛金宗爲福建制置使辛巳以秦檜參知政事壬午水賊張榮入通州癸未詔辛企宗及謝嚮罷遣范汝爲兵汝爲不聽命甲申詔王瓌張俊掎角討捕馬進等賊丙戌復置祕書省己丑命孔彥舟呂頤浩張俊會兵討李成壬辰雨雹癸巳邵青寇宣州丙申詔諸路提刑司以八月類省試張浚亦以便宜合川陝舉人卽置司類省試丁酉宣教郎范壽坐誣訟孟忠厚且及太后除名潮州編管是月李敦仁犯汀州馬友遣其黨犯鄂州總管張用拒郤之李允文以友權湖南招提公事友大掠漢陽而去過岳州守臣吳錫遁友據之三月戊戌朔以嚴衢二州守臣柳約李處勳有治効各進職一等呂頤浩遣崔增王瓌合兵擊李成于湖口大敗之庚子張浚以富平之敗上疏待罪詔免壬寅禁諸路遏糴丙午張俊楊沂中岳飛渡江擊馬進大敗之孔彥舟焚掠潭州趨衡州己酉李成犯饒州庚戌張俊楊沂中復擊馬進于筠河敗之復筠州進奔江州男子崔紹祖詐稱越王中子受上皇詔爲天下兵馬大元帥趙霖以聞辛亥詔赴行在命劉光世兼淮南京東路宣撫使治揚州經畫屯田光世迄不行甲寅罷諸州免行錢乙卯金人破階州庚申劉超犯澧州統制杜湛率兵拒之甲子始下詔罪李成募人禽斬赦脅從者張俊追馬進至江州進戰敗遁去乙丑進復江州楊沂中趙密引兵追擊進又大敗之成奔蘄州振淮南京東西流民荆湖東路安撫使

向子諲說降馬友與共討李冬至二年之是月金人攻張榮縮頭湖水砦榮擊敗之來告捷劉光世以榮知秦州金人迫興州張浚退保閬州以端明殿學士張深爲四川制置使及參議軍事劉子羽趨益昌參謀官王庶爲龍圖閣待制知興元府兼利夔兩路制置使節制陝西諸路桑仲以其黨李道知隨州夏四月己巳張浚承制分利閬劍文政五州爲利州路置經略安撫使庚午張琪復叛犯當塗縣金將撻懶渡淮屯宿遷縣馬樂湖壬申太白晝見乙亥劉光世復楚州階州統領杜肇復階州馬友引兵入潭州戊寅杜琪棄澧州劉超入據之己卯金涇原帥趙彬犯耀州守臣趙澄擊走之淮賊寇宏犯濠州庚辰隆祐皇太后崩癸未桑仲陷鄧州守將譚克棄城走河東招捉使王俊引兵來援仲執斬之以其黨李橫知州事乙酉爲太后制葺年服辛卯羣臣三上表始聽政癸巳命向子諲發兵及廣西安撫許中同扼險要防孔彥舟入廣仍許脅從自新以招諭之是月京西賊李忠陷商州守臣楊伯孫棄城走呂頤浩遣統制閻阜通判建昌軍蔡延世襲擊李敦仁禽其弟世雄世臣五月丙辰朔蜀江西路被賊州縣賦稅丁酉詔呂頤浩朱勝非劉光世並兼淮南諸州宣撫使始奪李成官戊戌以張用爲舒蘄鎮撫使癸卯作大宋中興寶成金人犯和尚原吳玠擊敗之丙午初復召試館職之制劉光世遣統制王德襲揚州執郭仲威以獻伏誅辛亥水軍統制邵青叛圍太平州趙彬及金人合兵圍慶陽府守臣楊可昇擊敗之甲寅命知南外宗

正事令慮選年幼宗子將育于宮中詔收耆戶長役錢己未詔州縣因軍期徵取民財物者立式榜示禁過數催擾庚申孔彥舟引眾過潭州馬友迎擊大敗之彥舟趨岳州犯鄂州李允文以彥舟爲湖東副總管屯漢陽辛酉以直祕閣宗綱爲荆南鎮撫使措置營田官樊賓爲副壬戌劉光世招降邵青趙延壽據分寧縣呂頤浩招降之是月張俊及李成戰于黃梅縣殺馬進成敗遁歸劉豫李忠譚克各率兵歸張浚浚命王庶分其兵張用復叛寇江西岳飛招降之湖州進士吳木上書論宰執送徽州編管六月己巳始鸞承直修武郎以下官壬申冊諡皇太后曰昭慈獻烈甲戌張琪犯餘杭州又犯宣州乙亥月犯心庚辰湖賊楊華楊廣犯鼎州程昌寓拒卻之上虞縣丞婁寅亮上書請選立繼嗣壬午權檄昭慈獻烈皇后于越州張琪犯徽州守臣郭東棄城去琪入據之癸未張浚引大兵至瑞昌縣之丁家洲李允文自鄂部兵歸浚浚并其兵護允文赴行在邵青率舟師至鎮江甲申復叛去丁亥崇安民廖公昭合范汝爲餘黨熊志寧作亂眾既散志寧復與建陽民丁朝佐合兵陷二縣戊子慮囚己丑邵青犯江陰軍之福山遣海州鎮撫使李進彥中軍統制耿進率舟師會劉光世討之南安賊吳忠宋破壇劉洞天作亂庚寅江西提刑司遣官討之破壇洞天皆伏誅忠遁去癸巳熙河統制關師古洮東安撫郭玠同討熙州叛兵連敗之甲午廣賊鄧慶龔富圍南雄州守臣鄭成之率兵民以拒獨建劍汀州邵武軍租是月知虢州邵興屯盧氏

縣爲河南統制董先所破走興元先遂取商虢二州張浚承制以吳玠爲陝西諸路都統制時關隴六路盡陷止餘階成岷鳳洮五郡鳳翔之和尙原隴州之方山原黏罕旣得陝西地悉與僞齊秋七月乙未朔以馬友權荆湖東路副總管趣討孔彥舟統制潘達後軍將胡江等叛破玉山弋陽永豐三縣遣樞密院準備將領徐文討之戊戌吳錫復入邵州庚子以岳飛爲神武右副軍統制留軍洪州彈壓盜賊辛丑封伯右武衛大將軍令話爲安定郡王壬寅虔州賊陳鵬作亂命趣捕之甲辰詔祕書省長貳通修日曆丙午劉光世遣將喬仲福擊邵青于常熟爲所敗撻懶自宿遷北歸戊申韓世清追襲張琪復祈門縣庚戌張俊執傅雱赴行在張浚以曲端屬吏以武臣康隨提點夔路刑獄與王庶雜治之辛酉召呂頤浩赴行在張琪犯饒州頤浩遣閻臯擊敗之琪黨姚興降琪走徽州癸亥范宗尹罷是月珍州守臣李玠棄城去王彥數擊敗李忠趙彬來歸張浚承制以彬爲陝西轉運使又以涇原兵馬都監李彥琪爲本路副總管彥琪尋叛去八月丙寅以孔彥舟爲斬黃鎮撫使丁卯以知潭州吳敏爲荆湖東西廣南路宣撫使張浚殺曲端于恭州獄張用部兵至瑞昌歸張浚浚以用爲本軍統制戊辰張守等上紹興重修勅令格式癸酉復以汪伯彥爲江東安撫大使乙亥呂頤浩遣將李鑄復舒州丁丑祔昭慈獻烈皇后神主于温州太廟戊寅張守罷以李回參知政事富直柔同知樞密院事庚辰杜湛及劉超戰于彭山爲所敗辛巳超及

楊華楊廣合兵復寇鼎州程昌寓遣湛率舟師擊敗之遣辛企宗移軍福州討熊志靈胡江等諸賊韓世清及張琪戰世清敗琪復入祈門縣壬午命張俊遣兵捕之鑄紹興錢癸未詔許邵青張琪裔從徒黨自新乙酉以李成在順昌恐復謀亂遣使齎蠟書諭淮寧蔡州將士立賞格募人禽斬成丁亥以秦檜爲尙書右僕射同中書門下平章事兼知樞密院事庚寅復李綱資政殿大學士募人往京東河南伺察金齊動止仍齎詔慰撫忠義保聚之人蔡州鎮撫使范福葉城去以土豪李祐代之辛卯蠲徽州被賊民家夏稅壬辰置三省樞密院賞功房是月知鄂州曹成掠湖西犯沅州與知復州李宏合屯瀏陽旣而攻宏奔潭州九月甲午朔張琪黨李捧犯宣州守臣李彥卿及韓世清擊却之詔江東西路安撫使復治建康府洪州以王瓚知池州楊惟忠知江州並兼管內安撫使率部兵赴官丙申斬李世臣己亥以資政殿學士葉夢得爲江南東路安撫大使兼壽春等六州宣撫使庚子張琪復陷宣州己乃遁去辛丑命王瓚討琪丁未詔歲再遣使省謁諸陵因撫問河南將士命馬友移屯鄂州庚戌命宗室右監門衛大將軍士芑朝饗溫州太廟辛亥合祭天地于明堂太祖太宗並配大赦罷諸州守臣節制軍馬錄用元符末上書人子孫癸丑復以呂頤浩爲尙書左僕射同中書門下平章事兼知樞密院事丁巳王彥破李忠于秦郊店忠奔歸劉豫戊午禁福建轉運司抑民出助軍錢落范宗尹觀文殿學士己未初措置河南諸鎮屯田以

戶部尙書孟庾爲江東西湖東等路宣諭制置使辛酉詔四方有建策能還兩宮者竄封以聞有效者賞以王爵壬戌遣御史胡世將督捕福建盜賊是月長星見冬十月乙丑詔蔡京王黼門人竇有才能者公舉敘擢李回罷丙寅朱勝非分司江州居住丁卯以李允文恣睢專殺賜死大理獄己巳王德招邵青降之庚午以孟庾參知政事徽猷閣直學士湯東野爲江淮發運使劉洪道招降李捧董旺壬申置行在大宗正司癸酉兀朮攻和尙原吳玠及弟璘力戰大敗之兀朮僅以身免丁丑增置諸路武尉戊寅以張俊爲太尉移屯婺州壬午初置見錢關子招人入中以給軍食范汝爲復叛入建州守臣王淩明棄城走辛企宗退屯福州甲申劉超請降以超守光州戊子崔紹祖伏誅詔邵青以舟師赴行在己丑升越州爲紹興府李成軍正李秀伏誅知承州王林禽張琪于楚州檻送行在壬辰錄程頤孫易爲分寧令癸巳范汝爲犯邵武軍守臣吳必明統制李山率兵拒之衆潰退保光澤縣關師古復秦州獲郭振是月劉豫遣將王世冲寇廬州守臣王亨大破之斬世冲曹成及馬友戰于潭州成敗還攸縣王才遣將丁順圍濠州劉光世遣兵攻橫澗山順解圍去十一月乙未葉夢得至建康以詔招王才降之丙申遣內侍撫問孔彥舟桑仲丁酉榜諭福建江東羣盜赦其脅從者戊戌詔移蹕臨安以孟庾爲福建江西荆湖宣撫使神武左軍都統制韓世忠副之仍命械謝鸞陸棠赴行在己亥以婁寅亮爲監察御史范汝爲犯光澤縣李山走

信州辛丑續編紹興太常因革禮桑仲請正劉豫惡逆之罪詔進幸荆南乙巳以右司諫韓璜黨富直柔
實監潯州稅張琪伏誅庚戌富直柔罷荆湖廣西宣撫使吳敏始受命置司柳州辛亥升康州爲德慶府
壬子詔內外侍從各舉所知三人丙辰程昌寓遣杜湛擊楊華敗之命張浚遣使持詔招曹成以所部赴
行在己未楊華請降辛酉命吏部侍郎李光節制臨安府內外諸軍壬戌曹成犯安仁縣執安撫使向子
誣進攻道州是月前知廓州李惟德以岷州來歸吳玠始遣人通書夏國十二月乙丑吳敏罷丙寅復置
樞密院都承旨范汝爲遣葉澈寇南劍州守臣張贊拒戰大破之己巳遣吏部侍郎傅崧卿爲淮東宣諭
使甲戌遣江東安撫司統制郝長顏孝恭討建昌軍賊乙亥辛企宗罷仍追三官率兵赴軍前自效丁丑
蠲諸路在官積欠詔官戶名田過制者與民均科以岳飛爲神武副軍都統制部兵屯洪州曹成陷道州
守臣向子恣棄城走戊寅以誓出求直言增行在職事官職錢遣駕部員外郎李愿撫諭川陝己卯詔兩
浙分東西路置提點刑獄庚辰桑仲遣兵寇復州守臣趙適棄城去辛巳復置廣西提舉茶鹽司知海州
薛安靖殺僞都巡檢使王企中率軍民以城來歸增諸路酒錢以備軍費甲申知龍州范綜統制雷仲舉
兵復水洛城己丑起復陝西都統制吳玠爲鎮西軍節度使詔江西安撫司趣兵討捕吳忠是月劉豫遣
將王彥充攻壽春府桑仲遣李橫復寇金州王彥拒戰于馬郎嶺大破之均州平蔡州褒信縣弓手許約

叛據光州隋州安撫孫注復洮州龔富等圍南劍州

宋史卷二十六

宋史卷二十七

元 中 書 右 丞 相 總 裁 脫 脫 等 修

本紀第二十七

高宗四

二年春正月癸巳朔帝在紹興府率百官遙拜二帝不受朝賀甲午詔復置賢良方正直言極諫科丙申賜楊邦乂謚曰忠襄韓世忠圍建州丁酉蠲諸路元年逋稅庚子陝西叛將白常圍岷州關師古率兵破之辛丑韓世忠拔建州范汝爲自焚死斬其二弟餘黨悉平壬寅帝發紹興曹成釋向子諲丙午帝至臨安府壬子遣韓世清捕石陂賊癸丑以張俊檢校少保定國軍節度使劉豫遣兵犯伊陽縣翟興及其將李恭合擊敗之曹成犯郴州永興縣己未修臨安城辛酉遣內侍任源撫問張浚江西副總管楊惟忠以楊勅雖就招安復謀作亂誘誅之二月甲子楊華復叛擾鼎澧潭三州詔立賞禽捕首領赦貸脅從丙寅命劉光世將銳卒萬人屯揚州經理淮東庚午以李綱爲觀文殿學士湖廣宣撫使仍命岳飛率馬友李宏韓京吳錫等共討曹成諸盜甲戌以吏部尙書李光爲淮西招撫使王瓊副之乙亥雨雹丙子以施達謝嚮陸棠黨范汝爲達除名婺州編管嚮棠械赴行在俱道死丁丑分崔增李捧邵青趙延壽李振單德

忠徐文所部兵爲七將名御前忠銳軍隸步軍司非樞密奉旨不許調遣減淮南營田歲租三之二俟三年復舊己卯劉光世入見同執政對內殿諭以進屯揚州光世迄不行庚辰詔監司避本貫壬午程昌寓遣杜湛募兵攻賊周倫破之甲申以工部員外郎滕茂實死節于代州贈龍圖閣直學士丙戌初置著作官二員修日厯己丑復荆湖東西爲荆湖南北路南路治潭北路仍治鄂申禁福建路私有私造兵器是月知商州董先叛入劉豫金人陷慶陽府執楊可昇降之三月壬辰朔命襄鄧鎮撫使桑仲收復陷沒諸郡仍命諸鎮撫使互相應援再貶徐秉哲惠州吳玠南雄州莫儻韶州並居住水賊翟進襲漢陽軍殺守臣趙令幾李光執韓世清于宣州以歸處化縣賊李敦仁及其徒皆授官隸諸軍乙未復置江陰軍罷福建路武尉戊戌葉夢得罷以李光爲江東安撫大使兼滁濠等六州宣撫使罷江淮發運司桑仲如郢州調兵守將霍明以仲將謀逆殺之以其事聞庚子金人攻方山原陝西統制楊政援之金兵引去辛丑又犯隴安縣吳璘等擊走之淮南營田副使王寔括閬田三萬頃給六軍耕種丙午復置中書門下省檢正官省樞密院檢詳官己酉以神武右軍中部統制楊沂中爲神武中軍統制癸丑河南鎮撫使翟興爲部將楊偉所殺甲寅金人復自水洛城來攻楊政等又敗之庚申曹成寇賀州清水砦守臣劉全棄城去是月知壽春府陳卞及鈐轄陳寶等舉兵復順昌府尋引兵歸爲僞齊所逐并壽春失之夏四月甲子曹成

陷賀州陳顯圖循州焚龍川縣命江西安撫司遣將捕之丙寅賜禮部進士張九成以下二百五十九人及第出身庚午以翰林學士承旨翟汝文參知政事壬申釋福建諸州雜犯死罪以下囚江西軍賊趙進寇瑞昌縣楊惟忠討降之戊寅僞齊統領王資率兵來歸富順監男子李勃僞稱徐王召赴行在壬午詔內外侍從監司守臣各舉中原流寓士大夫三二人以備任使癸未詔曰朕登庸二相倚過惟均其所薦用之人不得偏私離間朋比害政謚孫傳曰忠定乙酉李綱始拜命置司福州是夜太平州軍士陸德據城叛囚守臣張鐔殺當塗縣令鍾大猷戊子命呂頤浩都督江淮荆浙諸軍事庚寅劉豫徙居汴京是月王彥大破董先于馬嶺關復商州閏月癸巳高麗遣使入貢乙未知池州王進討陸德誅之丙申岳飛擊破曹成于賀州置都督府隨軍轉運司丁酉左朝奉郎孫覲坐前知臨安府贓污貸死除名象州羈管罷後苑工作辛丑韓世清以狂悖伏誅丙午岳飛敗曹成于桂嶺縣成走連州遣統制張憲追擊破之又走郴州入邵州丁未賜福建宣撫司賞軍錢十萬緡聽朱勝非自便乙卯詔諸鎮撫使非奉朝旨毋擅出兵劉光世聞父喪去官特命起復己未詔自今明堂專祀昊天上帝以太宗配是月張浚命利夔制置使王庶與知成都府王似兩易其職襄鄧副都統制李橫同副都統制李道合兵圍郢州霍明遁去五月辛酉以兵部尚書權邦彥簽書樞密院事以樞密將領趙琦所部兵爲忠銳第八將癸亥呂頤浩出師以神武

後軍及忠銳兩將從行百官班送甲子以霍明權襄鄧隨郢州鎮撫使詔觀察使已上各薦可備將帥者
二人丁卯罷兩浙轉運司回易庫己巳廢紹興府餘姚上虞縣湖田爲湖漑民田庚午詔修建康行宮辛
未選宗室子偁之子伯琮育于禁中丙子呂頤浩總師至常州前軍將趙延壽兵叛于呂城鎮丁丑延壽
犯金壇縣殺知縣胡思忠頤浩稱疾不進戊寅海州賊王山犯漣水軍總領蘇復副統制劉靖會兵擊敗
之庚辰臨安府火癸未置御前軍器所甲申親慮囚自是歲如之罷行在權官乙酉劉光世遣王德追趙
延壽叛兵至建平縣悉誅之內戊置脩政局命秦檜提舉詔侍從臺省寺監官監司守令條具省費裕國
疆兵息民之策丁亥以中書門下省檢正官仇愈爲沿海制置使戊子手詔用建隆故事命百官日輪一
人轉對兩浙轉運副使徐康國獻銷金屏障詔有司毀之奪康國二官蠲太平州被賊之家夏稅是月張
浚以參贊軍事劉子羽知興元府黜王庶復以王似知成都府韓世忠至洪州遣董敦招曹成聽命赴
行在六月庚寅朔李宏引兵入潭州執馬友殺之甲午李綱領兵三千發福州戊戌詔孟庾韓世忠班師
岳飛屯駐江州庚子以劉光世爲寧武寧國軍節度使韓世忠爲太尉移屯建康府辛丑以李橫爲襄鄧
鎮撫使李道鄧隨鎮撫使壬寅翟汝文罷孔彥舟叛降僞齊乙巳以權邦彥兼權參知政事戊申仇愈兼
制置福建路辛亥免臺諫官輪對甲寅召呂頤浩赴行在令參謀官傅崧卿權主管都督府事詔兩浙江

淮守臣令存撫東北流寓人乙卯韓世忠遣統制解元巨振入潭州執李宏以歸秋七月辛酉悉蠲福建諸州被兵之家田稅壬戌復置湖北提舉茶鹽司甲子罷福建提舉市舶司己巳起復翟琮爲河南府孟汝唐州鎮撫使甲戌罷淮東路提點刑獄司丙子馬友黨郝通率兵五萬歸宣撫司戊寅知廬州王亨復安豐壽春縣己卯呂頤浩入見庚辰韓世忠討劉忠駐兵于岳州之長樂渡大破之忠走淮西丁亥詔編次建炎以來譜牒八月壬辰以孟庾兼權同都督江淮荆浙諸軍事癸未順昌縣賊余勝等作亂通判南劍州王元鼎捕殺之甲午安定郡王令話薨丙申詔郡守除罷赴闕皆得引對臨安府火以知江州劉紹先爲沿淮防遏使戊戌命朱勝非提舉醴泉觀兼侍讀日赴朝堂議事沿海州縣籍民海舶每歲一更守海道險要振福建饑民己亥停傳秀官英州羈管庚子詔孟庾韓世忠總大兵至建康進赴行在戊申給事中胡安國以論朱勝非罷宰執臺諫上疏留之皆不報江西統制傅樞討平南雄賊張忠鄧慶劉軍一等己酉賜吳玠田甲寅秦檜罷給事中程瑀等坐論駁朱勝非疑其黨檜並落職主宮觀誓出冒乙卯減膳戒輔臣脩闕政罷脩建康行宮九月戊午朔落秦檜職己未罷修政局辛酉以誓出大赦許中外臣民直言時政陝西諸叛將許令自新壬戌王倫自金國使還入見遣潘致堯等爲金國軍前通問使附茶藥金幣進兩宮甲子以直徽猷閣郭倬爲淮西巡撫使乙丑復以朱勝非爲尙書右僕射同中書門下平章

事兼知樞密院事戊辰司空山賊李通出降以爲都督府親軍統領癸酉以右朝請大夫呂源爲浙東福建沿海制置使治定海縣知建昌軍朱芾擊石陂賊余照禽斬之甲戌彗沒丙子復以郭仲荀爲武泰軍節度使詔墨勅有不當者許三樞省密院奏稟給事中中書舍人繳駁臺諫論列有司申審庚辰命福建提舉茶鹽官兼領市舶司辛巳以韓世忠爲江南東西路宣撫使他帥臣稱宣撫使者並罷壬午遣監察御史明察等五人宣諭江浙湖廣福建諸路仍降詔諭官吏以遣使按察勸懲誅賞之意癸未新作行宮南門成甲申提轄權貨務張純浚立淮浙鹽法增其算總領四川財賦趙開初變四川鹽法盡權之乙酉太白晝見丙戌以知興元府王似爲川陝宣撫處置副使丁亥封右監門衛大將軍榮州防禦使令時爲安定郡王是月韓世忠遣統制解元襲擊劉忠于鞏陽大破之忠奔劉豫冬十月戊子朔置牧馬監于饒州庚寅李勃伏誅丙申初置江浙荆湖廣南福建路都轉運使甲辰潘致堯至楚州通判州事劉晏劫其禮幣奔劉豫守臣柴春戰死戊申以知平江府趙鼎爲江東安撫大使丙辰禁溫台二州民結集社會班度量權衡于諸路禁私造者是月顏季恭招降石陂餘賊李寶等十一月辛酉陳顛陷汀州武平縣犯梅循二州乙丑初權明州鹵田鹽辛未議將撫師江上召侍從官條具利害甲戌命李綱劉洪道程昌寓解潛會兵捕討湖寇楊太戊寅范汝爲餘黨范忠掠龍泉縣庚辰詔宣諭五使焚所至州縣建炎以前已蠲

稅籍癸未臨安大火是月關師古敗僞齊兵于抹邦山馬友黨步諒詣李綱降綱入潭州其黨郝昱降王進吳錫禽王浚湖南盜賊悉平十二月丁亥朔命神武前軍統領申世景等討捕范忠己丑僞稱榮德帝姬易氏伏誅范忠犯處州巨師古引兵入廬州執王亨送行在甲午李綱罷臨安府火丙申振被火家罷浙東沿海制置司丁酉岳飛遣統領徐慶王貴討禽萍鄉賊高聚己亥以胡舜陟爲廬壽等州鎮撫使金人侵熙秦關師古擊敗之庚子遣駕部員外郎李愿撫諭川陝江西兵馬副鈐轄張中彥坐縱暴不法斬于潭州辛丑程昌寓遣杜湛討楊欽等敗之殺三千餘人癸卯川陝宣撫司類試陝西發解進士得周謨等十三人以便宜賜進士出身甲辰罷張浚宣撫處置使仍知樞密院以知夔州盧法原爲川陝宣撫處置副使及王似同治司事己酉遣司封員外郎周隨亨同撫諭川陝庚戌孟庾自建康來朝辛亥金人犯商州守將邵隆退屯上津李橫敗僞齊兵復汝州甲寅命孟庾同都督江淮荆浙諸軍事詔都督府總治江東西湖北浙西帥臣經畫屯田張浚承制以歸州隸夔州路是冬金人犯和尚原將士乏食自潰吳璘拔營棄去虔賊謝達犯惠州

三年春正月丁巳朔帝在臨安率百官遙拜二帝不受朝賀江西將李宗諒誘戍兵叛寇筠州統領趙進擊卻之翟琮入西京禽僞齊留守孟邦雄命諸路憲臣兼提舉常平司庚申金人犯上津李橫破穎順軍

僞齊知軍蘭和降壬戌金人犯金州洵陽縣以仇念爲福建兩浙淮東路沿海制置使癸亥陳顛圍潮州
不下引兵趨江西甲子李橫復潁昌府乙丑詔中外刑官各務仁平臺憲檢察月具所平反以聞歲終考
察殿最金人陷金州鎮撫使王彥焚積聚退保西鄉庚午罷行在宗正司命嗣濮王仲湜兼判大宗正事
辛未震電雨雪造渾天儀李通爲其徒王全所殺壬申命西外宗正移司福州癸酉復祭大火以湯東野
爲淮東安撫使乙亥以李橫爲襄陽府鄧隨郢州鎮撫使丁丑登萊山砦統制范溫率部兵泛海來歸庚
辰詔春秋望祭諸陵張浚論奏王似不可爲副因引罪求罷不報癸未詔民復業者視墾田多寡定租額
賦役乙酉減淮浙蠶鹽錢二月丁亥朔升桂州爲靜江府己丑權邦彥薨浙東賊彭友犯龍泉縣辛卯李
通餘黨劉德圍舒州吳玠遇金人于饒風關王彥自西鄉來會金人分兵攻關統制郭仲敗走丁酉饒風
關破玠趣西縣彥奔達州四川大震張浚被罷職之命以諸軍方潰因秘不行復具奏審己亥金帥撒離
曷入興元府經略使劉子羽焚其城走三泉縣吳玠退屯仙人關庚子以宗子伯琮爲和州防禦使賜名
璣尋改貴州辛丑蠲廣東諸州被賊民家稅壬寅鄭州兵馬鈐轄牛皐彭玘率兵與李橫會橫以便宜命
皐爲蔡唐州鎮撫使玘知汝州乙巳翟琮遣統制李吉敗僞齊兵于伊陽又殲其將梁進之衆丁未王似
始受宣撫副使之命戊申虔賊周十隆犯循梅汀州詔統制趙祥等合兵捕之庚戌以李橫爲神武左軍

副統制京西招撫使改胡舜陟爲淮西安撫使辛亥以工部尙書席益參知政事翰林學士徐俯簽書樞密院事壬子王金犯廬州甲寅詔守臣至官半年具上民間利害或邊防五事李橫遣人奏穎昌之捷詔許橫便宜行事乙卯劉光世遣酈瓊等屯兵泗州爲李橫聲援是月張浚復以王庶爲參謀官往巴州措置時金兵深入至金牛鎮疑有伏由褒斜谷引兵還興元吳玠劉子羽追擊其後殺獲甚衆三月己未詔岳飛捕虔賊壬戌申命統制巨師古部兵萬人屯揚州胡舜陟至廬州王金降甲子以趙鼎爲江西安撫大使李橫傳檄諸軍收復東京己巳金人遣兵援劉豫李橫敗走穎昌復陷壬午以韓世忠爲淮南東路宣撫使李綱遣兵擊降李宗諒詔戮于市夏四月丁亥朱勝非以母喪去位僞齊知虢州董震及其統制董先來歸以震權商號陝州鎮撫使己丑詔江東西湖北浙西募民佃荒田蠲三年租辛卯以劉光世爲檢校太傅江南東路宣撫使金人去興元壬辰徙都督府於鎮江岳飛軍次虔州甲午僞齊知唐州胡安中來歸丙申僞齊李成攻陷虢州董先牛皐奔襄陽己亥改諡昭慈獻烈皇后爲昭慈聖獻復舉五帝日月之祀庚子增文武小官奉辛丑荆南統制羅廣率兵至鼎州楊太衆益盛自號大聖天王立鍾相少子子義爲太子廣等不克討而還丁未岳飛遣統領張憲王貴擊彭友禽斬之劉忠爲部下王林所殺傳首行在戊申以浙西兵馬鈐轄史康民所部兵爲忠銳第九將己酉張浚奏王庶王似盧法原威望素輕乞

命劉子羽吳玠並爲判官不報辛亥徐文拔奔僞齊五月丙辰以翟琮爲河南府孟汝鄭州鎮撫使董先爲副使丁巳遣樞密計議官任直清撫諭襄陽商虢河南諸鎮己未命楊沂中招捕嚴州盜賊辛酉建睦親宅以董先爲商虢陝州鎮撫使徵河南布衣王忠民爲宣教郎至行在辭不受壬戌潘致堯還言金人欲重臣通使以取信遂寢出師之議乙丑罷諸州在任守臣所辟通判丁卯以韓肖胄等充金國軍前通問使安化蠻犯邊廣西經略使許中發兵擊之戊辰楊沂中招降嚴州賊繆羅等捕斬其徒百人魔賊平庚午以岳州數被兵免今年稅役壬申詔守令尉佐境內妖民聚集不能覺察致亂者並坐罪知建昌軍朱芾討南豐縣賊禽誅其魁黃琛乙亥以方輿金國議和禁邊兵犯齊境丙子王彥復金州金兵棄均房去韓世忠請以大軍還鎮江己卯詔淮南統制解元戌泗州餘屯江北周隨亨李愿宣押王似盧法原至閩州張浚始解使事時已論金牛之功以吳玠爲利州路階成鳳州制置使劉子羽爲寶文閣直學士王彥爲保大軍承宣使僚屬將帥第賞有差庚辰浚及子羽王庶劉錫等赴行在詔李橫等收軍還鎮辛巳罷宣撫司便宜黜陟六月甲申朔統制巨師古坐違韓世忠節制除名廣州編管丙戌復置六部架閣庫丁亥禁諸路招納淮北人及中原軍來歸者戊子復元祐宰相呂大防官職贈諡庚寅詔降川陝死罪囚釋流以下賞吳玠關師古將士壬辰張浚至綿州復奏王似不可任甲午命王瓌率諸軍討楊太己亥罷

沿海制置司丁未置國子監及博士弟子員戊申以王林所部兵爲忠銳第十將己酉岳飛自虔州班師辛亥發兵屯駐虔廣二州彈壓盜賊州各三千人是月金人圍方山原王似命吳玠發兵救之秋七月己未復置博學宏詞科初許任子就試甲子以久旱償州縣和市民物之直丁卯詔訪求累朝勳臣曹彬等三百人子孫以備錄用戊辰王夔以舟師發行在己巳詔減膳禁屠弛工役罷苛嬖命兩浙及諸路憲臣親按部錄囚辛未蠲紹興二年和市絕帛癸酉呂頤浩等以旱乞罷政帝賜詔曰與其去位曷若同寅協恭交修不逮思所以克厭天心者頤浩等乃復視事乙亥朱勝非起復丙子泉州水溢壞城丁丑遣中使逆趣張浚于道是月四川霖雨地震八月己丑詔岳飛赴行在留精兵萬人戊戌江州翟琮率兵突圍犇襄陽詔屯駐其地癸卯罷諸路輪禁軍闕額錢甲辰以雨暘不時蘇湖地震求直言乙巳復置史館修撰直館檢討官命郎官兼領著作郎及佐郎戊申罷都轉運司己酉詔湖南丁米三分之一均取于民田其一取之丁口辛亥孟庾自軍中來朝九月戊午呂頤浩罷詔凡遇水旱災異監司郡守卽具奏毋隱庚申岳飛自江州來朝川陝統領官吳勝敗僞齊兵于黃堆砦丙寅以趙鼎爲江西安撫制置大使壬申詔中書舍人給事中凡制勅非軍期機速必先書押而後報行甲戌僞齊王彥先寇徐宿二州乙亥以劉光世爲江東淮西宣撫使置司池州韓世忠爲鎮江建康府淮南東路宣撫使置司鎮江府王夔爲荆南府岳鄂

潭鼎澧黃州漢陽軍制置使置司鄂州岳飛爲江南西路舒蘄州制置使置司江州主管殿前司郭仲荀
知明州兼沿海制置使神武中軍統制楊沂中兼權殿前司己卯吳勝克蓮花城冬十月癸未朱勝非上
重修吏部七司勅令格式庚寅加吳玠檢校少保壬辰趣王玠進兵詔寬私鹽重法甲午卻大理國入貢
丁酉殘破州縣視戶口增損立守令考課法己亥禁州縣擅增置稅場僞齊李成陷鄧州辛丑南丹蠻莫
公晟幽觀州焚寶積監殺知監陳烈壬寅僞齊兵逼襄陽李橫以糧盡棄城奔荆南知隨州李道亦棄城
去甲辰王玠討湖賊戰于鼎口不利僞齊陷鄧州守臣李簡棄城去申禁私役戰士丁未命三省除銓曹
姦弊戊辰罷諸路類省試統制石世達及杜湛合兵大破湖賊黃誠于龍陽洲庚戌復置宗正少卿及寺
監諸丞是月王彥先引兵至北壽春將渡淮劉光世駐軍建康扼馬家渡又遣鄺瓊駐無爲軍爲廬濠聲
援賊乃還十一月己未以右文殿修撰王倫爲都督府參議官癸亥詔監司帥守察內外宗子病民害政
者以聞崔增吳全遇湖賊于陽武口死之甲子韓肖胄等使還乙丑禁沿淮諸砦兵擅侵齊境庚午臨安
府火甲戌禁掠賣生口入蠻夷峽峒及以銅錢出中國乙亥復元祐十科舉士法丁丑命賓橫宜觀四州
市戰馬戊寅王玠自鼎州引兵還鄂留統領王渥等四軍聽程昌寓節制己卯緡南劍州所負民間獻納
錢十六萬緡省淮南州縣文武官十二月辛巳朔降勅書撫諭吳玠及川陝將士乙酉臨安府火戊子又

火朱勝非以屢火求罷不允丙申王似承制廢通遠軍己酉金國元帥府遣李永壽王翊來見是歲海寇
黎盛犯潮州焚民居毀城去

四年春正月辛亥朔帝在臨安率百官遙拜二帝乙卯增淮浙路鹽鈔貼納錢遣章誼等爲金國通問使
己未程昌寓遣杜湛王渥攻楊太皮真砦破之己巳詔諭王似盧法原吳玠使之協和金人犯宕昌臨江
砦及花石峽關師古遣統領劉戩分兵拒却之庚午詔諸路將帥毋以兩國通使輒弛邊備淮南州郡津
渡尤慎譏察甲戌罷州縣新置弓手乙亥蠲循梅潮惠四州被兵家租賦丙子申勅三省樞密院除官並
遵舊制毋相侵紊除拜罷免皆明示黜陟之由戊寅金人犯神全砦沿北嶺至大散關臨安府火己卯韓
肖胄罷二月壬午詔賊罪至死者仍籍其貲癸未作建康府行宮席益罷乙酉以徐俯兼參知政事丙戌
禁川陝諸將招納北軍湖北軍賊檀成犯長陽縣解潛遣統領胡勉捕斬之羣盜田政自襄陽犯陝州己
丑解潛遣統制王恪擊政斬之庚寅金人犯兩當縣乙未詔孟庾赴行在己亥詔三衙管軍及將帥觀察
使以上舉忠勇智略可自代者一人辛丑金人犯仙人關癸卯詔權以射殿爲景靈宮四時設位朝獻丙
午張浚入見三月辛亥朔吳玠率楊政吳璘田晟王喜諸將與兀朮戰于仙人關大敗之兀朮遁去戊午
雨雪以趙鼎參知政事壬戌孟庾至行在罷都督府以其兵屬張浚乙丑張浚以資政殿大學士罷尋落

職奉祠福州居住己巳蠲淮南州縣民租一年辛未日有青赤黃氣編次建炎以來詔旨頒諸路癸酉蠲興元府洋州被兵家稅役二年丙子以王似爲資政殿學士川陝宣撫使盧法原爲端明殿學士與吳玠並充副使關師古爲熙河蘭廓路安撫制置使夏四月庚辰朔命趙開再任總領四川財賦詔諭川陝官吏兵民以張浚失措當示遠竄猶嘉其所用吳玠等能禦大敵許國一心止從薄責仍令宣撫司講求諮訪凡擾民咈衆之事速釐革之癸未劉子羽白州安置乙酉詔明堂用皇祐典禮兼祀天皇大帝神州地祇以下諸神丙戌吳玠敗金兵復鳳秦隴州詔特旨處死情法不相當者許大理奏審蠲淮南州軍上供錢一年庚寅置孳生牧馬監于臨安府甲午罷廣西提舉茶鹽司關師古叛以洮岷二州降僞齊吳玠併將師古軍乙未詔諸路歲上戶口丁酉罷諸州回易庫庚子命劉光世遣兵巡邊辛丑保靜州夷人入貢丙午徐俯罷是月王似承制廢符陽軍知壽春府羅興叛降僞齊五月庚戌朔以岳飛兼黃復二州漢陽軍德安府制置使癸丑以范冲爲宗正少卿兼直史館重脩神宗哲宗正史實錄甲寅詔淮南帥臣兼營田使守令以下兼管營田岳飛復郢州斬僞齊守荆超甲子以孟庾兼樞樞密院事乙丑賜李橫軍絹萬匹丙寅李成棄襄陽去岳飛復取之金人攻金州鎮撫使王彥遣統制許青等與戰于漢陰敗之罷諸縣武尉壬申裁省三省樞密細務責大曹長貳專決癸酉以國史日厯所爲史館僞齊收李成餘衆益兵駐

新野岳飛與別將王萬夾擊復大敗之乙亥王彥數敗金兵于洵陽縣丙子復遷宗室子彥之子伯玖育于禁中六月壬申復命川陝類試乙未太白晝見經天戊戌詔神武軍神武副軍統制統領官並隸樞密院庚子以霖雨罷不急之役壬寅詔三省樞密院凡奉干請墨勅許執奏不行置史館校勘官作明堂行禮殿于教場甲辰禁諸軍疆刺平人爲兵已刺者皆釋之吳玠乞宮觀不允是月熒惑犯南斗岳飛將牛皐復隨州執僞齊守王嵩礫之秋七月戊申湖曲赦虔州以吏部尙書胡從年簽書樞密院事庚戌以湖南安撫席益爲安撫制置大使建昌軍軍卒修達等作亂殺守臣劉滂江西制置使胡世將遣參謀侯懋統制卍贊討之壬子命吳玠通信夏國癸丑湖賊楊欽等破社木砦官軍敗卻小將許簽戰歿丙辰賞仙人關之功以吳玠爲檢校少師奉寧保靜軍節度使吳璘楊政以下論賞有差丁巳命左右司歲考郎官功過治狀以爲賞罰庚申復曲端趙哲官壬戌岳飛遣統制王貴張憲擊敗李成及金兵于鄧州之西復鄧州禽其將高仲丙寅侯懋引兵入建昌軍執修達等十三人斬之罷建州蠟茶綱詔江東安撫司招水軍千五百人已已湖賊萬餘人詣鼎澧二州降劉光世來朝庚午王貴張憲破金齊兵復唐州及信陽軍襄漢悉平辛未章誼孫近使還入見粘罕致書約淮南毋得屯兵八月庚辰以趙鼎知樞密院事充川陝宣撫處置使湖賊夏誠等犯枝江縣解潛遣將蔣定舟與戰敗之辛巳吳玠遣統領姚仲攻隴城縣克之

壬午王瓊以討賊無功降光州觀察使戊子改命趙鼎都督川陝荆襄諸軍事乙未遣魏良臣等充金國通問使丙申毀王安石舒王誥己亥周十隆出降爲官軍所掠復遁去犯汀循州壬寅王似罷以岳飛爲清遠軍節度使湖北荆襄潭州制置使代王瓊討湖賊癸卯以襄陽府隨郢唐鄧州信陽軍六郡爲襄陽府路九月戊申減淮浙路鹽鈔所增貼納錢壬子夏誠遣將李全功犯公安軍解潛遣統制林閏等擊斬之安定郡王令時薨辛酉合祭天地于明堂大赦蠲襄陽等六郡三年租稅庚午朱勝非罷金齊合兵自淮陽分道來犯壬申渡淮楚州守臣樊敘棄城去韓世忠自承州退保鎮江府癸酉以趙鼎爲尙書右僕射同中書門下平章事兼知樞密院事吏部尙書沈與求參知政事冬十月丙子朔與趙鼎定策親征命張浚以軍援淮東劉光世移軍建康車駕擇日進發丁丑以孟庾爲行宮留守留統制王進一軍及神武中軍五百人隸之百司不豫軍旅之務者聽從便避兵己卯韓世忠自鎮江率兵復如揚州金人犯滁州以張浚爲浙西江東宣撫使金人圍亳州席益遣統制吳錫率兵討穉賊楊再興大破之壬午僞齊兵犯安豐縣癸未復以張浚爲資政殿學士提舉萬壽觀兼侍讀甲申復以王瓊爲建武軍承宣使江西沿江制置使丙戌命胡松年詣江上會諸將議進兵戊子韓世忠邀擊金人于大儀鎮敗之又遣將董旼敗之于天長縣鴉口橋己丑金人攻承州韓世忠遣將成閔解元合兵擊于北門敗之金人圍濠州甲午遣祕

書正字楊晨持詔撫諭四川遣侍御史魏在監察御史田如鼈詣劉光世張浚軍中計事光世始移軍本
平州丙申命後宮自温州泛海如泉州金人陷濠州守臣寇宏棄城走了酉詔州縣團教弓手土兵戊戌
帝御舟發臨安劉錫楊沂中以禁兵扈從己亥韓世忠捷奏至命收瘞戰死將士仍令胡松年致祭庚子
張浚率兵發鎮江如建康壬寅帝次平江加贈陳東歐陽澈祕閣修撰官其子孫二人各賜田一頃且追
答汪伯彥落觀文殿學士黃潛善更不追復命韓世忠楊沂中分兵控扼沿海要地癸卯焚決淮東閘堰
賜扈從諸軍錢乙巳仇愈遣將孫暉擊金人于壽春敗之復霍丘安豐二縣是月借江浙坊場錢一界以
備軍費十一月戊申太白晝見庚戌賞承州水砦首領徐康等要擊金兵之功轉官有差仍蠲承楚泰州
水砦民兵賦役十年置沿江烽火放浙東諸郡防城丁夫壬子始下詔聲劉豫逆罪諭親討之旨以厲六
師吳玠遣統制楊從儀等率兵敗金人于臘家城癸丑玠乞納節贖劉子羽罪遂聽子羽自便金人入光
州甲寅僞齊知光州許約破石額山砦遂據之乙卯韓世忠遣兵夜劫金人營于承州破之金人犯六合
縣丙辰掠全椒縣三城湖丁巳戒諸路大小臣僚借貸催科縱吏姦擾民及務絕盜賊之伺隙者命董
趙康直總領淮東水砦戊午以胡松年兼權參知政事金人陷滁州劉光世移軍建康韓世忠移軍鎮江
張浚移軍常州己未復命張浚知樞密院事以其盡忠竭節詔諭中外庚申宴犒守江將士癸亥劉光世

遣統制王德擊金人于滁州之桑根敗之揭黃榜招諭湖賊甲子命滁和諸州移治保聚乙丑金人犯滁口己巳劉光世遣統制王師晟等率兵夜入南壽春府襲金人敗之執僞齊知府王靖廣賊區稠圍韶州樂昌縣鈴轄韓京遣兵擊斬之詔張浚視師江上十二月乙亥朔魏良臣王繪還自泗州軍前入見戊寅命都督府右軍統制李貴部兵屯扼福山鎮辛巳命中軍統制王進屯兵泰州防扼通泰壬午以樞密都承旨馬擴爲江西沿江制置副使丙戌吳倫遣兵攻臘家城破之丁亥聽兩淮避兵民耕種所在閒田壬辰金齊兵逼廬州仇愈嬰城固守岳飛所遣統制徐慶牛阜援兵適至敗走之劉光世亦遣統制靳賽戰于慎縣張浚遣統制張宗顏擊敗金人于六合詔江浙荆湖十四郡各募水軍五百人名橫江軍兩浙十郡沿江海州縣招捕巡檢土軍甲午程昌寓遣杜湛彭筠合擊楊欽破之己亥以來年正旦日食下詔修闕政求直言庚子金人退師辛丑詔葬祭浙西江東二軍之死者壬寅省淮南轉運司遣胡松年往常熟縣江陰軍沿江計議軍事癸卯金人去滁州

宋史卷二十七考證

高宗紀四紹興三年秋七月丁卯詔訪求累朝勳臣曹彬等三百人子孫以備錄用○臣漙封按續文獻
通考徽猷閣待制宋伯友入對言功臣子孫凋喪殆盡乞訪其後量才錄用故有是詔其後得趙普趙
安仁范質錢若水諸孫皆官之

宋史卷二十七考證

宋史卷二十八

元 中 書 右 丞 相 總 裁 脫 脫 等 修

本紀第二十八

高宗五

五年春正月乙巳朔日有食之帝在平江府金人去濠州丁未戒諸軍戰陳毋殺中原民籍充兵者命
粥官田宅輸錢專充軍費戊申進廬泰二州守禦官屬各一官己酉詔前宰執呂頤浩等十九人及行在
職事官各條上攻戰備禦措置綏懷之策免淮南官吏去職之罪仍令遷任承州水砦統領仲諒復入楚
州庚戌張浚遣統領楊忠閔王進夾擊金人于淮南岸敗之降其將程師回張延壽辛亥淮東統制崔德
明襲敗金兵于盱眙召張浚赴行在乙卯浚入見賞沿江監司帥臣供億之勞各進官一等戊午趣修建
康行宮己未詔減淮南諸州雜犯死罪釋流以下囚庚申置諸州軍教場選兵專習弓弩立格按試辛酉
贈殿中侍御史馬伸左諫議大夫韓世忠劉光世張俊入見壬戌以世忠爲少保淮東宣撫使駐鎮江光
世少保淮西宣撫使駐太平俊開府儀同三司江東宣撫使駐建康甲子鄜瓊復光州降其守許約乙丑
罷淮南茶鹽提刑司置提點兩路公事官一員兼領刑獄茶鹽漕運市易事淮西要會州軍並置市易務

戊辰詔川陝宣撫司招諭陷賊官民庚午命王進合江西廣東諸將兵討周十隆海賊朱聰犯廣州又犯泉州壬申劉光世韓世忠張俊入辭命升殿以光世世忠有隙賜酒諭釋之皆感激奉詔癸酉僞齊知亳州馬泰犯光州權州事王萃率兵拒之是月金主晟殂曼之孫亶立岳飛自池州入朝二月丙子以飛爲鎮寧崇信軍節度使命常州布衣陳得一造新麻丁丑帝發平江戊子遣權太常少卿張銖奉迎太廟神主于溫州壬午帝至臨安進扈從官吏秩一等丙戌以趙鼎爲左僕射張浚右僕射並同中書門下平章事兼知樞密院事都督諸路軍馬岳飛爲荊湖南北襄陽府路制置使將兵平湖賊楊太丁亥吳璘楊政攻拔秦州執僞齊守胡宣金帥撒離曷來援政復擊敗之己丑詔建太廟壬辰命張浚詣江上措置邊防詔諭諸路宣撫制置司示以專任之旨以右司諫趙霈論奏得體賜三品服丁酉進執政官秩一等以賞防秋之功戊戌詔淮南宣撫司撫存淮北來歸官吏軍民己亥直史館范冲上神宗實錄考異庚子詔翰林學士孫近胡交修類編臣僚條具利害章疏以聞甲辰調湖南路上供三年是月僞齊商元寇信陽軍守臣舒繼明被擒死之閏月乙巳朔雨雪丁未胡松年罷戊申雪己酉留四川上供銀帛就充軍費乙卯以孟庾沈與求並兼樞密院事丙辰併諸路提舉常平入茶鹽司罷福建鑄錢令轉運坑冶司辦集丁巳撒離曷欲犯秦州吳玠遣部將牛皓伺之遇于瓦五谷戰死癸亥海賊陳感犯雷州官軍屢敗丁卯王

璣罷命戶部尙書章誼措置財用孟庚提領號總制司命川陝宣撫司幕僚攝司事權仍節制軍馬戊辰
置路分總管以處閑退武臣辛未復置宗正丞掌修屬籍再蠲荆南府歸峽二州荆門公安二軍歲貢上
供二年三月甲戌朔以王璣貪縱不武敗師誤國責授濠州團練使丙子遣樞密計議官呂用中等分使
兩浙江東西路檢察經總制司財用丁丑詔侍從至監察御史館職已上在內館職在外侍從官監司帥
守各舉所知充監司守令尋命館職專舉縣令己卯以韓世忠兼鎮江府宣撫使劉光世兼太平州宣撫
使壬午以都督府參議軍事邵溥兼權川陝宣撫副使罷御前軍器所提舉官併隸工部壬辰命廣東福
建路招捕朱聰乙未初權鉛錫張浚親討湖賊丁酉復移浙西安撫司于臨安府庚子罷饒州牧馬監夏
四月丙午貴池縣丞黃大本在法臧杖脊刺配南雄州丁未遣司農丞蓋諒持詔撫諭川陝召解潛赴
行在王彥知荆南府諸鎮撫使至是盡罷戊申太廟神主至自温州己酉以審量濫賞追左銀青光祿大
夫王序入官及職名仍改正出身庚戌詔內侍遇特恩轉官止武功郎壬子訪得周後柴叔夏襲封崇義
公戊午奉安太廟神主己未更免役保正長法甲子太上皇帝崩于五國城丙寅帝卽射殿行朝獻景靈
宮之禮始以惠恭皇后祔祭奠民耕營田官給牛種庚午省四川添差官辛未以諸路稅賦畸零增收錢
專充上供是月龍圖閣直學士致仕楊時卒五月乙亥初謁太廟庚辰命邵溥吳玠裁省四川冗官浮費

辛巳名行宮新作書院爲資善堂遣何鮮等奉使金國通問二帝中書舍人胡寅言國家與金世讐無通使之義張浚奏使事兵家機權後將闕地復土終歸於和未可遽絕乃遣行丁亥立殘破州縣守令勸民墾田及拋荒殿最格己丑以孟庾知樞密院事壬辰召張浚還行在丁酉詔浚提舉詳定一司勅令戊戌以貴州防禦使瑗爲保慶軍節度使封建國公徽猷閣待制范冲兼資善堂翊善起居郎朱震兼讚讀以盛暑命監司行部慮囚己亥岳飛軍次鼎州庚子周十隆降辛丑命川陝訪求元祐黨人子孫六月甲辰封武經大夫令砮爲安定郡王湖賊楊欽全琮劉詵相繼率衆詣岳飛降乙巳名新麻曰統元丁未併饒州鑄錢司于處州己酉命建國公瑗出就資善堂聽讀拜范冲朱震出內帑錢賜宗室貧者壬子復省淮南州縣冗官癸丑以久旱減膳祈禱禁諸路科率自租稅和市軍須外皆罷岳飛急攻湖賊水砮賊將陳瑨降楊太赴水死餘黨劉衡等皆降飛急擊夏誠斬之丁巳湖賊黃誠斬楊太首挾鍾子儀周倫詣都督府降湖湘悉平得戶二萬七千悉遣歸業戊午減福建貢茶歲額之半庚申以旱罷諸路檢察財用官丁卯以賊平免沿湖民前二年逋租己巳罷福建諸州槍仗手秋七月壬申朔以仇愈爲沿海制置使甲戌免蘄州上供及租稅三年戊寅獎諭岳飛撫勞將士趣張浚還朝己卯孟庾罷以沈與求兼樞密院事及措置財用壬午以金軍虜州隸襄陽府路僞齊兵寇湖陽縣執唐州守臣高青復釋之丁亥賜宇文虛

中家福建田十頃甲午詔殘破州縣親民官計到罷之日戶口考殿最韓世忠復鎮淮軍高僞齊守王拱
丙申蠲湖南路上供米三年及秋租之半丁酉置高峯王口二砦都巡檢使益兵戍之八月壬寅朔罷荆
南營田司令安撫司措置官兵耕種甲辰定館職額爲十八員壬子詔淮南山水砦都巡檢各聽守令節
制癸丑蠲福建州軍借撥常平錢米己未下詔示章惇蔡卞誣誣宣仁聖烈皇后之罪追貶惇昭化軍節
度使卞單州團練副使子孫不許在朝命廣宮學教內外宗子辛酉詔淮南襄陽府等路團結民社丙
寅以諸盜平滅湖廣江西二十二州雜犯死罪釋徒杖以下囚海賊朱聰降命補水軍統領是月僞齊陷
光州九月辛未朔罷總制司所增收頭子等諸色錢乙亥賜禮部進士汪洋以下二百二十人及第出身
唱名始遵典故令館職侍立殿上壬午加岳飛檢校少保僞齊兵寇固始縣統領華旺拒戰却之尋復光
州甲申命沿海州軍籍海舶分守要害乙酉趙鼎上重修神宗實錄壬辰詔元符上書邪等范柔中等二
十七人各官一子以解濟部兵三千隸馬軍司甲午周十隆復叛犯汀州戊戌遣統領王進李貴討之冬
十月庚戌張浚入見乙卯以席益爲四川制置大使位宣撫副使上州軍兵馬並隸大使司邊防重事仍
令宣撫司處置李綱爲浙西制置大使呂頤浩爲湖南制置大使戊午詔川陝類試合格第一人依殿試
第三人例推恩餘並同賜進士出身特奏名進士命宣撫選官試時務策澧州賊雷德進降乙丑僞齊兵

寇漣水軍韓世忠遣統制呼延通等逆擊敗之十一月庚午朔初置節度使以下金字牙符命都督府掌之給將帥立戰功者命州縣賣戶帖以助軍費癸酉詔守臣死節昭著者毋限品秩並賜諡乙亥徵和靖處士尹焞于涪州命爲崇政殿說書戊寅郊辛巳復置淮南提舉鹽事官壬午出宮女三千人甲申權減宰執及行在官吏奉乙酉以趙開爲四川都轉運使丙戌命張浚視師荆襄川陝戊子知衡州裴廩坐調夫築城凍死二千餘人除名嶺南高州編管乙未出內帑綿絹賜宗室丁酉罷催稅戶長十二月己亥朔以岳飛爲荆湖南北襄陽府路蘄黃州招討使楊沂中權主管殿前司併統神武中軍庚子改神武四軍及巡衛軍號行營五護軍辛丑以都督府兵隸三衙命左右司樞密院檢詳官參考中興已行條例修爲定法乙巳禁服用翠羽己酉免侍從官輪對庚戌汰橫江水軍三之一癸丑命兩淮川陝荆襄荆南諸帥府參謀官各一員提點屯田癸亥禁川陝州縣官悉用川陝人丙寅都督府遣參議軍事子羽主管機宜文字熊彥詩撫諭川陝且察邊備虛實戊辰夜雨雹

六年春正月辛未蠲貧民戶帖錢之半無物產者悉除之癸酉命給事中中書舍人甄別元祐黨籍乙亥以內重外輕命省臺寺監及監司守令居職及二年者許更迭出入除擢丁丑詔凡入粟補官者毋授親民刑法之職壬午賜宗子伯玖名璩爲和州防禦使罷綿州宣撫副使命吳玠專治兵事罷御史平反刑

獄賞丙戌張浚視師荆襄入辭己丑安定郡王令在薨庚寅還預借坊場錢辛卯監司帥臣慢令失職者令張浚黜陟以聞甲午振江湖福建浙東饑民命監司帥臣分選僚屬及提舉常平官躬行檢察戊戌命霽通直郎闍門宣贊舍人以下官二月庚子以諸路宣撫制置大使並兼營田大使宣撫副使招討安撫使並兼營田使壬寅雨雪改江淮屯田爲營田甲辰置行在交子務印交子錢引給諸路令公私同見錢行用戊申岳飛入見復以襄陽府路爲京西南路辛亥詔張浚暫赴行在奏事甲寅以兵部尙書都督府參謀折彥質簽書樞密院事乙卯韓世忠引兵攻宿遷縣統制呼延通與金兵戰敗之禽其將孛堇牙合澧州賊徒伍俊殺雷德進持其首詣鼎州降丙辰韓世忠圍淮陽軍復置諸路市易務戊午命楊沂中以兵萬人聽都督行府調遣己未遣戶部侍郎劉盩止如鎮江府總領三宣撫司錢糧辛酉兀朮救淮揚韓世忠引兵歸楚州壬戌以折彥質兼權參知政事癸亥沈與求罷李綱入見是月張浚至江上會諸將議事命張俊進屯盱眙三月戊辰朔初收官告綾紙錢名均房州民兵曰保勝又命招刺三千人賜名必勝軍己巳以韓世忠爲京東淮東路宣撫處置使岳飛爲京西北路宣撫副使辛未蠲旱傷州縣民積欠錢帛租稅己卯趣岳飛如鄂州措置軍事辛巳以樞密副都承旨馬擴爲沿海制置副使壬午金齊兵犯漣水軍韓世忠擊敗之壬辰寬四川災傷州縣戶帖錢之半夏四月戊戌朔湖南賊黃旺犯桂陽監甲

辰僞齊兵陷唐州團練判官扈舉臣推官張從之等皆死岳飛以母喪去官丙午詔飛起復己酉詔文武臣僚能決勝彊敵恢復境土者賜功臣號庚戌始訓諸宗子名甲寅賞淮陽功呼延通等進官有差餘受賞者凡萬七千人劉光世遣副統制王師晟鄺瓊襲僞齊兵于劉龍城破之禽其統制華知剛己未命福建安撫司發水軍討海賊鄭慶辛酉禁四川伐並邊山林甲子以韓世忠爲橫海武寧安化軍節度使號揚武翊運功臣除商旅緡錢稅丙寅復行在官吏奉蠲東京民渡淮南商販之稅五月戊戌朔禁以鹿胎爲冠癸酉詔未經上殿臣僚先令三省審察然後引對戊寅以四川監司地遠玩法應有違戾令制置大使按劾壬午詔大理寺議獄不合卽詣刑部關決刑部不能定同赴都堂稟議賜吳玠四川戶帖錢十萬緡犒軍癸未禁淮南州縣收額外雜色租乙酉改交子爲關子罷交子務庚寅以劉光世爲保靜寧武寧國軍節度使壬辰以張俊進屯盱眙改崇信奉寧軍節度使甲午禁銷錢及私鑄銅器丙申詔監司慮囚不能徧及者聽遣官著爲令六月乙巳朔夜地震己酉求直言甲寅張浚渡江撫淮上諸屯命劉光世自當塗進屯廬州岳飛自九江進屯襄陽楊沂中屯泗州戊午詔兩淮沿江守臣並以兩三年爲任辛酉封集英殿修撰令扈爲安定郡王秋七月壬申以司農少卿樊賓提領營田公事癸未詔張浚暫赴行在癸巳罷川陝便宜差遣監司守貳以金州隸川陝路均房二州隸京西南路郭浩爲永興軍路經略安撫使

兼知金州閤門宣贊舍人邵隆知商州聽浩節制經理商號是月劉光世復壽春府八月己亥范宗尹薨
庚子賜左司諫陳公輔三品服癸卯以徽猷閣直學士李迨爲四川都轉運使甲辰詔諭將士將親征岳
飛遣統制牛皋破僞齊鎮汝軍禽其守薛亨乙巳命權殿前司解潛等帥精兵扈從主管步軍司邊順留
兵守臨安知臨安府梁汝嘉爲巡幸隨軍都轉運使丁未以秦檜爲醴泉觀使兼侍讀行宮留守孟庾提
舉萬壽觀兼侍讀同留守戊申岳飛遣將楊再興復西京長水縣己酉命秦檜孟庾權參決尙書省樞密
院事庚戌蠲虔州殘破諸縣逋負梅州夏秋兩稅聽廣東經略安撫司便宜措置盜賊辛亥奉神主發臨
安丁巳權罷經筵進講己未預借江浙民來年夏稅絕帛折米輸官庚申增給職事官米月三斛是月張
浚城盱眙進屯泗州岳飛及僞齊李成孔彥舟連戰至蔡川克之僞守劉永壽舉城降九月丙寅朔帝發
臨安岳飛遣統制王貴郝晷董先復虢州盧氏縣癸酉帝次平江戊寅命職事官日一員輪對壬午岳飛
以孤軍無援復還鄂州癸未權奉安神主于平江能仁寺戊子以戶部郎官霍蠡總領岳飛軍錢糧庚寅
張浚入奏復如鎮江辛卯立賊徒相招首罪賞格賞鎮淮軍功進統制王德等官是月劉豫聞親征告急
于金主賣求援賣不許豫自起兵三十萬命子麟趣合肥姪猊出渦口引兵分道入寇冬十月丙申招西
北流寓人補闕額禁軍丁酉裁定淮南路租額劉麟寇淮西張浚遣楊沂中張宗顏等分兵禦之戊戌沂

中至濠州劉光世已棄廬州而南浚遣人督還光世不得已駐兵應沂中遣統制王德鄴瓊及賊將崔阜賈澤王遇戰皆敗之賊兵攻壽春府芍陂砦守臣孫暉拒戰又敗之辛丑罷四川監酒官百餘員壬寅以梁汝嘉兼浙西淮東沿海制置使前護副軍都統制王彥副之癸卯趙鼎請降勅諭張浚令光世沂中及張俊全軍引還爲防江之計甲辰又詔浚督將士僇力破賊皆未達劉猷犯定遠縣沂中進戰大敗之于藕塘猷挺身遁麟在順昌聞之拔砦去劉光世遣王德及沂中追麟至南壽春而還孔彥舟亦解光州圍而去戊申命解潛遣兵千人守青龍港口癸丑張俊楊沂中引兵攻壽春府不克而還乙卯詔諸軍所俘人民給錢米遣歸丁巳惠州軍賊曾衰作亂庚申摧鋒軍統制韓京募敢死士夜襲破之衰尋出降壬戌日中有黑子沒十二月甲午朔詔降廬光濠等州死罪釋流以下囚召秦檜赴行在張浚入見請幸建康趙鼎請還臨安戊戌韓世忠攻淮陽軍及金人戰敗之辛丑城南壽春府壬寅趙鼎罷遣右司員外郎范直方宣諭川陝撫問吳玠將士甲辰命都督府參議軍事呂祉如建康措置移躡丙午折彥質罷丁未賞淮西功加張俊少保改鎮洮崇信奉靈軍節度使楊沂中保成軍節度使殿前都虞候戊申命秦檜赴講筵供職孟庾爲行宮留守辛亥以資政殿學士張守參知政事兼權樞密院事丙辰以呂頤浩爲浙西安撫制置大使判臨安府丁巳以劉光世爲護國鎮安保靜軍節度使戊午詔凡因民事被罪者不許親民

己未命辰沅靖澧四州以閒田募刀弩手三千五百人爲額右司諫陳公輔乞禁程氏學詔士大夫之學宜以孔孟爲師庶幾言行相稱可濟時用庚申以安化郡王王稟死節太原賜其家田十頃辛酉以山陰諸暨等四十縣爲大邑並命堂除

七年春正月癸亥朔帝在平江下詔移蹕建康蠲無爲軍稅役一年置建康御前軍器局丁卯賞張浚以破敵功遷特進己巳發米萬石濟京東陝西來歸之民張浚入見甲戌罷都督府諸州市易官丁丑解潛罷以劉錡權主管馬軍司并殿前步軍司公事庚辰築采石宣化渡二城癸未以翰林學士陳與義參知政事資政殿學士沈與求同知樞密院事詔廣西帥臣訓練士丁保丁乙酉復置樞密使副知院以下仍舊張浚改兼樞密使丙戌禁諸軍互納亡卒西蕃三十八族首領趙繼忠等來歸丁亥以秦檜爲樞密使何鮮范盜之至自金國始聞上皇及寧德皇后崩己丑帝成服下詔降徒囚釋杖以下辛卯夜東北有赤氣如火二月癸巳朔日有食之百官七上表請遵以日易月之制徽猷閣待制知嚴州胡寅請服喪三年衣墨臨戎以化天下帝欲遂終服而張浚連疏論喪服不可卽戎遂詔外朝勉從所請宮中仍行三年之喪丙申太平州火丁酉鎮江府火庚子遣王倫等使金國迎奉梓宮岳飛入見辛丑以日食求直言以久旱命諸州慮囚乙巳詔凡辟舉官犯贓罪罪及所舉官丙午吳玠置銀會子于河池丁未詔席益募陝西

河東河北兵三千部送行在充扈衛癸丑雨雪丙辰始御便殿果州守臣宇文彬等進禾登九穗圖俱奪一官罷之丁巳以岳飛爲太尉湖北京西宣撫使己未帝發平江三月癸亥朔次丹陽韓世忠入見命世忠扈從岳飛次之甲子次鎮江楊沂中入見命沂中總領彈壓巡幸事務己丑蠲駐蹕及經從州縣積年逋賦丁卯以吏部侍郎呂祉爲兵部尙書都督府參謀軍事辛未帝至建康壬申詔尙書省常程事從參知政事分治癸酉減建康流罪以下囚蠲建康府太平宣州逋賦及下戶今年身丁錢岳飛乞併統淮西兵以復京畿陝右許之命飛盡護王德等諸將軍旣而秦檜等以合兵爲疑事遂寢戊寅手詔撫勞將士進沈與求知樞密院事己卯尊宣和皇后爲皇太后庚辰以王彥兵隸侍衛馬軍司呂頤浩爲少保兼行宮留守孟庾罷甲申以劉光世爲少師萬壽觀使以其兵隸都督府張俊因分爲六軍命呂祉節制乙酉賜光世第于建康府丁亥命虔吉南安軍諸縣各募土兵百人責知縣訓練防禦盜賊是春廣西大饑李寶變爲桃夏四月癸巳築太廟于建康以臨安府太廟爲聖祖殿戊戌修濬建康城池丁未岳飛乞解官持餘服遂棄軍去詔不許戊申日中有黑子庚戌以張浚累陳岳飛積慮專在併兵奏牘求去意在要君遂命兵部侍郎兼都督府參議軍事張宗元權湖北京西宣撫判官寶監其軍壬子張浚如太平州淮西視師庚申以信陽軍隸京西路罷淮南提點司東西兩路各置轉運兼提點刑獄提舉茶鹽常平事五月

丁卯詔李綱趣捕虔吉諸盜壬申命禮官舉文宣王武成王熒惑壽星嶽鎮海濱農蠶風雷雨師之祀甲戌以胡安國提舉萬壽觀兼侍讀趣赴行在未至而罷癸未以鄺瓊爲行營左護軍副都統制甲申初試樞密院都督府効士乙酉命侍從官通舉材堪知縣者二十人丙戌僞齊陷隨州己丑禁四川增印錢引六月辛卯朔改上惠恭皇后諡曰顯恭皇后岳飛入見壬辰命歲辰戌月祀大火配以闕伯乙未罷江淮營田司令諸路安撫轉運司兼領其事丙申以重修神宗實錄去取未當命史館復加考訂丁酉岳飛引過自劾詔赦罪慰諭之戊戌命劉錡兼都督府咨議軍事率兵戍廬州乙巳沈與求薨召王德以所部兵赴行在遣呂祉如淮西撫諭諸軍丙辰詔吳玠李迨共議四川經費贍軍恤民岳飛復職秋七月戊辰詔侍從各舉可任監司郡守者一二人癸酉以旱禱於天地宗廟社稷甲戌嗣濮王仲湜薨癸未以久旱命中外臣庶實封冒事甲申蠲諸路民積年逋租以建康疫盛遣醫行視貧民給錢葬其死者命疎決滯獄乙酉詔卽建康權正社稷之位戊子詔戶部長貳迭出巡按諸路考究賦利病違者劾之己丑詔諸路歸業民墾田及八年始輸全稅八月乙未以張俊爲淮西宣撫使駐盱眙楊沂中爲淮西制置使主管侍衛馬軍司劉錡副之並駐廬州命鄺瓊率兵赴行在戊戌瓊叛殺中軍統制張景等執呂祉及趙康直趙不羣以兵四萬人奔劉豫辛丑手詔赦廬州屯駐行營左護軍壬寅鄺瓊引兵至淮殺祉及康直釋不羣

使還劉錡吳錫至廬州以兵追之不及命張宗元往招之張浚乞去位甲辰以趙鼎爲萬壽觀使兼侍讀
甲寅詔命官犯贓刑部不得擅黥配聽朝廷裁斷乙卯賜岳飛軍錢十萬緡招歸正復業人耕湖北京西
閒田九月甲子上太上皇帝諡曰聖文仁德顯孝皇帝廟號徽宗皇后曰顯肅皇后丁卯韓世忠張俊入
見乃命俊自盱眙移屯廬州壬申張浚罷癸酉命參知政事輪日當筆權三省事更不分治常程罷都督
府甲戌以臺諫累疏落張浚觀文殿大學士仍領宮祠丙子復以趙鼎爲尙書左僕射同中書門下平章
事兼樞密使戊寅以廬州壽春府民遭酈瓌虜掠蠲租稅一年己卯朝獻聖祖于常朝殿庚辰朝饗太廟
辛巳合祭天地于明堂大赦召劉光世赴行在戊子禁諸路進羨餘以劉錡知廬州兼淮西制置副使冬
十月庚寅朔詔仍舊開經筵辛卯命後省官看詳上書有可采者條上行之丁酉夜勅張浚安置嶺表戊
戌趙鼎累請浚母老改永州居住僞齊犯泗州守臣劉綱擊走之丙午命戶部郎官薛弼霍蠡同總領江
西湖廣五路財賦壬子統制呼延通王權等襲擊金人于淮陽軍敗之丁巳詔六參日輪行在百官一員
轉對閏月癸亥贈趙康直徽猷閣待制乙丑蠲江東路月椿錢萬緡發米二萬石振京西湖北饑民丙寅
尹焞入見命爲祕書郎兼崇政殿說書甲戌始作徽宗皇帝顯肅皇后神主庚辰韓世忠引兵渡淮逆擊
金人于劉冷莊敗之辛巳李綱罷癸未復漢陽軍是月張俊棄盱眙引兵還建康十一月丙申賜吳玠稿

運錢百五十萬緡丁酉以知温州李光爲江西安撫制置大使丁未金帥擇懶兀朮入汴京執僞齊劉豫廢爲蜀王癸丑詔來春復幸浙西是月僞齊知臨汝軍崔虎詣岳飛降十二月庚辰復置都大提舉四川茶馬監牧官丁卯祔徽宗皇帝顯肅皇后神主于太廟庚午以解潛權主管馬步軍司命韓世忠留屯楚州屏蔽江淮己卯詔內外大將及侍從官舉武臣智略器局堪帥守謀議官者癸未王倫等使還入見言金國許還梓宮及皇太后又許還河南諸州甲申城泗州丁亥復遣王倫等奉迎梓宮是冬吳玠遣裨將馬希仲攻熙州鄭宗李進攻鞏州不克宗死于城下希仲遁還玠斬以徇

宋史卷二十八

宋史卷二十九

元 中 書 右 丞 相 總 裁 脫 職 等 修

本紀第二十九

高宗六

八年春正月戊子朔帝在建康丙申減臨安府夏稅折輸錢戊戌張守罷辛丑僞齊知壽州宋超率兵民來歸蔡州提轄白安時殺金將兀魯執其守劉永壽來降詔以方議和好禁沿海州郡遣人過淮招納丁未大閱張俊軍戊申以兵部侍郎胡世將爲四川安撫制置使二月戊午劉錡入見減建康府夏稅折輸錢蠲民戶逋租和市科調庚申日中有黑子以呂頤浩爲江東安撫制置大使兼行宮留守壬戌岳飛乞增兵不許癸亥帝發建康丙寅以胡安國春秋傳成書進寶文閣直學士戊寅帝至臨安己卯以戶部尙書章誼爲江東安撫制置大使兼行宮留守呂頤浩爲醴泉觀使甲申減紹興府和市絹萬匹三月己丑以知南外宗正事仲偁嗣濮王庚寅以禮部尙書劉大中參知政事兵部尙書王庶爲樞密副使壬辰復以秦檜爲尙書右僕射同中書門下平章事兼樞密使甲午陳與義罷戊戌增夔州路分都監一員脩治關隘練義兵己亥蠲農器及牛稅以李天祚爲靜海軍節度使交趾郡王壬寅定以故相韓忠彥配享

徽宗廟廷丁未蠲所過州縣民積欠稅賦戊申蠲江西湖南諸州月椿錢各萬緡己酉命考覈川陝宣撫司便宜所授官冒濫尤甚者悉與裁減夏四月庚申初置戶部和糴場于臨安壬戌遣王庶巡視江淮邊防丁丑復置六路發運司癸未詔三衙管軍輪宿禁中五月庚戌詔鎮江府募橫江軍千人竄內侍羅竄于海島庚子禁貧民不舉子其不能育者給錢養之壬寅貶劉子羽爲單州團練副使漳州安置丁未金國使烏陵思謀石慶充與王倫等偕來戊申以資政殿學士葉夢得爲江東安撫制置大使己酉王庶至淮南檄張宗顏將兵七千屯廬州巨師古三千屯太五州分韓世忠軍屯泗州及天長縣六月壬戌賜衍聖公孔玠衢州田五頃奉先聖祠事癸亥趙鼎上重修哲宗實錄壬申賜禮部進士黃公度以下三百九十五人及第出身王庶自淮南還入見乙亥以中護軍統制張宗顏知廬州命劉錡率兵移屯鎮江府丁丑烏陵思謀石慶充入見秋七月乙酉朔復命王倫及藍公佐奉迎梓宮錄司馬光曾孫仍補承務郎辛亥誓出東方八月戊午詔日者遣使報聘鄰國期還梓宮尙慮邊臣未諭遂弛戎備以疑衆心其各嚴飭屬城明告部曲臨事必戒無忘捍禦甲子蠲江東路月椿錢萬三千緡有奇丁丑誓減監察御史李霖宣諭江西措置盜賊冬十月丁巳劉大中罷甲戌趙鼎罷乙亥日中有黑子丁丑金國使張通古蕭哲與王倫偕來韓世忠乞奏事行在不許戊寅樞密副使王庶乞免簽書和議文字累疏求去不許十一月甲

申以翰林學士承旨孫近參知政事丙戌遣大理寺丞薛偉朱斐詣廣南路決滯獄戊戌王倫入見己亥復以倫爲國信計議使中書舍人蘇符副之符辭以疾庚子以孫近兼權同知樞密院事辛丑詔金國遣使入境欲朕屈己就和命侍從臺諫詳思條奏從官張燾晏敦復魏疇曾開李彌遜尹焞梁汝嘉樓炤蘇符薛徽言御史方廷實皆言不可甲辰王庶罷辛亥以樞密院編修官胡銓上書直諫斥和議除名昭州編管壬子改差監廣州都鹽倉十二月甲寅以趙鼎爲醴泉觀使乙卯以宗正少卿馮楫爲國信計議副使己未以吏部尙書李光參知政事戊辰王倫言金使稱詔諭江南其名不正秦檜以未見國書疑爲封冊帝曰朕嗣守祖宗基業豈受金人封冊癸酉館職胡瑄朱松張擴凌景夏常明范如圭上書極論不可和甲戌以端明殿學士韓肖胄簽書樞密院事乙亥命肖胄等爲金國奉表報謝使丙子張通古蕭哲至行在言先歸河南地徐議餘事以監察御史施廷臣爲侍御史權吏部尙書張燾侍郎晏敦復以廷臣主和議而升用執奏不行御史中丞勾龍如淵右諫議大夫李誼殿中侍御史鄭剛中凡再至都堂及宰執議取國書丁丑詔金國使來盡割河南陝西故地通好于我許還梓宮及母兄親族餘無需索令尙書省榜諭庚辰帝不御殿以方居諒陰難行吉禮命秦檜攝冢宰受書以進是月虛恨蠻犯嘉州忠鎮若是歲始定都于杭

九年春正月壬午朔帝在臨安丙戌以金國通和大赦河南新復州軍官吏並不易置蠲其民租稅三年
舊役五年以王倫同簽書樞密院事充奉護梓宮迎請皇太后交割地界使戊子遣判大宗正事士優兵
部侍郎張燾詣河南修奉陵寢庚寅賜劉光世號和衆輔國功臣張俊加少傅安民靖難功臣韓世忠爲
少師張浚復左宣奉大夫辛卯以尹焞爲徽猷閣待制提舉萬壽觀兼侍讀焞力辭不拜壬辰加岳飛吳
玠並開府儀同三司楊沂中太尉癸巳建皇太后宮甲午金宿州守臣趙榮來歸丙申金主詔諭河南諸
州以割地歸我之意改發運經制司爲經制司命戶部長貳一人領使仍置副或判官戊戌以王倫爲東
京留守郭仲荀爲副戶部侍郎梁汝嘉兼江淮荆浙閩廣路經制使司農卿霍蓋爲判官己亥以吳玠爲
四川宣撫使二月癸丑以徽猷閣待制周聿爲陝西宣諭使監察御史方廷實宣諭三京淮北丁巳以郭
仲荀爲太尉東京同留守慕容涪寇環州戊午以知金州郭浩爲陝西宣撫判官壬戌以李綱爲湖南路安
撫大使張浚知福州尋復資政殿大學士爲福建路安撫大使命周聿方廷實蒐訪隱士甲子均定諸州
縣月椿錢己巳以郭浩爲陝西宣諭使壬申命修徽宗實錄癸酉詔盜賊已經招安而復嘯聚者發兵加
誅毋赦是月日中有黑子月餘乃沒江西統制官李貴以其軍歸楊沂中三月丁亥以和州防禦使璩爲
保大軍節度使封崇國公丙申王倫受地于金得東西南三京壽春宿亳曹單州及陝西京西之地兀朮

遷邢州己亥分河南爲三路廢拱州辛丑以翰林學士樓炤簽書樞密院事甲辰僞齊知開封府鄭億年上表待罪召赴行在丁未正僞齊所改州縣名是春夏人陷府州夏四月庚戌朔呂頤浩薨辛亥命樓炤宣諭陝西諸路壬午金郵延路經略使關師古上表待罪命知延安府癸丑落趙鼎奉國軍節度使爲特進仍知泉州金陝西諸路節制使張中孚上表待罪命爲檢校少保靈國軍節度使知永興軍節制陝西諸路軍馬甲子以觀文殿學士孟庾爲西京留守資政殿學士路允迪南京留守丙寅金秦鳳經略使張中彥上表待罪命知渭州以孫近兼權同知樞密院事壬申移壽春府治淮北舊城癸酉詔新復諸路監司帥臣按劾官吏之殘民者韓世忠張俊入見五月庚寅奉迎東京欽先孝思殿累朝御容赴臨安辛卯復命江淮守臣二年爲任乙未復置淮東提舉茶鹽司癸卯復召募耆長法丙午郵延副將李世輔部兵三千自鳳翔來歸賜名顯忠六月庚戌皇后邢氏崩于五國城辛亥夏國主乾順卒壬子樓炤以東京見卒四千四百人爲忠銳三將庚申盜入邵武軍壬戌以新復州縣官吏懷不自安降詔開諭己巳吳玠薨壬申樓炤承制以李顯忠爲護國軍承宣使樞密行府前軍都統制率部兵及夏國招撫使王樞赴行在癸酉澧州軍事推官韓紉坐上書論講和非計送循州編管乙亥以孟庾兼東京留守王倫自東京赴金國議事樓炤承制以楊政爲熙河經略使吳璘爲秦鳳經略使仍並聽四川宣撫司節制郭浩爲郵延經

略使同節制陝西軍馬丙子分宣撫司兵四萬人出屯熙秦六千人隸郭浩留吳玠精兵二萬人屯興元府興洋二州戊寅置錢引務于永興軍是月撫州鈐轄伍俊謀據桃源復叛湖北安撫薛弼召誅之秋七月甲申以文臣爲新復諸縣令丙戌東京耆老李茂松寇璋等二百人奉表稱賀皆引見補官遣還復置都水南北丞各一員丁亥金人拘王倫于中山丙申命詳驗劉豫僞官換給告身乙巳給還僞齊所沒民間資產以胡世將兼權主管四川宣撫司八月己酉復淮南諸州學官庚戌賜陝西諸軍冬衣絹十五萬匹命前川陝宣撫司便宜所補官限一年自陳換給告身丙辰金國以撻懶主和割地疑其二心殺之壬戌蠲成都潼川路歲輸對糶等米五十四萬石水運錢七十九萬緡乙丑給新法度牒紫衣師號錢二百萬緡付陝西市軍儲己巳命復陝西復行鐵錢庚午遣蘇符等使金賀正旦乙亥前知宿州趙榮知壽州王威俱還金國以關師古爲行營中護軍前軍統制九月己卯命郵延秦鳳熙河路招納蕃部熟戶及陷沒夏國軍民丙戌封叔士儂爲齊安郡王庚寅罷經制司令提刑兼領常平事甲午名皇太后殿曰慈寧丙申以威州防禦使溫濟告韓世忠陰事勒停南建州編管世忠又奏欲殺之詔移萬安軍己亥郭仲荀率東京兵五千至鎮江冬十月辛亥詔侍從官各舉所知二人王倫見金主于御林子被拘于河間遣其副藍公佐先歸甲寅王樞入見併其俘百九十人皆縱遣還夏國己未蠲階成岷鳳四州民稅之半戊辰

慈寧宮成甲戌日中有黑子丙子賜李顯忠軍錢十萬緡是月岳飛入見十一月戊寅朔賜吳玠家錢三萬緡以其弟璘爲龍神衛四廂都指揮使申命刑部大理官編次刑名斷例癸未嗣濮王仲偁薨己丑詔三省官屬詳覆在京通用令追復張所爲直龍圖閣十二月甲寅命續編紹興因革體甲子李光罷戊辰命續修元豐會要元朮留蘇符等于東京謀復取河南

十年春正月丙戌遣莫將等充迎護梓宮奉迎兩宮使辛卯李綱薨甲辰以顯謨閣直學士提舉醴泉觀鄭億年復資政殿學士奉朝請二月戊申命陝西復募蕃漢弓箭手詔賊吏罪抵死情犯甚者奏取旨辛亥兩雹以劉錡爲東京副留守李顯忠南京副留守壬子命兩宗正官各舉所知宗室二人癸丑展省試期一年壬戌詔新復州軍蒐舉隱逸諸路經理屯田丁卯罷史館以日麻歸祕書省置監修國史官以孟庾知開封府爲東京留守仇愈知河南府西京留守癸酉罷吏部審量宣和濫賞三月甲申封闕伯爲商巨宣明王戊子增印錢引五百萬緡付宣撫司市軍儲川陝宣撫副使胡世將屢言金人必渝盟宜爲備己丑罷諸路增置稅場韓世忠張俊入見始罷內教復營建康行宮丙申蘇符自東京還丁酉命川陝宣撫司軍事不及待報者聽隨宜措置己亥以郭浩知永興軍兼節制陝西諸路軍馬楊政徙知興元府是月命胡世將與夏人議入貢夏人不報夏四月丙午訪求亡逸麻書及精於星麻者辛酉以張中孚爲醴

泉觀使中彥提舉祐聖觀趙彬爲兵部侍郎癸亥命部使者歲舉廉吏一人庚午復四川諸州學官壬申韓肖胄罷五月己卯金人叛盟兀朮等分四道來攻甲申名徽宗御制閣曰敷文乙酉兀朮入東京留守孟庚以城降知興仁府李師雄知淮寧府李正民及河南諸州繼降丙戌金人陷拱州守臣王慥死之撤離曷自河中趨永興軍陝西州縣官皆降丁亥金人陷南京留守路允迪降劉錡引兵至順昌府己丑金人陷西京留守李利用副總管孫暉皆棄城走鈐轄李興率兵拒戰不克辛卯胡世將自河池遣涇原經略使田晟以兵三千人迎敵金人京湖宣撫司忠義統領李寶敗金人于興仁府境上癸巳知亳州王彥先叛降于金金人陷永興軍趨鳳翔丁酉命胡世將移陝西之右護軍還屯蜀口以福建廣東盜起命兩路監司出境共討己亥命劉光世爲三京招撫處置使以援劉錡庚子以吳璘同節制陝西諸路軍馬聽胡世將便宜黜陟處置軍事辛丑金人犯鳳翔府之石壁砦吳璘遣統制姚仲等拒卻之金人圍耀州郭浩遣兵救之金兵解去壬寅金人圍順昌府三路都統葛王褒以大軍繼至劉錡力戰敗之六月甲辰朔以韓世忠太保張俊少師岳飛少保並兼河南北諸路招討使乙巳劉錡遣將閻充戰敗金人于順昌之李村丙午命兩浙江東福建諸州團結弓弩手以仇愈爲沿海制置使詔將佐士卒能立奇功者賞以使相節鉞官告臨軍給受丁未罷建康府行宮營繕戊申以劉錡爲沿海制置使己酉吳璘遣統制李師顏

等戰敗金人于扶風拔之壬子兀朮及宋叛將孔彥舟酈瓊趙榮等帥衆十餘萬攻順昌府劉錡率將士殊死戰大敗之初秦檜奏命錡擇利班師錡不奉詔戰益力遂能以寡勝衆乙卯順昌圍解兀朮還以知平江府梁汝嘉兼浙西沿海制置使丙辰岳飛將牛皋及金人戰于京西敗之己未劉光世進軍和州郭浩遣統制鄭建充攻破金人于醴州復其城壬戌詔諸司錢物量留經費外悉發以贍軍樓炤以艾喪去位甲子撒離曷攻青谿嶺鄜延經略使王彥率兵戰敗之撒離曷還屯鳳翔命士儂主率濮王祠事張俊遣左護軍都統制王德援劉錡德暫至順昌值圍已解復還廬州遣司農少卿李若虛詣岳飛軍諭指班師飛不聽丙寅下詔撫諭順昌府官吏兵民庚午以劉錡爲武泰軍節度使侍衛馬軍都虞候韓世忠遣統制王勝背鬼將成閔率兵至淮陽軍南與金人遇擊敗之是月金人圍慶陽府權守臣宋萬年固守金人不能下岳飛領兵援劉錡與金人戰于蔡州敗之復蔡州閏月癸酉朔張俊遣統制宋超敗金人于永城縣朱家村甲戌追孟庾路允迪官徙家屬遠郡丙子詔三衙管軍及觀察使已上各舉智略勇猛材堪將帥者二人金人犯涇州守臣曲汲棄城去經略使田晟率兵來救金人敗走甲申晟及金人再戰于涇州敗之金人引歸鳳翔乙酉降陝西雜犯死罪釋流以下囚丙戌以胡世將爲端明殿學士吳璘爲鎮西節度使楊政武當節度使郭浩奉國節度使王德攻金人于宿州夜破之降其守馬秦丁亥詔釋順昌府

流以下囚再復租稅二年守禦官吏進官一等己丑永興軍鈐轄傅忠信等與金人戰于華陰縣敗之王
辰岳飛遣統制張憲擊金將韓常于潁昌府敗之復潁昌丙申張憲復淮寧府丁酉趙鼎分司興化軍居
住岳飛遣統制郝晟等與金人戰于鄭州北復鄭州李興復汝州與金人戰于河清縣敗之復伊陽等八
縣李成遁去韓世忠遣統制王勝王權攻海州克之執其守王山戊戌張俊率統制宋紹等及王德兵會
于城父縣酈瓊及葛王褒遁去遂復亳州己亥金人救海州王權等逆戰敗之復懷二縣庚子張俊棄亳
州引軍還壽春再貶趙鼎漳州居住又貶清遠軍節度副使潮州安置秋七月癸卯岳飛遣將張應韓清
入西京會李興復永安軍丙午以御史中丞王次翁參知政事己酉岳飛及兀朮戰于郾城縣敗之庚戌
曲赦海州永興軍統領辛鎮及金人戰于長安城下敗之癸丑以楊沂中爲淮北宣撫副使劉錡爲判官
甲寅岳飛遣統制楊再興王蘭等擊金人于小商橋皆戰死乙卯金人攻潁昌岳飛遣將王貴姚政合兵
力戰敗之壬戌飛以累奉詔班師遂自郾城還軍皆潰金人追之不及潁昌蔡鄭諸州皆復爲金有甲子
以釋奠文宣王爲大祀乙丑增收州縣頭子錢爲激賞費金人圍淮寧府趙秉淵棄城南歸辛未金人犯
盩厔縣王俊逆戰于東洛谷卻之八月壬申朔以張九成喻樛陳剛中凌景夏樊光遠毛叔度元盥等七
人嘗不主和議皆降黜之乙亥韓世忠圍淮陽軍不克庚辰金人及酈瓊合兵駐于千秋湖陵韓世忠遣

統制劉寶等夜襲破之壬午李成犯西京李興擊卻之楊沂中軍于宿州丙戌以郭浩知慶州丁亥楊沂中自宿州夜襲柳子鎮軍潰遂自壽春府渡淮歸金人屠宿州甲午川陝宣撫司統領王喜等遇金人于汧陽縣敗之九月壬寅朔遣起居舍人李易諭韓世忠罷兵時秦檜專主和議諸大帥皆還鎮丁未楊政遣統制楊從儀夜襲金人于鳳翔府敗之戊申金人復入西京李興棄城去庚戌合祀天地子明堂大赦辛酉臨安火戊辰以郭浩知金州節制陝西河東軍馬兼措置河東忠義軍是秋知代州王忠植舉兵復石代等十一州冬十月癸酉復張浚觀文殿大學士甲戌以王忠植爲建寧軍承宣使河東路經略安撫使戊寅秦檜上重修紹興在京通用敕令格式庚辰金人犯慶陽府守臣宋萬年以城降辛卯金人犯陝州吳琦率兵迎擊敗之庚子金人襲洮州攻鐵城堡統制孔文清惠逢擊敗之是月劉錡入見胡世將命王忠植救慶陽叛將趙惟清執之降于金忠植不屈而死十一月丁未金將合喜復犯陝州吳琦擊卻之又犯寶雞縣統制楊從儀敗之壬子以令廡爲保寧軍節度使是月宜章洞民駱科叛犯桂陽郴道連賀諸州命發大兵討之十二月壬午上皇太后冊寶于慈寧殿丁亥贈王忠植奉國軍節度使諡義節辛卯起諸路耆長役錢隸總制司專給軍用是月楊沂中引兵還行在

十一年春正月癸卯鳳翔統制楊從儀敗金人于渭南庚戌張浚入見乙卯金人犯壽春府守臣孫暉統

制雷仲合兵拒之丁巳壽春陷暉仲棄城去己未劉錡自太平州率兵二萬援淮西庚申金人渡淮辛酉
雨雹乙丑劉錡至廬州還丙寅兀朮陷廬州戊辰金人陷商州守臣邵隆棄城去己巳命楊沂中引兵赴
淮西岳飛進兵江州二月癸酉張浚遣王德渡江屯和州金人退屯昭關邵隆破金人于洪門復南商乙
亥金人復來爭和州張浚敗之命韓世忠以兵援淮西丙子趣岳飛會兵蘄黃王德等敗金人于含山縣
東己卯統制關師古李橫擊敗金人于巢縣復之庚辰岳飛發鄂州辛巳知秦州王喚兼通秦二州制置
使癸未王德田師中等擊破金人復含山縣奪昭關劉錡自東關擊敗金人于青谿甲申金人復犯昭關
王德等又敗之李顯忠遣統領崔阜擊敗金人于舒城縣丁亥楊沂中劉錡等大敗兀朮軍于柘阜己丑
兀朮親率兵逆戰于店步沂中等又敗之乘勝逐北遂復廬州是月虔吉州盜賊悉平三月庚子朔張浚
進鬻田及賣度牒錢六十三萬緡助軍用壬寅韓世忠引兵趨壽春癸卯復張浚特進金人圍濠州岳飛
發舒州甲辰張浚楊沂中劉錡議班師乙巳沂中錡先行浚以輕兵留後丙午詔釋淮西雜犯死罪以下
囚丁未金人陷濠州執守臣王進夷其城鈐轄邵青死之戊申張浚遣楊沂中王德入濠州遇金伏兵敗
還己酉韓世忠至濠州不利而退辛亥岳飛次定遠縣聞金兵退還屯舒州楊沂中歸行在壬子金人渡
淮北歸癸丑張浚歸建康府丁巳劉錡歸太平州甲子行營統制張彥及金人遇于汧陽之劉坊砦第八

將張宏戰沒夏四月丙子復收免行錢己卯孫近罷辛巳以王次翁兼樞同知樞密院事韓世忠張浚岳飛相繼入覲壬辰以世忠浚並爲樞密使飛樞密副使命三省樞密院官復分班奏事乙未張浚請以所部兵隸御前罷三宣撫司改統制官爲御前統制官各屯駐舊所丙申以廣西經略使胡舜陟節制廣東湖南兵趣討駱科慕洧破新泉砦又攻會州將官朱勇破之五月辛丑置兩淮江東西湖廣京西三道總領軍馬錢糧官仍掌報發御前軍馬文字癸卯賻恤戰沒將士丁未遣張浚岳飛于楚州巡視邊防召劉光世赴行在甲寅命樞密行府置司鎮江令徧行巡歷措置庚申加楊沂中檢校少保開府儀同三司六月乙亥遣尅敵弓加秦檜特進尙書左僕射同中書門下平章事兼樞密使癸未張浚岳飛至楚州浚以海州城不可守毀之遷其民統韓世忠軍還鎮江惟背嵬一軍赴行在甲申知河南府李興部兵至鄂州以興爲左軍統制乙丑明州僧王法恩等謀反伏誅壬辰劉光世罷爲萬壽觀使秋七月戊戌秦檜上徽宗實錄進修撰以下各一官庚子以翰林學士范同參知政事以旱減膳祈禱遣官決滯獄出繫囚丁未加秦檜少保甲寅罷劉錡兵命知荆南府乙卯詔優獎永興鳳翔秦隴等州縣官到任半年減磨勘任滿遷一官己未加張浚太傅癸亥大雨是月命張浚復如鎮江措置軍務留岳飛行在八月戊辰立祚德廟于臨安祀韓厥甲戌罷岳飛乙亥命諸王後各推年長一人權主祀事癸巳胡世將起復九月癸卯命

軍器少監鮑瑒如鄂用根括宣撫司錢穀鄂州前軍副統制王俊告副都統制張憲謀據襄陽爲變張浚收憲屬吏以聞丁未坐監司不按賊吏罪辛亥吳璘拔秦州州將武誼降壬子璘率姚仲及金人戰于丁劉圍敗之楊政克隴州破岐下諸屯郭浩復華州入陝州甲寅建康大火丙申遣劉光遠等充金國通問使吳璘及金人戰于剡家灣大敗之遂圍臘家城癸亥璘自臘家城受詔班師楊政郭浩皆引軍還乙丑邵隆復虢州郝最討禽駱科斬之冬十月丙寅朔金人陷泗州遂陷楚州丁卯命樞密都承旨鄭剛中宣諭川陝戊辰楊政及金人戰于寶雞縣敗之禽通檢字堇乙亥兀朮遣劉光遠等還戊寅詔修玉牒下岳飛張憲大理獄命御史中丞何鑄大理卿周三畏鞫之壬午遣魏良臣王公亮爲金國稟議使乙酉虛恨蠻主厯階詣嘉州降癸巳韓世忠罷爲醴泉觀使封福國公是月金人陷濠州邵隆復陝州十一月己亥范同罷責降李光爲建寧軍節度副使滕州安置辛丑兀朮遣審議使蕭毅邢其瞻與魏良臣等偕來丁未范同分司筠州居住罷判大宗正事士儂同知宗正事士擢申嚴戚里宗室謁禁己酉雷壬子蕭毅等入見始定議和盟誓乙卯以何鑄簽書樞密院事充金國報謝進誓表使庚申命宰執及議誓撰文官告祭天地宗廟社稷辛酉以張浚爲檢校少傅崇信軍節度使萬壽觀使是月與金國和議成立盟書約以淮水中流畫疆割唐鄧二州畀之歲奉銀二十五萬兩絹二十五萬匹休兵息民各守境土詔川陝宣撫

司毋出兵生事招納叛亡略科餘黨歐幻四等復叛桂陽藍山犯平陽縣遣江西兵馬都監程師回討平之十二月丁卯責降徽猷閣待制劉洪道爲濠州團練副使柳州安置癸酉命尙書省置籍勾考諸路滯獄甲戌罷川陝宣撫司便宜行事乙亥兀朮遣何鑄等如會寧見金主且趣割陝西餘地遂命周聿莫將鄭剛中分畫京西唐鄧陝西地界壬午命州縣三歲一置產業部籍民貲財田宅以定賦役禁受賊虧隱舊額丁亥立譏察海舶條法癸巳賜岳飛死于大理寺斬其子雲及張憲于市家屬徙廣南官屬于鵬等論罪有差

宋史卷二十九

元中書右丞相總裁脫脫等修

本紀第三十

高宗七

十二年春正月癸卯罷樞密行府庚申孫近分司漳州居住二月丁丑加建國公瑗爲檢校少保進封普安郡王己卯賜楊沂中名存中丙戌詔諸州修學宮辛卯蠲廣南東西路賂科殘擾州縣今年租鎮江太平池州蕪湖大火癸巳金主許歸梓宮及皇太后遣何鑄等還三月丙申臨安府火壬寅命普安郡王出就第朝朔望辛亥以士儂營營護岳飛爲朋比責建州居住丙辰胡世將卒夏四月甲子朔遣孟忠厚爲迎護梓宮禮儀使王次翁爲奉迎兩宮禮儀使丁卯皇太后偕梓宮發五國城金遣完顏宗賢劉綯護送梓宮高居安護送皇太后庚午賜禮部進士陳誠之以下二百五十四人及第出身戊寅封韋淵平樂郡王辛巳皇后邢氏崩訃初至甲申增修臨安府學爲太學五月甲午以鄭剛中爲川陝宣撫副使乙未遣審詔遠等賀金主生辰置淮西京西陝西諸路榷場丙午增築慈寧殿停給度僧牒乙卯復試教官法六月甲子命侍從臺諫禮官雜議權奉攢宮戊辰以萬俟卨爲攢宮按行使辛未責降王庶爲嚮德軍節度

副使道州安置壬午金國歸孟庚李正民甲申以吳璘爲檢校少師階成岷鳳四州經略使秋七月壬辰朔福州簽判胡銓除名新州編管丁酉上皇后諡曰懿節祔神主于別廟己亥以何鑄兼權參知政事己酉始製常行儀仗及造玉輅乙卯蠲廣南湖北沿邊州軍免行錢八月辛酉朔兀朮使來求商州及和尚方山二原丙寅何鑄罷甲戌以万俟卨參知政事充金國報謝使壬午皇太后至入居慈寧宮己丑帝易總服奉迎徽宗及顯肅懿節二后梓宮至奉安于龍德別宮是月鄭剛中分畫陝西地界割商秦之半界金國存上津豐陽天水三縣及隴西成紀餘地棄和尚方山二原以大散關爲界九月乙未以孟忠厚爲樞密使充攢宮總護使壬寅大赦乙巳加秦檜太師封魏國公丙午金使劉善完顏宗表等九人入見戊申以王次翁等充金國報謝使藏金國誓書于內侍省辛亥加張中孚開府儀同三司中彥靖海軍節度使甲寅杖殺僞福國長公主李善靜以金州郭浩爲金房開達四州經略安撫使始遣楊愿使金賀正且冬十月乙丑始聽中外用樂丙寅權攢徽宗皇帝及顯肅皇后于會稽永固陵懿節皇后祔乙亥以翰林學士陳克俊簽書樞密院事權參知政事丁丑以皇太后回鑾推恩進封秦檜爲秦魏兩國公辭不拜庚辰以何鑄黨援岳飛不主和議責授祕書少監徽州居住甲申皇太后生辰上壽于慈寧宮丁亥置福建路提舉茶司事十一月癸巳樞密使張浚罷進封清河郡王以左司郎中李椿年爲兩淮轉運副使專治

經界乙未加楊存中少保己亥禁貶謫人私至行在庚子作崇政垂拱二殿辛丑劉光世薨壬寅曾祖姑秦魯國大長公主薨丙午尹焞卒庚戌孟忠厚罷左承事郎張戒坐黨趙鼎岳飛停官辛亥遣張中孚中彥還金國十二月甲子詔侍從監察御史已上監司郡守各舉所知宗室丙寅幸秦魯國大長公主第臨奠又幸劉光世第臨奠庚午命太學弟子員以三百人爲額壬申秦檜上大曹寺監通用敕令格式癸酉以李顯忠爲保信軍節度使御前選鋒軍統制王進爲御前諸軍都統制是歲斷大辟二十四人

十三年春正月戊戌加上徽宗諡曰體神合道駿烈遜功聖文仁德憲慈顯孝皇帝己亥親饗太廟奉上冊寶癸卯增建國子監太學乙巳復兼試進士經義詩賦二月壬戌初御前殿特引四參官起居甲子製郊廟社稷祭器乙丑更永固陵曰永祐丙寅封韓世忠咸安郡王乙亥蠲雷化等十州免行錢丙子造金象草木四輅庚辰立太學及科舉試法辛巳祕書少監秦熈修建炎以來日麻成乙酉建景靈宮奉安累朝神御三月己亥造鹵簿儀仗乙巳建社稷壇丙午築園丘振淮南饑民仍禁遏糴夏四月癸亥頒鄉飲酒儀于郡國甲戌毀獄吏訊囚非法之具閏月己丑立貴妃吳氏爲皇后戊申命史館編靖康建炎忠義錄庚戌楊政入見加檢校少保賜田五十頃壬子蠲諸路無名月椿錢乙卯王次翁罷五月甲子張九成坐黨趙鼎南安軍居住壬申置國子博士正錄乙亥命諸路置放生池丁丑天申節始上壽錫宴如故事

六月壬戌禁三衙及諸軍市易月增將官供給錢有差壬寅程克俊罷以万俟卨兼權簽書樞密院事戊申詔諸路提刑歲舉部內廉明平恕獄官庚戌金遣洪皓張邵朱弁來歸秋七月甲子詔求遺書罷捕賊補官格丙寅處州兵士楊興等謀作亂事覺伏誅戊辰置諸州銅作務壬申雨雹蠲浙西貧民逋負丁鹽錢八月丙戌遣吏部侍郎江邈奉迎累朝神御于温州丁亥命諸路有出身監司一員提舉學事戊戌洪皓至自金國入見己亥遣鄭朴等使金賀正旦王師心等賀金主生辰鄭剛中獻黃金萬兩辛丑廢昌化萬安吉陽軍知階州田晟將所部三千人赴行在丁未以晟主管侍衛馬軍司公事其衆隸焉己酉加錢恂太尉庚戌詔監司守臣講求恤民事宜九月丁巳宗室子僑卒于秀州甲子洪皓出知饒州戊辰命諸路置敦宗院己巳詔准東京西監司歲終上州縣所增戶口爲守令殿最庚午以兵部侍郎司馬朴死節贈兵部尙書賜其家銀絹癸酉詔諸州守貳提舉學事縣令佐主管學事戊寅蠲淮南逋欠坊場錢及上供帛冬十月己丑秦檜上監學敕令格式庚寅製渾天儀乙未奉安累朝帝后神御于景靈宮十一月庚申日南至合祀天地于圜丘太祖太宗並配大赦十二月癸未朔日食雲陰不見辛卯毀私鑄毛錢癸巳建祕書省丁酉增太學弟子員二百己亥郭浩入見丁未命行在宗子入宮學己酉金遣完顏朶等來賀明年正旦是月始頒來歲麻于諸路監司守臣是歲關外初行營甲

十四年春正月丁巳遣羅汝楫等報謝金國甲子臨安府火戊寅命普安郡王爲子偁解官持服二月丁亥復置靖州新民學癸巳蠲江浙諸路逋欠錢帛戊戌初命四川都轉運司歲撥總制司錢百七十三萬緡市紬絹綿輸于鄂州總領所丙午罷万俟卨定宗學生額爲百員己酉以資政殿學士樓炤簽書樞密院事兼權參知政事加郭浩檢校少保三月乙卯蠲江浙京湖積欠上供錢米丁卯避金太祖嫌名改帳州爲西和州川陝宣撫司爲四川宣撫司己巳幸太學蠲汀漳泉建四州經賊殘蹂民戶賦役一年壬申解潛坐黨趙鼎責授濠州團練副使南安軍安置己卯詔舉賢良夏四月甲申詔刑部及監司決絕滯訟丁亥初禁野史虔州民析其屋朽柱中有文曰天下太平年甲午金人來求淮北人之在南者詔願者聽還遣馬軍司統領張守忠討海賊朱明五月丙辰詔階成西和鳳四州募兵赴行在甲子樓炤罷乙丑以御史中丞李文會簽書樞密院事兼權參知政事丙寅婺州大水己巳金始遣烏延和等來賀天申節辛未楚州鹽城縣海水清是月嚴信衢建四州水六月甲申蠲江浙州縣酒稅坊場綱運倉庫積年逋負孫近再奪三官移南安軍居住丁亥加高世則少保戊子安南國入貢癸巳宣州涇縣妖賊俞一作亂守臣捕滅之乙未振江浙福建被水之民丙申內侍白鄂坐誹謗及其客張伯綸俱黥配吉陽軍特贈子偁太子少師官給葬事庚子奪万俟卨三官歸州居住乙巳置國子監小學秋七月戊午金人殺王倫于河間

府丙寅立明法科兼經法丙子幸祕書省八月癸未撫州獻瑞禾庚寅以李椿年權戶部侍郎仍治經界乙未遣林保使金賀正巨宋之才賀金主生辰九月辛酉分利州爲東西路以吳璘爲利州西路安撫使楊政利州東路安撫使甲子命郡守終更入見各舉所部縣令一人壬申趙鼎移吉陽軍安置癸酉命臨安府索察京子孫逮赴貶所遇赦永不量移冬十月甲午從右正言何若言請戒內外師儒之官黜伊川程氏之學乙未加韋淵少師己亥以永道郴三州桂陽監及茶陵縣民多不舉子永蠲其身丁錢絹米麥十一月甲子復內教卽禁中闈試三衛將士癸酉李光移瓊州安置乙亥朱勝非薨十二月丁丑朔潼川府路轉運判官宋蒼舒獻嘉禾一莖九穗己卯命諸郡收養老疾貧乏之民復置漏澤園葬死而無歸者丁酉李文會罷尋責筠州居住庚子以御史中丞楊愿簽書樞密院事兼權參知政事癸卯金遣孛散温等來賀明年正旦是月汀賊華齊寇漳州長泰縣安撫司遣兵捕之爲所敗將佐趙成等死之是歲四川宣撫司始取民戶稱提錢歲四十萬緡以備軍費

十五年春正月丁未朔御大慶殿初行大朝會禮戊申瀘南安撫使馮楫獻嘉禾己未分經義詩賦爲兩科取士辛酉初置籍田丁卯減成都府路對糶米三之一宣撫司激賞錢三十萬緡戊辰命戶部侍郎王鈇措置兩浙經界辛未初命僧道納免丁錢二月戊寅增太學弟子員百人乙未詔州縣科折之數第三

等戶或均配己亥封崇國公瓌爲恩平郡王出就第三月甲子遣敷文閣待制周禧馬官國史愿諸將
程師回馬欽白常皆還金國夏四月丙子朔賜秦檜第一區戊寅彗星出東方癸未避殿減膳命監司郡
守條上便民事宜提刑巡行決獄賜禮部進士劉章以下三百人及第出身丁亥以彗出大赦癸巳彗沒
甲午遣後軍統制張淵討捕福建盜賊庚子罷四川都轉運司五月丙辰客星見戊午命貧民產子賜義
倉米一斛甲子金遣完顏宗尹等來賀天申節六月乙亥朔日有食之丁丑幸秦檜第乙酉加檜妻婦子
孫官封丁亥客星沒秋七月戊申復置利州鑄錢監戊午命監司審察縣令治狀顯著及老懦不職者上
其名以爲黜陟蠲廬光二州上供錢米一年丁卯免汀漳二州秋稅及處州三縣被水民家納絹鄂州舊
額絹各一年己巳蠲四川轉運司積貸常平錢十三萬緡八月甲戌朔禁收折帛令零錢止輸實數乙亥
蠲京西路請佃田租及州縣場務稅錢二年己亥改諸路提舉茶鹽官爲提舉常平茶鹽公事川廣以憲
臣兼領辛丑復增太學弟子員二百九月辛酉遣錢周林使金賀正且嚴抑賀金主生辰冬十月乙亥帝
書一德格天之閣賜秦檜仍就第賜宴丙子楊愿罷癸未以樞密都承旨李若谷簽書樞密院事兼權參
知政事武岡軍騫人楊再興降庚寅以翰林學士承旨秦熿爲資政殿學士提舉萬壽觀兼侍讀恩數視
執政辛卯夜雷癸巳蠲安豐軍上供錢米二年甲午以汪勃言折彥質黨趙鼎柳州安置庚子遣四川宣

撫司總領錢糧官辛丑命秦煒班纂書樞密之下十一月甲辰加錢忱少保錢愐開府儀同三司丙辰郭浩卒丙寅全給秦榆歲賜公使錢萬緡閏月己卯罷明法新科十一月戊午置江陰軍市舶務甲子命右司員外郎李朝正同措置經界丁卯金遺蒲察說等來賀明年正旦

十六年春正月戊子增太學外舍生額至千人壬辰親饗先農于東郊行籍田禮執耒耜九推詔告郡縣二月辛丑割金州豐陽縣洋州乾祐縣界金人壬寅毀諸路淫祠癸丑建秦榆家廟三月庚午朔建武學置弟子員百人辛卯造秦榆家廟祭器乙未增建太廟己亥立淮東江東兩浙湖北州縣歲較營田賞罰格夏四月壬子禁州縣預借民稅及和買錢戊午定選試武士弓馬去留格五月壬申濬運河命諸路漕臣兼提舉學事癸未初作太廟祔室丙戌作景鐘丁亥金遣烏古論海等來賀天申節六月安南獻馴象十秋七月壬申以張浚上疏論時事落節鉞連州居住壬辰立祕書省獻書賞格丙申復何鑄爲端明殿學士兼侍讀八月辛丑築高祿壇壬子遣邊知白使金賀正旦周執羔賀金主生辰九月甲戌命何鑄等爲金國祈請使請國族甲午賞統制張淵韓京等討捕福建廣東諸盜功各進官有差冬十月戊戌帝觀新作禮器于射殿撞景鐘奏新樂十一月丙子合祀天地于圓丘大赦庚辰罷州縣新剝稅場癸未復置御書院己丑加潘正夫少保十二月戊戌彗見西南方乙巳滅辛酉金遣盧彥倫等來賀明年正旦

十七年春正月己巳命諸路收試中原流寓士人已卯禁監司郡守進羨餘辛卯以舉人多冒員命州縣每三歲行鄉飲酒禮以貢士壬辰以李若谷參知政事御史中丞何若簽書樞密院事癸巳進秦熺爲資政殿大學士二月乙巳親祠高祿辛酉李若谷罷三月乙亥何若罷己卯以翰林學士段拂參知政事乙酉改封秦檜爲益國公戊子改命張俊爲靜江寧武靖海軍節度使韓世忠鎮南武安寧國軍節度使落李若谷資政殿學士江州居住夏四月丙申蠲諸路免行錢三之一己亥以御史中丞汪勃簽書樞密院事己未詔趙鼎遇赦永不檢舉以前貶所潮州錄事參軍石恮待遇鼎厚除名潯州編管五月甲子詔舉賢良乙丑雨雹己巳洪皓責濠州團練副使英州安置辛巳金遣完顏卞等來賀天申節六月乙卯禁招安盜賊戊午改命普安郡王瑗爲常德軍節度使恩平郡王璩武康軍節度使秋七月庚辰召鄭剛中赴行在辛巳太白晝見以徽猷閣待制知成都府李璣權四川宣撫使癸未命李璣同總領四川財賦符行中參酌減放四川重斂戊子以吳璘充御前諸軍都統制兼知興州八月庚子罷建州勦置賣鹽坊癸卯趙鼎薨于吉陽軍戊申遣沈該使金賀正巨詹大方賀金主生辰丁巳以諸路羨餘錢充月椿之數加邢孝楊太尉九月己巳減四川科率虛額錢歲二百八十五萬緡癸酉詔以四川宣撫司降賜庫米一百萬石均減對籴乙亥蠲江南東西道諸州月椿錢丙子鄭剛中罷丙戌減江浙諸州折帛錢冬十月辛卯朔

日有食之癸卯建太一宮丁未命太常歲以春秋二仲薦獻攢宮季秋遣御史按視己酉進楊存中爲少傅己未臨安府甘露降十一月丙寅秦檜上重修免役敕令格式丁卯復賜進士聞喜宴十二月辛卯朔禁諸州擅釋放流配命官及事干邊防切要之人甲寅鄭剛中落職桂陽監居住丙辰金遣完顏宗藩等來賀明年正旦

十八年春正月己巳幸天竺寺遂幸玉津園二月乙未段拂罷尋落職興國軍居住以汪勃兼權參知政事辛亥聽趙鼎歸葬二月丁丑命楊政吳璘招關陝流民補殿前軍戊寅罷汀州諸縣上供銀蠲茶鉛本錢之半庚辰幸新太一宮壬午以秦熿知樞密院事乙酉禁民私渡淮及招納叛亡夏四月戊子朔日有食之庚子秦熿乞避父子共政以爲觀文殿學士提舉萬壽觀兼侍讀提舉祕書省壬寅命熿恩禮視宰臣班次亞右僕射甲辰賜禮部進士王佐以下三百三十人及第出身丙辰加士奎開府儀同三司五月戊辰加吳益太尉乙亥裁損奉使賞給丙子金遣蕭秉溫等來賀天申節癸未以李顯忠私取故妻子金降爲平海軍宣使台州居住甲申罷四川宣撫司以李璆爲四川安撫制置使是月徽州慶雲見六月甲辰築九宮貴神壇于東郊戊申士民曹溥等上尊號不許是月遣太府丞宋仲堪詣江州置獄鞫鄭剛中欺隱官錢福州侯官縣有竹實如米饑民採食之是夏浙東西淮南江東旱八月丙申汪勃罷丁酉以

工部尚書詹大方簽書樞密院事兼權參知政事禁州縣士民節詞舉留官吏閏月庚申免江浙湖南今歲和糶甲子命臨安平江二府淮東西湖北三總領所歲糶米百二十萬石以廣儲蓄壬申遣王墨卿使金賀正旦陳誠之賀金主生辰甲申辛道宗降官房州羈管乙酉禁奉使三節人出境博易福建諸州賊平以所剽招奇兵爲殿前司左翼軍九月丙午詹大方薨冬十月丙辰以御史中丞余堯弼簽書樞密院事兼權參知政事十一月乙酉朔升感生帝爲上祀己亥胡銓移吉陽軍編管壬寅鄭剛中責濠州團練副使復州安置戊申禁四川買馬官吏私市蠻馬辛亥振紹興府饑十二月乙卯朔振明越秀潤徽婺饒信諸州流民丙寅借給被災農民春耕費丁卯命利路三都統措置營田以其租充減免對糶之數戊辰蠲被災下戶積欠租稅庚辰金遣召守忠等來賀明年正旦

十九年春正月甲申朔以皇太后年七十帝詣慈寧殿行慶壽禮甲午罷國信所回易北貨癸卯幸天竺寺遂幸玉津園二月丁丑禁湖北溪洞用人祭鬼及造蠱毒犯者保甲同坐三月癸未朔日有食之甲辰鄭剛中移封州安置子良嗣等亦除名編管夏四月丁巳立孳生牧馬監賞罰格丙寅祕閣修撰張邵上秦檜在金國代徽宗與粘罕書稿詔付史館以邵爲徽猷閣待制戊寅湖廣江西路建康府並甘露降五月壬午朔汀漳泉三州民田被賊蹂踐蠲其二稅戊戌賞平福建羣盜功以選鋒軍統制劉寶爲武泰軍

承宣使餘將士遷秩有差庚子金遣唐括德温等來賀天申節丁未減連英循惠新恩六州免行錢六月丁巳茶陵縣丞王庭珪作詩送胡銓坐謫訕停官辰州編管戊午秦檜上吏部續降七司通用法秋七月壬寅頒諸農書于郡邑八月辛未刺浙東諸州強盜當配者充沿海諸軍九月戊申命繪秦檜像仍作贊賜之冬十月己未湖南副總管辛永宗停官肇慶府編管十一月壬辰合祀天地于圜丘大赦辛丑李椿年以經界不均罷丁未立州縣墾田增虧賞罰格是月命復蜡祭十二月丁巳金岐王亮弑其主竄自立己未詔無子女戶得解舉人太學生之獨居者並免役己巳命四川制置司歲募扈衛三百人赴行在丁丑金遣完顏亮等來賀明年正旦

二十年春正月丁亥秦檜入朝殿前司軍士施全道刺之不中壬辰磔全于市癸卯趣諸路轉運司及守臣畢經界事丙午兩浙轉運副使曹泳言李孟堅誦其父光所撰私史語涉譏謗詔送大理寺二月戊申朔立守貳令尉營田增虧賞罰格庚戌禁民春月捕鳥獸蠲靜江府昭州上供折布錢三之一壬子罷經界所覆實官吏庚申免海外四州及瀘敘二州長寧軍經界三月庚辰金遣完顏思恭等來報卽位癸未以余堯弼參知政事給事中巫伋簽書樞密院事丙戌遣堯弼等賀金主卽位戊子以秦熺爲觀文殿大學士萬壽觀使丙申李孟堅獄具詔李光遇赦永不檢舉孟堅除名峽州編管胡寅程瑀潘良貴張燾等

八人緣坐黜降有差戊戌詔改正經界法之厲民者庚子以巫伋兼權參知政事壬寅胡寅賣果州團練副使新州安置夏四月壬子以役入官田悉歸常平司禁募民佃種癸酉置力田科募江浙福建民耕兩淮閒田是月信州妖賊黃曾等作亂陷貴溪縣江西兵馬鈐轄李橫等討平之五月庚辰申禁諸軍差承接文字使臣伺察朝政癸未秦檜上中興聖統甲午金就遣完顏思恭等來賀天申節六月癸亥加秦熺少保詔大理寺鞫前太常主簿吳元美譏謗獄丙寅禁民結集經社是月建州民張大一作亂秋七月丙子罷招刺禁軍庚寅罷泉漳汀三州經界八月甲辰朔量移張浚永州孫近虔州万俟卨沅州李若谷饒州李文會江州段拂南康軍並居住雷州守臣王趨坐交通趙鼎李光停官戊申改建大理寺辛酉遣陳誠之使金賀正旦王曦賀金主生辰九月甲申以吳元美譏毀大臣除名容州編管丙申侍御史曹筠以附下罔上罷冬十月戊辰右迪功郎安誠坐文字謗訕送惠州編管秦檜有疾庚午命執政赴檜第議事十一月甲子檜始朝命肩輿入宮門二孫扶掖升殿不拜己巳金遣蕭頤等來賀明年正旦

二十一年春正月癸未以兩淮民復業未久寬其租稅庚子蠲平江府折帛錢三年二月甲寅夜雨雹乙卯詔諸州置惠民局官給醫書壬戌遣巫伋等爲金國祈請使請歸淵聖皇帝及皇族增加帝號等事癸亥以余堯弼兼簽書樞密院事三月丁丑雨雹丁亥蠲江浙荆湖等路中戶以下積年逋負夏閏四月己

卯禁三衙掎剋諸軍丁亥賜禮部進士趙遠以下四百四人及第出身五月辛亥罷利州路選刺義士戊午金遣劉長言等來賀天申節以吳璘楊政田師中並爲太尉六月甲戌括淮南佃田所隱頃畝以理租稅辛巳命歲給大理寺三衙及州縣錢和藥劑療病囚秋七月壬寅以集英殿修撰知衢州曹筠爲四川安撫制置使辛亥罷柴米稅癸亥詔州縣官嘗被科率害民重罪者不得任守令親民官八月辛未秦檜上重修諸路茶鹽法壬申韓世忠薨詔進太師致仕癸酉追封通義郡王禁郡守特斷乙亥加岳陽軍節度使士樽開府儀同三司充萬壽觀使甲申遣陳夔使金賀正巳陳相賀金主生辰九月戊戌朔籍寺觀絕產以贍學乙巳均科處州丁鹽錢丁巳增築景靈宮是月巫伋使還所請皆不許冬十月甲戌幸張俊第壬午進俊爲太師升從子子蓋爲安德軍節度使甲申夜有赤氣十一月庚戌余堯弼罷乙卯命提舉常平官修復陂湖丁巳進義副尉劉允中坐指斥謗訕棄市十二月壬申雷癸巳金遣兀朮魯定方等來賀明年正旦

二十二年春正月丁未加鞏淵太保三月丁酉以王庶一子之奇之荀謗毀朝政並除名之奇梅州之荀容州編管甲辰以直龍圖閣葉三省監都作院王遠通書趙鼎王庶力詆和議言涉謗訕三省落職筠州居住遠除名高州編管丁巳遣司農丞鍾世明詣福建路籍寺觀絕產田宅入官其後歲入錢三十四萬

緡夏四月丙子巫伋罷辛巳以御史中丞章夏簽書樞密院事兼權參知政事五月癸丑金遣田秀穎等來賀天申節是月襄陽大水容州野蠶成繭秋七月甲午朔加封程嬰公孫杵臼韓厥爲公升中祀丁巳虔州軍卒齊述殺殿前司統制吳進江西同統領馬晟據州叛八月己卯遣鄂州都統制田師中發兵同江西安撫使張澄殿前司遊奕軍統制李耕討述九月乙未又遣左翼軍統制陳敏相繼討之癸丑章夏罷冬十月甲戌以御史中丞宋樸簽書樞密院事兼權參知政事就命李耕知虔州庚辰以黃巖縣令楊煒誹謗除名萬安軍編管台州蕭振落職池州居住十一月戊申合祀天地于圜丘大赦丁巳立薦舉受財刑名李耕入虔州盡誅叛兵虔州平十二月辛酉朔滅夔州路及蒲江清井兩監鹽錢歲入萬二千緡有奇戊子金遣張利用等來賀明年正旦

宋史卷三十一

元 中 書 右 丞 相 總 裁 脫 脫 等 修

本紀第三十一

高宗八

二十三年春正月癸卯進韋淵太傅己酉復以李顯忠爲靈國軍節度使二月癸亥幸玉津園遂幸延祥觀庚午纓虔州軍賊黃明等八人于都市辛未改虔州爲贛州壬申申嚴冒貫請舉法癸未賞平贛盜功以李耕爲金州觀察使將士進秩給賞有差三月丙午齊安郡王士儂薨于建州追封循王詔凡民認復軍莊營田者償開耕錢丁未禁州縣都監巡尉擅置刑獄戊申以前太府丞范彥輝謗訕除名荆門軍編管是春金主亮徙都燕京夏四月辛巳詔諸州編管羈管人遵舊法長吏月一驗視不許囚禁乙酉減利州歲鑄錢爲九萬緡五月庚寅禁州縣以私意籍罪人貲產乙巳復以蕭振爲四川制置使辛亥金遣紇石烈大雅等來賀天申節乙卯立淮南諸州舉人解額六月己卯潼川大水秋七月壬辰寬理平江府湖秀二州被水民夏稅戊戌從秦檜所請命合州取綦崇濃草檜罷相制所受墨勅庚戌禁諸軍瀕太湖擅作壩田八月乙丑士擢薨追封韶王丙寅左宣教郎王孝廉謀據成都叛事覺伏誅己卯賜秦檜建康府

永豐圩田乙酉命勅令所編輯中興以後寬恤詔令九月甲午振潼川被水州縣仍蠲其賦庚子禁採鹿胎冬十月丁巳詔郡守年七十者聽自陳命主宮觀戊午遣吳棨使金賀正旦施鉅賀金主生辰戊辰宋樸罷壬申以右諫議大夫史才簽書樞密院事兼權參知政事丁丑遣戶部郎官鍾世明修築宣州太平州圩田是月命大理鞠妖人孫士道獄十一月壬寅詔立張叔夜廟于信州甲辰班太宗正司條令乙丑以經筵終帙賜宰執講讀等官宴于祕書省爲故事十二月丁巳詔州縣稅額少者罷其監官癸亥韋淵薨癸未禁民車服踰制閏月丙申命檢正都司官詳定郡守所上利病以聞辛丑命諸軍保任統制官在職十年無過者進秩庚戌金遣蔡松年等來賀明年正旦是歲滅池州青陽縣田租萬七千石

二十四年春正月辛未幸延祥觀癸酉初詔郡國同以八月十五日試舉人丙子封婉容劉氏爲貴妃戊寅地震二月丁亥前左從政郎楊炬坐其弟煜嘗上書誹謗送邕州編管丙午加吳益太尉三月壬申楊再興復寇邊前軍統制李道討平之禽再興及其子正脩正拱檻送行在乙亥賜禮部進士張孝祥以下三百五十六人及第出身庚辰秦檜以私憾摭摭知建康府王循友詔大理鞠之是春始權夔州路茶夏四月丙戌詔諸路招補三衙諸軍期三年課其殿最辛丑西南小張藩貢方物己酉羅殿國貢名馬五月癸丑朔日有食之衢州民僉八作亂圍州城通判州事汪召錫拒卻之遂掠嚴州壽昌縣遣殿前司正將

辛立討平之辛未金遣耶律安禮等來賀天申節六月癸巳史才罷甲午以御史中丞魏師遜簽書樞密院事兼權參知政事辛丑王循友貸死藤州安置癸卯詔嘗命四川州縣減免財物以寬民力尙慮未周令制置司總領所司共措置務在不妨軍食可以裕民尋遣鍾世明如四川同議以主管侍衛馬軍司成關爲慶遠軍節度使秋七月癸丑張俊薨勒停人王趨坐交通李光下大理獄乙卯嚮徭人楊正脩正拱于市己未復置邛雅二州博易場三所壬戌詔捐四川茶馬司羨餘錢給軍費以寬民力甲子復落蕭振職池州居住乙丑以總領財賦符行中爲四川制置使乙亥南丹州莫公晟及宜州界外諸蠻納土內附戊寅幸張俊第臨奠八月壬辰禁百官避免輪對甲午罷溫州市黃柑福州貢荔枝丙午追封張俊爲循王以湘潭縣丞鄧杞主簿賈子展嘲毀朝政除名杞容州子展德慶府編管九月辛亥朔李道如納州措置盜賊丁巳賞平衢賊功升辛立領忠州團練使將士遷職給錢有差冬十月壬午蠲旱傷州縣租賦戊子遣沈虛中使金賀正巨張士襄賀金主生辰十一月乙丑魏師遜罷丁卯以權吏部侍郎施鉅參知政事鄧仲熊簽書樞密院事戊辰進秦熺少傅封嘉國公是月以通判武岡軍方疇通書胡銓及他罪除名永州編管十二月丙戌以故龍圖閣學士程瑀有論語講解秦檜疑其譏已知饒州洪興祖嘗爲序京西轉運副使魏安行鑱版至是命毀之興祖昭州安行欽州編管瑀子孫亦論罪丁亥王趨除名辰州編管

丁酉知鄞縣程緯爲其丞王肇所告慢上無人臣禮除名貴州編管籍其貲壬寅刺諸路編管人充廂軍
乙巳金遣白彥恭等來賀明年正旦

二十五年春正月辛未賞討楊再興功保寧軍承宣使李道落階官加龍神衛四廂都指揮使將士進官
賜錢有差二月乙酉以鎮江都統制劉寶爲安慶軍節度使建康都統制王權爲清遠軍節度使壬寅以
通判常州沈長卿仁和縣尉芮燁作詩譏訕除名長卿化州燁武岡軍編管三月己酉右司郎中張士襄
自金國使還坐奉使不肅罷官壬申地震夏四月乙酉施鉅罷以鄭仲熊兼權參知政事戊子命四川制
置司許就類省試院校試刑法己亥減廣西路折米錢五月丁未朔日有食之太廟仁宗室柱生芝九莖
戊申罷諸路免行錢歲百八萬緡癸丑以前知泉州宗室令衿譏訕秦檜遂坐交結罪人汀州居住乙丑
金遣李通等來賀天申節壬申賜劉錡湖南田百頃六月庚辰鄭仲熊罷辛巳以禮部侍郎湯思退簽書
樞密院事兼權參知政事癸卯以言者追譏岳飛改岳州爲純州岳陽軍爲華容軍是月安南入貢秋七
月丙辰減四川絹估稅斛鹽酒等錢歲百六十餘萬緡瀾州縣積欠二百九十餘萬緡詔四川營田有占
民田者常平司按驗給還甲戌封李天作爲南平王八月丁丑申嚴誣告加等法辛巳命大理鞠趙汾及
令衿交通獄丙戌以吏部侍郎董德元參知政事蠲諸路身丁免丁錢一年壬辰建執政府九月丁巳蔡

檢上紹興寬恤詔令冬十月庚辰復置鴻臚寺壬午遣王岷使金賀正旦鄭構賀金主生辰乙酉命大理
鞠張祈附麗胡寅獄乙未幸秦檜第問疾夜檜諷右司員外郎林一飛臺諫徐嘉張扶等請拜煇爲相丙
申進封檜建康郡王煇爲少師並致仕命湯思退兼權參知政事是夕檜薨丁酉檜姻黨戶部侍郎兼知
臨安府曹泳停官新州安置朱敦儒薛仲豈王彥傳杜思旦皆罷命有司具上執政侍從官居外任及主
竄觀與在謫籍者職位姓名辛丑徙殿中侍御史徐壽右政言張扶皆出爲他官十一月乙巳朔追封檜
申王諡忠獻賜神道碑額爲決策元功精忠全德戊申奪趙汾二官壬子以敷文閣直學士魏良臣參知
政事癸亥合祀天地于圜丘大赦甲子幸秦檜第臨奠乙丑復洪皓官釋張祈獄丁卯罷大理寺官旬白
庚午詔監司郡守事無巨細皆須奏聞裁決毋得止上尙書省臣僚薦舉人才必三人以上同薦封叔和
州防禦使右監門衛大將軍士儉爲崇慶軍節度使嗣濮王福建路提刑令諷爲利州觀察使安定郡王
辛未知建康府正會及列郡守臣王昫王鏞鄭僑年鄭震方滋俱以諂附貪冒罷真臘羅斛國貢馴象十
二月甲戌朔詔曰臺諫風憲之地比用非其人黨於大臣濟其喜怒殊非耳目之寄朕今親除公正之士
以革前弊繼此者宜盡心乃職毋合黨締交敗亂成法當謹茲戒毋自貽咎詔張浚折彥質万俟卨段拂
聽自便量移李光邴州安置乙亥復以高爲資政殿學士提舉萬壽觀兼侍讀戊寅鄭億年責建武軍節

度副使南安軍安置壬午詔監司守臣禁羨餘罷權攝戔菑苴節宴飲詔前後告訐者莫汲汪召錫陸升之等九人除名廣南諸州編管甲申召孟忠厚奉朝請命胡寅張九成等二十八人並令自便仍復其官乙酉董德元罷丙戌以劉錡知潭州辛卯命三省六部條具續降勅旨來上審詳施行甲午以數文閣待制沈該參知政事乙未以王會恃權貪橫停官循州編管丙申復以蕭振爲四川制置使復張浚折彥質趙汾葉三省王趨劉岑官移胡銓衡州丁酉禁閩浙川廣貢真珠文犀戒州縣加收耗糧己亥金遣耶律歸一等來賀明年正旦

二十六年春正月壬子省諸州稅場以寬商賈甲子追復趙鼎孫近鄭剛中汪藻舊職乙丑詔選擇監司須七品以上清望官或經朝擢及治郡著績者丙寅曹泳吉陽軍編管封伯令衿明州觀察使安定郡王以其從弟令詼讓也戊辰除民事律蠲諸路積負及黃河竹索錢二月乙亥命四川州縣凡預借民賦稅分限理析己卯定諸州流寓士人解額庚辰罷進奏院定本朝報乙酉進士林東追諡秦檜上書狂妄冀州編管右朝奉郎林一飛坐指使林東責監高州鹽稅庚寅三佛齊國入貢辛卯魏良臣罷庚子以左朝散大夫王曠爲秦檜親黨直徽猷閣呂愿中貪虐附檜建昌軍居住愿中責果州團練副使封州安置三月甲寅以邊事已定罷宰相兼領樞密使丁巳詔兩淮邊民未復業者復其租十年己未以万俟卨參

知政事癸亥加吳璘開府儀同三司乙丑以東平府進士梁勛伏闕上書言北事送千里外州軍編管丙寅詔曰講和之策斷自朕志秦檜但能贊朕而已豈以其存亡而渝定議耶近者無知之輩鼓倡浮言以惑衆聽至有僞撰詔命召用舊臣抗章公車妄議邊事朕甚駭之自今有此當重寘典憲丁卯蠲閩浙諸州歲供軍器所物料三之一減諸州工匠千人己巳募四川民佃淮南京西閒田並邊復租稅十年次邊五年夏四月戊子增溫台等十六州解額命湖北路以增戶墾田爲守令殿最庚寅遣陳誠之等賀金主尊號禮成癸巳置武學官及弟子員百人甲午禁州郡進祥瑞戊戌立六科以舉士加韋謙太尉詔大辟情犯無可矜憫者禁刑寺妄引例奏裁貸減罷鄉飲酒舉士法詔淮南京西占射官田踰二年未盡墾者募人更佃五月壬寅以沈該爲尙書左僕射万俟卨爲右僕射並同中書門下平章事湯思退知樞密院事丁未詔州軍教授毋兼他職丙辰蠲楚州盱眙軍民租十年己未金遣敬嗣暉等來賀天甲節六月辛未朔罷諸路鬻戶絕田丁丑以端明殿學士程克俊參知政事戊寅復權要親族中第覆試法乙酉詔取士毋拘程頤王安石一家之說丁亥流星晝隕辛卯以秦檜旣死命史館重修日曆秋七月辛丑詔三衙主帥舉武臣堪知州者壬寅蠲諸路丁絹一年爲二十四萬匹丙午右奉議郎薛仲豈連州編管丁未葺出井避殿減膳辛亥詔諸州守貳考各縣丁籍依年格收除民間市物官戶勢家與編氓均科丙辰葺滅

詔進士因事送諸州軍聽讀特放逐便仍許取應辛酉雨水銀八月戊寅班元豐崇寧學制于諸路革正
前舉登第秦塤曹冠等九人出身以淮南提舉常平朱冠卿言秦檜挾私廢法塤等皆其子孫親戚門下
儉人於是官應試者所授階官易左爲右白身者駁放占用省額復還後科庚辰裁州縣吏額己丑蠲
建康府積欠內帑錢帛庚寅安南國遣使入貢辛卯程克俊罷甲子以吏部侍郎張綱參知政事九月乙
巳以翰林學士陳誠之同知樞密院事丙午立互易薦舉坐罪法壬子詔成都潼川兩路漕臣同制置總
領茶馬司審度四川財賦利害其實惠得以及民調度可以經久者條具以聞甲寅以天聖紹興真決賊
吏指揮班示諸路丙寅增大理寺吏祿戊辰命吏刑二部修條例爲成法冬十月己巳朔詔許秦檜在位
之日無辜被罪者自陳釐正罷浙東常平司平準務乙亥詔四川監司帥臣制置總領茶馬司各舉可守
郡者甲午蠲郴道永三州桂陽軍民身丁米乙未王會移瓊州編管以宋貺黨附秦檜責梅州安置丁酉
以張浚上書論用兵依舊永州居住辛丑遣李琳使金賀正旦葛立方賀金主生辰閏月丙午罷廉州貢
珠縱蛋丁自便己酉命離軍人願歸農者人給江淮湖廣荒田百畝復其租稅十年乙卯初置臨安府左
右廂官分掌訟牒十一月甲戌命吏部侍郎陳康伯戶部侍郎王俱稽考國用歲中出納之數丙戌裁定
大曹寺監百司吏額十二月辛丑命三省錄臺諫所言事報樞密院癸丑万俟卨上重修貢舉勅令格式

甲寅罷諸路鑄錢司庚申賞應詔論事切當者壬戌三佛齊國入貢甲子金遣梁暉等來賀明年正旦
二十七年春正月乙酉幸延祥觀戊子命侍從各薦宗室京朝官才識治行者二人二月丁酉朔復兼習
經義詩賦法庚子楊政卒壬寅太廟仁宗英宗兩室柱芝草生戊午以御史中丞湯鵬舉參知政事庚申
更定福建路鹽法癸亥加劉錡太尉三月己巳命京局改官人先除知縣乙酉赤氣出紫微垣丙戌賜禮
部進士王十朋以下四百二十六人及第出身丁亥詔焚交趾所貢翠羽于通衢仍禁宮人服用銷金翠
羽己丑減三川對糴米歲十六萬九千石夔路激賞絹五萬匹兩川絹估錢二十八萬緡及茶司引息虛
額錢歲九十五萬緡辛卯万俟卨卒壬辰以符行中前在蜀恣橫南雄州安置甲午除耕牛稅五月癸未
金遣耶律守素等來賀天申節辛卯復以五帝神州地祇等十二祭爲大祀六月甲辰命臣僚轉對盡忠
開陳毋摭細微以應故事戊申以湯思退爲尙書右僕射同中書門下平章事庚戌復余深黃潛善並觀
文殿大學士乙卯裁定離軍將士諸州添差數戊午初命太廟冬饗祭功臣臘饗祭七祀禴饗兼之己未
進錢忱少傅增命官捕獲私茶鹽賞典秋七月己巳復饒穎韶三州鑄錢監癸酉戒監司郡守舉劾守令
觀望徇私乙亥以龍圖閣學士李文會爲四川安撫制置使丙子詔凡出命令先經兩省書讀如舊制八
月乙未以湯鵬舉知樞密院事庚申復置提領諸路鑄錢司于行在以戶部侍郎榮勳領之九月癸酉張

綱罷戊寅以吏部尙書陳康伯參知政事蠲淮南京西湖北積欠內藏錢帛丁亥校書郎葉謙亨言祀典散逸隆殺不當名稱或舛請勅禮官祕書酌景德故事取祭祀之式定爲一書名曰紹興正祠錄以爲恆制詔從之冬十月壬寅有赤氣隨日入癸卯築通泰楚三州捍海堰辛酉詔四州諸司察旱傷州縣捐其稅振其饑民十一月癸亥朔減福建鹽鈔錢歲八萬緡乙丑遣孫道夫使金賀正旦辛巳遣劉章賀金主生辰丁亥湯鵬舉罷戊子蠲廬州二稅及上供錢米一年十二月甲午詔廣南經略市舶司察蕃商假託入貢丙辰初命州縣置禁厯戊午金遣高思廉等來賀明年正旦

二十八年春正月己巳申禁三衢疆刺平民爲兵己卯幸延祥觀遂幸玉津園壬午禁諸路二稅折納增價癸未遣戶部郎中莫濛等檢視淮南浙西江東沙田蘆場甲申命臺諫侍從三人以上公薦監司治狀二月癸巳命史館重修徽宗大觀以前實錄丙申以陳誠之知樞密院戊戌禁沿海州軍博買乙巳以工部侍郎王綸同知樞密院事己酉命六曹長貳詳定差役舊法癸丑加楊存中少師諡張俊曰忠烈三月辛酉朔日有食之丙寅雪丁丑加田師中開府儀同三司戊寅詔自今用人選帥臣監司曾任郎官已上者爲侍從監司郡守有政績者爲卿監郎官朝官二年乃遷卿監郎官未歷監司者更迭補外戊子責秦檜黨宋樸徽州居住沈虛中筠州居住夏四月丙申復詔文武官非犯贓罪並許以致仕恩任子辛亥兩

霍巖州遂安賊江大明寇衢州官軍捕斬之五月金遣蕭恭等來賀天申節六月壬辰太白晝見癸巳流星晝隕甲寅增浙西江東淮東沙田蘆場租課置提領官田所掌之秋七月庚申立江西上供米綱賞格戊辰詔監司按發官吏不得送置司州軍推鞠所犯涉重卽以奏聞命鄰路監司選官就鞠己卯命取公私銅器悉付鑄錢司民間不輸者罪之庚辰親製郊廟樂章乙酉復鬻沒官田八月戊子朔置國史院修神哲徽三朝正史己丑檢放風水災傷州縣苗稅仍振貸饑民乙未增四川十七州舉人解額戊戌湯思退等上徽宗實錄壬寅命戶部侍郎令提領諸路鑄錢甲寅地震九月辛未定銅錢出界罪賞甲戌詔以吏部七司舊制與續降參訂異同立爲定法丁丑置殿前司虎翼水軍千人庚辰以中書舍人玉剛中爲四川安撫制置使辛巳封叔建州觀察使士輻爲昭化軍節度使嗣濮王癸未蠲平江紹興湖州被水民逋賦冬十月丁亥朔遣沈介使金賀正旦黃中賀金主生辰辛丑禁監司帥守私役軍匠十一月己卯合祀天地于圜丘大赦壬午復命檢舉諸人因赦移放者皆許得罪者不預十二月庚寅安定郡王令矜薨辛丑修睦親宅建宮學丁未復李光官放自便戊申蠲楚州歸附民賦役五年壬子金遣蘇保衡等來賀明年正旦是歲興元都統制姚仲復籍興元府等五州義士得二萬餘人

二十九年春二月丙辰朔以皇太后年八十詣慈寧殿行慶壽禮庚申浚平江二十六浦以泄水庚午振

湖秀諸州饑民癸酉幸延祥勸遂幸玉津園庚辰禁諸州科賣倉鹽癸未蠲沙田蘆場爲風水所侵者租之半是月金國罷沿邊權場惟泗州如舊二月丙戌朔亦罷沿邊權場存其在貽盱者加吳璘少保己丑禁海商假託風潮私往北界壬辰除臨安府歲供修的司錢三萬六千緡丁酉蠲四川折估糴本積欠錢三百四十萬緡戊戌大雪雨雹己亥禁貿易廣南羈縻州物貨命廣西教閱峒丁庚戌罷諸路斥候遞卒甲寅取具貶死臣僚姓名議加恩典三月丙子除州縣積欠錢三百九十七萬緡有奇及中下戶所欠入官錢物丁丑詔侍從臺諫帥臣監司歲舉可任將帥者二人限命官子孫制田減父祖之半併其詭名寄產者格外田畝同編戶科役己卯除湖州平江紹興流民公私逋負夏四月壬辰國子司業黃中自金國使還言金人將徙居汴京以見逼望早飭邊備宰相怒不聽己亥修三省法庚子增置帶御器械四員丙午禁內外將佐營造回易掎斂軍士辛亥命縣令有政績者諸司同薦不次升擢以風厲之五月甲寅朔罷鄂福建閩生沙田丁巳詔殿前司選統制官部兵千人戌江州彈壓盜賊每歲一易己未椿頓江浙四路折帛錢子三總領所及浙西提刑司以備軍用辛酉禁權要豪民舉錢軍中取息丁卯命印給三總領所見錢公據關子許商人入納己巳立監司守臣舉劾八條金遣王可道等來賀天申節六月甲辰朔遣王綸等爲金國奉表稱謝使丁亥禁江淮私渡北人丙申陳誠之罷禁積錢民戶過萬緡官戶過二萬緡

滿二年不易他物者沒入之丁酉申禁包直請託己亥以陳康伯兼樞樞密院事辛丑李光卒壬寅以主管步軍司趙密爲太尉己酉沈該以貪冒罷閏月甲寅益荆南戍卒千人守臣劉錡亦募效用三千人丁巳命江湖浙西五漕司增價糶米二百二十萬石赴沿江十郡自荆至常州以備振貸庚午罷成都府路隔槽酒務監官七十一員令民承買己未罷江浙淮東沙田蘆場所增租課甲子落沈該觀文殿大學士致仕罷福建安撫司官賣鹽戊辰大省淮西冗官辛未復置江淮荆浙福建廣南路提點坑冶鑄錢官秋七月丁亥以權吏部尙書賀允中參知政事癸巳封權戶部侍郎令諤爲安定郡王戊戌福州大水己酉禁諸路抑買官田庚戌以四川經總制及田晟錢糧錢共百三十四萬緡充增招軍校費八月甲子募人輸米行在諸倉願以茶鹽礬鈔等償直者聽丁卯除南雄英連三州經界復丁米舊額甲戌併史館歸祕書省玉牒所歸宗正寺九月甲申詔建炎以來使未還而後嗣無祿者與一子官乙酉王綸使還入見言金國和好無他丙戌湯思退等稱賀甲午以湯思退爲尙書左僕射陳康伯爲右僕射並同中書門下平章事乙未以皇太后不豫大赦不視朝丙申爲太后祈福蠲中下戶所欠稅賦及江浙蝗濟州縣租丁酉減僧道免丁錢己亥蠲見監贖罰賞錢庚子皇太后韋氏崩癸卯遣周麟之等爲金國表哀謝使冬十月甲寅以羣臣五上表始聽政命保康軍節度使吳益爲攢宮總護使乙亥立諸路和糶募民運米賞格

戊寅冊諡皇太后曰顯仁十一月丁亥遣賀允中等爲金國遣留國信使丙午權攢顯仁皇后于永祐陵
十二月甲寅諫言北界禁民妄傳起兵帝諭大臣常自治爲安邊息民之計甲子祔顯仁皇后神主于太
廟辛未以王綸知樞密院事壬申減三省樞密院激賞庫及諸書局歲用錢二十萬緡鼎州程昌寓所增
蔡州官兵衣糧錢四之一西和州官賣鹽直之半蔣州上供經總制司無額錢如之丙子金遣施宜生等
來賀明年正旦

三十年春正月戊子給劉錡軍費錢六十萬緡丙申以吏部侍郎葉義問同知樞密院事廢御書院丁酉
罷鈞容班樂工及甲庫酒局壬寅募人墾淮南荒田甲辰定御輦院三營兵額爲九百人二月甲寅罷夔
州路權茶乙卯金遣大懷忠等來弔祭戊午遣葉義問爲金國報謝使癸酉詔立普安郡王瑗爲皇子更
名璋丙子進封建王三月辛巳復館職召試然後除擢免湖北京西宣撫司諸庫未輸錢八十九萬緡癸
未以淮東茶鹽司錢十萬緡充募民墾田費乙酉加吳益少保趙密開府儀同三司以賞攢宮之勞丁酉
初置金州御前諸軍都統制以知金州王彥爲之癸卯賜禮部進士梁克家以下四百一十二人及第出
身甲辰置牧馬監于潮惠二州丙午加恩平郡王璩開府儀同三司判大宗正事始稱皇姪夏四月己酉
朔以孫楷爲蘄州防禦使愷貴州團練使惇榮州刺史丙辰以賀允中兼權同知樞密院事五月辛巳刺

海賊罪不至死者爲龍猛龍騎軍初置荆南府御前諸軍都統制以劉錡兼領之乙酉初置江州御前諸軍都統制以步軍司前軍都統制戚方爲之詔諸路刺強盜貸死少壯者爲兵丙戌定鑄錢司歲鑄五十萬緡辛卯臨安於潛安吉三縣大水海賊陳演添作亂掠當雷二州境上南恩州民林觀禽殺之命觀以官丙申金遣蕭榮等來賀天申節壬寅落沈該致仕復觀文殿大學士知明州丙午加吳益太尉六月庚戌復出諸軍見錢關子三百萬緡聽商賈以錢銀請買庚午王綸罷辛未以江西廣東湖南折帛經總制錢合六十萬緡江西米六萬石充江州軍費後益以四州利路經總制江西茶引合二十萬緡秋七月戊寅遣明州水軍三百戍崑山黃魚塚巡捕槽船之爲盜者甲申詔諸路帥司春秋教閱禁兵弓弩手戊戌以葉義問知樞密院翰林學士周麟之同知院事御史中丞朱倬參知政事八月丙子朔日有食之壬子賀允中使還言金人必叛盟宜爲之備癸丑允中致仕甲寅復以四川經總制錢五十萬緡給總領所增招兵士壬申淮東總管許世安奏金主亮至汴京起重兵五十餘萬屯宿州謀來攻九月庚寅以帶御器械李寶爲浙西副總管提督海船駐平江丙申命劉寶招制勝軍千人丁酉罷內侍省冬十月丙午罷內侍官承受諸軍奏報文字丁未遣虞允文使金賀正旦徐度賀金主生辰庚戌雷辛酉鎮江都統制劉寶以專悍貪橫罷壬戌以劉錡爲鎮江都統制荆南右軍統制李道爲都統制癸亥日中無雲而雷癸酉

編舒和蘄黃四州民附種田租十一月庚辰禁諸路折輸職田錢癸巳夜有白氣出入危鼎間十一月乙巳朔湯思退罷初行會子于東南戊申夜白氣互天海南黎賊王文滿平己酉罷招刺三衙及江上諸軍庚戌禁掠賣生口入溪峒癸丑命戶部立經總制錢十年中數爲定額丁卯金遣僕散權等來賀明年正

旦

宋史卷三十二

元 中 書 右 丞 相 總 裁 脫 脫 等 修

本紀第三十二

高宗九

三十一年春正月甲戌朔以日食不受朝丁丑雷丁亥免湖州增丁所輸絹夜風雷雨雪交作辛卯詔江浙官民戶均輸和市緇帛壬辰劉寶落節鉞福建路居住丙申大雨雪給三衙衛士行在貧民錢及薪炭命常平振給輔郡細民諸路監司決獄己亥放張浚胡銓自便庚子禁淮南拘籍戶馬二月戊申復置卹州惠民監癸丑以趙密領殿前都指揮使甲寅罷楊存中殿前都指揮使進太傅爲醴泉觀使封同安郡王丙辰置行在會子務乙丑復鬻僧度牒詔分經義詩賦爲兩科丙寅詔通進司承受內降文字並龔封送三省樞密院辛未秦熺卒贈太傅三月甲戌朔命破敵軍統制陳敏部兵屯太平州己卯官勳臣魏仁浦馬知節余靖寇賊諸孫各一人選文臣宗室主西南外兩宗司庚辰禁兩淮抑民附種以利州西路御前諸軍都統制吳拱知襄陽府部兵三千戌之壬午以兵部尙書楊椿參知政事丁亥奪秦熺贈官及遺表恩賞庚寅以陳康伯爲尙書左僕射朱倬右僕射並同中書門下平章事辛卯復李光左中大夫官

其子孫二人壬辰地震庚子以前徽猷閣待制張宇發死節贈四官錄其子孫夏四月丁巳以久雨傷蠶麥盜賊間發命侍從臺諫條上弭災除盜之策出天申節銀十萬兩加充戶部糴本辛未遣周麟之使金賀遷都壬申權減荆南上供錢銀絹絲米之半用招填禁軍是月金主亮率文武羣臣如汝洛五月癸酉朔給兩淮民兵荒田乙亥增築禁城戊寅詔吳拱視緩急退守荆南己丑命沿淮州郡毋納北人辛卯金遣高景山王全來賀天申節全揚言無禮致其主亮語求淮漢地及指取將相近臣計事且以欽宗皇帝訃聞壬辰選兩浙江東福建諸州禁軍弓弩手之半部送樞密院按試甲午宰執召同安郡王楊存中及三衙帥趙密等至都堂議舉兵詔以王全語諭諸路統制帥守監司隨宜應變毋失機會是日爲欽宗皇帝發喪特詔持斬衰三年乙未以吳璘爲四川宣撫使仍命制置使王剛中同處置軍事丙申命主管馬軍司成閔部兵三萬人戍鄂州庚子命兩浙江湖福建諸州起禁軍弓弩手部送明州平江府江池太平三州荆南府軍前殿中侍御史陳俊卿言內侍張去爲竊權撓政乞斬之以作士氣六月乙巳以羣臣三上表始聽政丙午劉錡乞卽日移軍渡江詔錡進發騎兵屯楊州丁未出宮女三百九十人蠲臨安府禁軍闕額錢五年己酉以御史中丞汪澈爲湖北京西宣諭使辛亥金主亮遣大懷正至盱眙語送伴使呂廣問云將以六月遷汴京令其歸奏癸丑罷教坊併敕令所歸刑部乙卯以劉錡爲淮南江東西浙西制

置使戊午命帶御器械劉炎同提舉措置沿淮盜賊庚申彗出角遣步軍司都統制戚方提總江上諸軍
策應軍馬聽劉錡節制諭吳拱嚴備襄陽視緩急合田師中成閔兵以援之甲子始御正殿乙丑放女樂
二百餘人丙寅聽淮南諸州移治清野戊辰以周麟之辭使北命樞密都承旨徐嘉代行淮北民兵崔暉
夫董璘等率衆萬餘來歸秋七月丙子命兩浙江東濱海諸州預備敵兵詔諸路帥臣教閱土兵弓手戊
寅命雷州守臣節制高容廉化四州軍馬時雷州軍賊凌鐵作亂東南第十二將高居弁會五州巡尉官
兵討平之戊子周麟之分司錡州居住辛卯振給淮南歸正人壬辰徐嘉等至盱眙金主亮以非所指取
之人諭遣亟還癸巳詔四川財賦自當專任總領所如遇警急調發不及申奏則令宣制司隨宜措置先
舉後聞乙未行新造會子于淮浙湖北京西諸州是月金主亮徙都汴京命其臣劉蕡由唐鄧瞰荆襄張
中彥王彥章據秦鳳窺巴蜀蘇保衡完顏鄭家奴由海道趨兩浙八月辛丑朔忠義人魏勝復海州李寶
承制以勝知州事丙午蠲諸路逋欠經總制錢江浙等路上供米丁未以婉容劉氏妄預國政廢于家蠲
淮南京西湖北民秋稅之半辛亥以劉婉容事連坐昭慶軍承宣使王繼先福州居住停子孫官籍其賞
甲寅李寶率舟師三千發江陰大風退泊明州關澳聚兵復進乙卯劉錡引兵屯揚州遣統制王剛以兵
五千屯寶應丁巳召田師中赴行在尋以吳拱爲鄂州諸軍都統制壬戌復用資政殿學士張燾落致仕

知建康府癸亥分處歸正人於淮南諸州能自存者從便願爲兵者籍之乙丑詔便宜選補戰功人後勿
遞減丙寅出內帑錢七萬緡犒戍兵之家仍悉除軍債己巳起復成閔爲湖北京西制置使節制兩路軍
馬九月庚午朔命大臣朝饗太廟辛未宗祀徽宗于明堂以配上帝大赦甲戌金人犯黃牛堡守將李彥
堅拒却之金兵遂扼大散關吳璘駐青野原遣將高松等援之庚辰以給事中黃祖舜同知樞密院事壬
午流星晝隕乙酉詔劉錡王權李顯忠戚方嚴備清河潁河渦河口丁亥成閔渡江屯應城縣遣吳拱戍
鄂州博州民王友直聚兵大名自稱河北安撫制置使以其徒王任爲副遣軍師馮穀入朝奏事吳璘遣
將彭青至寶雞渭河夜劫金人橋頭砦破之庚寅成閔遣統制趙撙部兵五千駐德安辛卯金國趣使臣
書至楚州守臣以聞其辭多悖慢壬辰監盱眙軍淮河渡夏俊復泗州癸巳金人犯通化軍守將張超拒
卻之甲午册諡大行皇帝曰恭文順德仁孝皇帝廟號欽宗吳璘遣將劉海復秦州金守將蕭濟降乙未
金人犯信陽軍丙申吳璘遣將曹湫復洮州戊戌劉錡發揚州詔以金人背盟降敕榜招諭中原軍民己
亥蘭州漢軍千戶王宏殺其刺史温敦烏也來降吳璘遣將潘青復隴州是月金主亮以尙書右丞李通
爲大都督造浮梁于淮水之上遂自將來攻兵號百萬遠近大震冬十月庚子朔詔將親征魏勝攻沂州
敗還海州金人圍之李寶以舟師至東海縣金人解圍去寶遂入海州辛丑金人自渦口渡淮癸卯以吳

璘兼陝西河東招討使劉錡兼京東河北東路招討使成閔兼京西河北西路招討使金人陷蔣州李顯忠遣統制孔福與金人戰于大人洲敗之乙巳金人復犯海州魏勝李寶擊却之劉錡引兵次淮陰金人將自清河口入淮錡列兵于運河岸以扼之丁未命宣撫制置司傅檄契丹西夏高麗渤海諸國及河北河東陝西京東河南諸路諭出師共討金人是日金人立其東京留守葛王褻爲皇帝改元大定戊申王權聞金兵大至自廬州引兵遁屯昭關己酉知筠州武鉅招納北界杜海等二萬人來歸庚戌復置機速房知廬州龔濤聞金兵將至棄城走辛亥金將蕭琦陷滁州守臣陸廉棄城走壬子改建王瑋爲鎮南軍節度使劉錡遣統制王剛等擊敗金人于清河口金人復來戰剛失利吳拱遣將侯俊郝敦書復唐州癸丑借江浙荆湖等路坊場淨利錢三百八十萬緡以備賞軍金人圍廬州都監權州事楊椿率兵突陣出守水砦金人又攻海州李寶力戰敗之解圍去甲寅金人攻樊城吳拱遣守將翟貴王進與戰貴進俱戰死金兵亦退劉錡遣兵渡淮及金人戰死者十七八金主亮以大軍至廬州城北之五里築土城以居戚方遣將張寶復蔣州乙卯以金人渝盟告于天地宗廟社稷命州縣諭富民捐貲助國劉錡聞王權遁自淮陰引兵歸揚州丙辰金主亮入廬州王權自昭關遁金人追至尉子橋破敵軍統制姚興戰死權退保和州金州都統制王彥遣統制任天錫出洵陽復豐陽縣丁巳帝聞王權敗召楊存中同宰執議于內殿

陳康伯贊帝定議親征武鉅遣將荀琛復鄧州戊午任天錫復商洛縣命吳璘趣出兵漢中葉義問督視江淮軍馬中書舍人虞允文參謀軍事金人犯真州步軍司統制邵宏淵迎戰于胥浦橋兵敗真州陷金人不入城遂犯揚州己未任天錫復商州執其守完顏守能趙撙引兵渡淮庚申以楊存中爲御營宿衛使趙撙復虜信縣王權自和州遁歸屯于東采石辛酉復湯思退觀文殿大學士充醴泉觀使兼侍讀分行在官吏三之一屬從餘留行遣常事金人陷和州壬戌以將士勞於征討避殿減膳劉錡退軍瓜州鎮金人陷揚州淮東安撫使劉澤棄城奔泰州以戶部侍郎劉岑爲御營隨軍都轉運使李顯忠爲御營先鋒都統制屯蕪湖主管步軍司李捧爲前軍都統制趙撙復新蔡縣癸亥募諸州豪民招槍仗弓箭手赴行在金人入揚州王權自采石夜還建康尋復如采石甲子復張浚觀文殿大學士判潭州吳璘遣統制吳挺向起等及金人戰于德順軍之治平砦敗之趙撙復平興縣乙丑金人趨瓜州劉錡遣統領員琦拒之于阜角林大敗之斬其統軍高景山丙寅李寶遇金舟師于膠西縣陳家島大敗之斬完顏鄭家奴等五人劉錡還鎮江府趙撙復蔡州斬其總管揚寓分御營宿衛爲五軍金人攻秦州向起吳挺擊却之丁卯葉義問至鎮江詔起江浙福建諸州疆丁赴江上諸軍武鉅復虢州盧氏縣任天錫復朱陽縣戊辰殿中侍御史杜莘老劾內侍張去爲帝不悅去爲致仕出莘老知遂寧府十一月己巳朔邵宏淵遣統領崔

皐及金人戰于定山敗之在天錫復虢州守將蕭信遁去庚午通州守將蕭邦弼棄城去辛未成閔引兵發應城縣援淮西遣權吏部侍郎汪應辰詣浙東措置海道壬申以張浚判建康府召王權赴行在以李顯忠代將邵宏淵爲池州都統制金人犯瓜州鎮江中軍統制劉汜戰敗走權都統制李橫亦遁金人鑣騎奄至江上統制魏俊王方死之葉義問惶怖欲退走復趨建康金人游騎至無爲軍守臣韓髦棄城走癸酉淮寧府民陳亨祖執同知完顏耶魯以其城來歸趙撙引兵去蔡州復陷甲戌池州統制官崔定等復入無爲軍乙亥金主亮臨江築壇刑馬祭天期以翌日南渡丙子虞允文督建康諸軍統制官張振玉琪時俊戴皐等以舟師拒金主亮于東采石戰勝却之崔定復巢縣任天錫復上津商洛二縣丁丑虞允文遣水軍統制盛新以舟師擊金人于楊林河口又敗之金主亮焚其舟而去戊寅王彥遣將楊堅復樂川縣己卯以湯思退爲行宮留守虛恨蠻犯嘉州籠蓬堡官軍大敗副將鄭祥等爲所殺庚辰金主亮引軍趨淮東癸未吳璘病自仙人原還興州留姚仲節制軍事虞允文自采石率李捧一軍及戈船如鎮江備敵甲申贈姚興魏俊王方官金主亮至揚州乙酉貸劉汜死英州編管江州統制李貴忠義首領孟俊復順昌府金州將邢進復華州丙戌賜戰士帛給其家薪炭任天錫復陝州丁亥劉錡以疾罷以御營宿衛中軍統制劉銳權鎮江都統制成閔自京西還建康遂如鎮江戊子吳璘復力疾上仙人原己丑王權

貸死瓊州編管李寶泛海南歸金人復攻陝州任天錫破走之復犯襄陽統制官李勝等拒却之復通化軍王彥遣將楊堅党清至西京長水縣及金人戰敗之庚寅復長水縣癸巳以成閔爲鎮江都統制淮東制置使京東西路河北東路淮北泗宿州招討使李顯忠爲淮西制置使京畿河北西路淮北壽亳州招討使吳拱爲湖北京西制置使京西北路招討使甲午武鉅遣鄉兵總轄杜隱等復嵩州乙未金人陷泰州是日金人弒其主亮于揚州龜山寺戊戌金都督府遣人持檄詣鎮江軍中議和十二月己亥朔趙撝夜襲蔡州復入其城王彥遣兵復福昌縣庚子楊存中及虞允文渡江至瓜州察金兵金人犯漢南之茨湖鄂州軍士史俊登其舟獲一將諸軍繼進遂擊却之楊椿夜攻金人殺其帥高定山復廬州辛丑以李寶爲靖海軍節度使浙西通泰海州沿海制置使京東東路招討使金統軍劉夢聞茨湖敗亦退師王彥遣將閻玘復澠池縣壬寅天有白氣以趙密爲行宮在城都總管成閔渡江之揚州癸卯命諸路招討司率兵進討互相應援沿江諸大帥條陳恢復事宜復岳州舊名右軍統領沙世堅入泰州甲辰虞允文自鎮江入見均州統領管朝復鄧州乙巳張浚至慈湖命李顯忠引兵渡江丙午淮東統制王選復楚州丁未杜隱等入河南府吳拱遣統領牛宏入汝州戊申帝發臨安建王從行庚戌金人渡淮北去壬子次平江罷督視府虞允文還至鎮江癸丑淮東統制劉銳陳敏引兵入泗州鄂州統制楊欽以舟師追敗金人

于洪澤鎮乙卯江北金兵盡去李顯忠復入和州吳璘遣將復水洛城金人復破汝州牛宏敗走戊午次鎮江府庚申吳璘遣將拔金人治平砦壬戌曲赦新復州軍甲子降淮南京西湖北雜犯死罪以下囚賞采石功進統制張振時俊等官金穎壽二州巡檢高顯以壽春府來降丁卯命諸道籍鄉兵初王友直王任聚兵嘗命友直爲天雄軍節度使任爲天平軍節度使金主襲旣立下令散其衆友直等自壽春來歸是月金主知亮已死遂趨燕京

三十二年春正月戊辰朔日有食之帝在鎮江己巳金人犯壽春府忠義將劉泰戰死金兵引去庚午發鎮江府壬申至建康府張浚入見丙子祧翼祖主于夾室己卯李顯忠引兵還建康庚辰罷郡守年七十者壬午金人復犯蔡州趙撝力戰却之乙酉權知東平府耿京遣其將賈瑞掌書記辛棄疾來奏事己丑金主遣其臣高忠建等來告嗣位以耿京爲天平軍節度使知東平府庚寅詔新復州縣搜訪仗節死義之士丙申以楊存中爲江淮荆襄路宣撫使虞允文副之給事金安節中書舍人劉珙繳奏再上乃改命存中措置兩淮二月戊戌朔罷借兩浙江淮坊塲淨利錢以虞允文爲兵部尙書川陝宣諭使措置招軍市馬及與吳璘議事庚子興州統領惠逢等復河州振兩淮饑民壬寅金人犯汝州守將王宣逆戰敗之癸卯帝發建康惠逢積石軍又克來羌城丁未劉錡薨己酉王宣及金人再戰于汝州庚戌金人全師

來攻宣敗績棄去辛亥金人復犯順昌府孟新拒却之尋亦棄去壬子賞蔡州功趙撙等進官有差乙卯至臨安府興元都統制姚仲攻鞏州不下退守甘谷城遂引兵圍德順軍丙辰金人犯蔡州趙撙擊却之戊午復引兵來攻撙又敗之金兵遁去王彥遣將馬貴斷河中南橋金兵來攻貴戰敗之壬戌詔軍士戰死者祿其家一年傷重而死於營者半之乙丑王宣及右軍副將汲靖敗金人于蔡州確山縣趙撙棄蔡州丙寅金人復取之姚仲遣副將趙銓攻下鎮戎軍金同知渭州秦弼及其子嵩來歸王彥遣兵救陝州遇金人于虢州東敗之金兵引去丁卯吳玘遣將復永安軍永寧福昌長水三縣閏月癸酉金人破河州屠其城乙亥命楊存中李顯忠固守新復州軍量度進討丙子姚仲遣將復原州戊寅祔欽宗主于太廟癸未振淮南歸正人金人犯虢州吳璘遣楊從儀等攻拔大散關分兵據和尚原金人走寶雞丙戌給張浚錢十九萬緡造沿江諸軍戰艦庚寅王剛破金人于海州辛卯楊椿罷壬辰姚仲攻順德軍敗金人于瓦亭砦新店是月張安國等攻殺耿京李寶將王世隆攻破安國執之以獻三月壬寅更定金使入境接伴館伴舊儀癸卯成閔遣統制杜彥救淮寧擊敗金人于項城縣甲辰罷扈從官吏賞典乙巳錄商虢之功加吳璘少傅王彥爲保平軍節度使戊申吳璘復德順軍又遣將嚴忠取環州辛亥命兵部侍郎陳俊卿工部侍郎許尹經畫兩淮堡砦屯田癸丑金人圍淮寧府守臣陳亨祖死之甲寅吳璘自德順軍復還

河池金人犯鎮戎軍丁已遣洪邁等賀金主卽位戊午忠義軍統制知蘭州王宏拔會州金人陷淮寧府
統領戴規戰死成閔歸自淮東辛酉金人攻原州丙寅詔舉賢良夏四月丁卯朔姚仲遣兵救原州己巳
命侍從臺諫條上防秋足食足民策遣左武大夫都飛虎結約河東壬申賞御營宿衛將士四萬餘人進
官有差癸酉蠲淮東殘破州軍上供銀絹米麥及經總制錢一年蒙縣民倪震率丁口數千來歸甲戌募
民耕淮東荒田蠲其徭役及租稅七年戊寅以御史中丞汪澈參知政事金人圍海州戊子洪邁等辭行
報聘書用敵國禮是月大雨淮水暴溢數百里漂沒廬舍人畜死者甚衆五月戊戌吳璘自河池如鳳翔
巡邊姚仲遣兵救原州數敗金人庚子復置提舉秦州買馬監命四川總領官兼權其職壬寅姚仲及金
人戰于原州北嶺敗績戊申復以楊存中爲醴泉觀使奉朝請罷御營宿衛司辛亥鎮江都統制張子蓋
救海州遇金人于石湫堰大敗之金人解去甲寅命張浚專一措置兩淮事務兼節制淮東西沿江州郡
軍馬乙卯知順昌軍孟昭率部曲來歸己未吳璘遣將復熙州壬戌禁諸軍互招逃亡加鄭藻太尉振東
北流民命張浚置御前萬弩營募淮民爲之甲子詔立建王瑋爲皇太子更名杳加成閔太尉主管殿前
司李顯忠爲太尉主管馬軍司籍諸州歸正人願爲農者給官田復租十年願爲兵者赴軍中六月丙寅
朔吳璘次大幽嶺檄召姚仲至軍前下河池獄命夔路安撫使李師顏代將其兵戊辰名新宮曰德壽庚

午以吳珙主管步軍司罷三招討司甲戌加贈兄子偁爲太師中書令追封秀王謚安僖妻張氏封王夫人乙亥朱倬罷丙子詔皇太子卽皇帝位帝稱太上皇帝退處德壽宮皇后稱太上皇后孝宗卽位累上尊號曰光堯壽聖憲天體道性仁誠德經武緯文紹業興統明謨盛烈太上皇帝淳熙十四年十月乙亥崩于德壽殿年八十一謚曰聖神武文憲孝皇帝廟號高宗十六年三月丙寅攢于會稽之永思陵光宗紹熙二年加謚受命中興全功至德聖神武文昭仁憲孝皇帝

贊曰昔夏后氏傳五世而后羿篡少康復立而祀夏周傳九世而厲王死于彘宣王復立而繼周漢傳十有一世而新莽竊位光武復立而興漢晉傳四世有懷愍之旤元帝正位於建鄴唐傳六世有安史之難肅宗卽位於靈武宋傳九世而徽欽陷于金高宗續圖于南京六君者史皆稱爲中興而有異同焉夏經羿泥周歷共和漢間新室更始晉唐宋則歲月相續者也蕭王琅琊皆出疏屬少康宣王肅宗高宗則父子相承者也至於克復舊物則晉元與宋高宗視四君者有餘責焉高宗恭儉仁厚以之繼體守文則有餘以之撥亂反正則非其才也況時危勢逼兵弱財匱而事之難處又有甚於數君者乎君子於此蓋亦有憫高宗之心而重傷其所遭之不幸也然當其初立因四方勤王之師內相李綱外任宗澤天下之事宜無不可爲者顧乃播遷窮僻重以苗劉羣盜之亂權宜立國確虛藉哉其始惑於汪黃其終制於姦楮

情墮猥懦坐失事機甚而趙鼎張浚相繼竄斥岳飛父子竟死於大功垂成之秋一時有志之士爲之扼
拳切齒帝方安忍恥置怨忘親卒不免於來世之誦悲夫

宋史卷三十三

元 中 書 右 丞 相 總 裁 脫 脫 等 修

本紀第三十三

孝宗一

孝宗紹統同道冠德昭功哲文神明聖成孝皇帝諱昀字元永太祖七世孫也初太祖少子秦王德芳生英國公惟憲惟憲生新興侯從郁從郁生華陰侯世將世將生慶國公令諱令諱生子偁是爲秀王王夫人張氏夢人擁一羊遺之曰以此爲識已而有娠以建炎元年十月戊寅生帝于秀州青衫牖之官舍紅光滿室如日正中少長命名伯琮及元懿太子薨高宗未有後而昭慈聖獻皇后亦自江西還行在后嘗感異夢密爲高宗言之高宗大寤會右僕射范宗尹亦造膝以請高宗曰太祖以神武定天下子孫不得享之遭時多艱零落可憫朕若不法仁宗爲天下計何以慰在天之靈於是詔選太祖之後同知樞密院事李回曰藝祖不以大位私其子發於至誠陛下爲天下遠慮合於藝祖可以昭格天命參知政事張守曰藝祖諸子不聞失德而傳位太宗過堯舜遠甚高宗曰此事不難行朕於伯字行中選擇庶幾昭穆順序而上虞丞婁寅亮亦上書言昌陵之後寂寥無聞僅同民庶藝祖在上莫肯顧歆此金人所以未悔

禍也望陛下於伯字行內選太祖諸孫有賢德者高宗讀之大感歎紹興二年五月選帝育于禁中三年二月除和州防禦使賜名璩壬寅改貴州五年五月用左僕射趙鼎議立書院宮中教之既成遂以爲資善堂帝讀書彊記天資特異己亥制授保慶軍節度使封建國公六月己酉聽讀資善堂以徽猷閣待制范冲兼翊善起居郎朱震兼贊讀高宗命帝見冲震皆拜十二年正月丁酉加檢校少保封普安郡王三月壬寅出閣就外第十三年九月秀王歿于秀州十四年正月庚辰用廷臣議聽解官行服十六年四月乙巳免喪還舊官十七年六月戊午改常德軍節度使二十四年衡州盜起秦檜遣殿前司將官辛立將千人捕之不以聞帝入侍言之高宗大驚明日以問檜檜謂不足煩聖慮故不敢聞俟朝夕盜平則奏矣檜退知爲帝言忌之及檜疾篤其家祕不以聞謀以子熿代相帝又密啟高宗破其奸三十年二月癸酉立爲皇子更名瑋甲戌詔下丙子制授寧國軍節度使開府儀同三司進封建王制出中外大悅四月賜字元環三十一年十月壬子以明堂恩改鎮南軍節度使先是金人犯邊高宗下詔親征而兩淮失守朝臣多陳退避之計帝不勝其憤請率師爲前驅直講史浩以疾在告聞之亟入爲帝言太子不宜將兵乃爲草奏因中宮以進請衛從以共子職高宗因亦欲帝徧識諸將十二月遂扈蹕如金陵三十二年五月甲子立爲皇太子改名昚初高宗久有禪位之意嘗以諭帝帝流涕固辭會有邊事不果及歸自金陵陳

康伯求去高宗復以倦勤諭之中書舍人唐文若聞而請對言不宜急遽故先下建儲之詔賜名熈監察御史周必大密與康伯言與唐昭宗名同音不可詔別擬進乃定今名既又命學士承旨洪遵爲太子擇字遵擬四字以進皆不稱旨甲戌御筆賜字元永乙亥內降御札皇太子可卽皇帝位朕稱太上皇帝退處德壽宮皇后稱太上皇后丙子遣中使召帝入禁中面諭之帝又推遜不受卽趨側殿門欲還東宮高宗勉諭再三乃止於是高宗出御紫宸殿輔臣奏事畢高宗還宮百官移班殿門外拜詔畢復入班殿庭頃之內侍掖帝至御榻前側立不坐內侍扶掖至七八乃略就坐宰相率百僚稱賀帝遽興輔臣升殿固請帝愀然曰君父之命出於獨斷然此大位懼不克當班退太上皇帝卽駕之德壽宮帝服袍履步出祥曦殿門冒雨掖輦以行及宮門弗止上皇磨謝再三且令左右扶掖以還顧曰吾付托得人吾無憾矣左右皆呼萬歲是日詔有司議太上皇帝太上皇后尊號以聞在內諸司日輪官吏應奉德壽宮增置德壽宮提點幹辦等官德壽宮宿衛依皇城及宮門法丁丑朝德壽宮戊寅大赦詔宰相率百官月兩朝德壽宮己卯以卽位告于天地宗廟社稷庚辰詔五日一朝德壽宮以左武大夫龍大淵爲樞密副都承旨武翼郎曾觀帶御器械癸未始御後殿甲申詔中外士庶陳時政闕失丙戌詔進宰執官二等丁亥詔以太上皇不許五日一朝自今月四朝復除名勒停人胡銓官知饒州己丑詔有司月奉德壽宮緡錢十萬辛

卯詔罷四川市馬壬辰詔百官日一人入對癸巳蝗甲午上太上皇帝尊號曰光堯壽聖太上皇帝太上皇后曰壽聖太上皇后乙未晦金人屠原州秋七月戊戌興州中軍統制吳挺復鞏州庚子判建康府張浚入見以雨水飛蝗令侍從臺諫條上民間利害壬寅詔戒飭諸郡守臣癸卯以張浚爲少傅江淮宣撫使封魏國公甲辰以參知政事汪澈視師湖北京西遣劉珙等使金告卽位戊申以四川宣撫使吳玠兼陝西河東路宣撫招討使追復岳飛元官以禮改葬是夜地震大風拔木己酉有事于太廟別廟癸丑馬軍司中軍統制趙撝忠義軍統領皇甫偁復光州甲寅朝獻景靈宮詔淮南諸州存恤淮北來歸之民權免稅役丙辰以少保保康軍節度使吳益爲少傅太尉靈武軍節度使吳蓋爲開府儀同三司丁巳罷李寶措置海道戊午恩平郡王璩入見庚申以御前軍器所仍隸工部辛酉詔後省看詳中外上書有可采者以聞壬戌以黃祖舜兼權參知政事罷諸路聖節進奉詔李顯忠軍馬聽張浚節制癸亥增將士戰傷死者推恩格詔蠲四川積年逋負八月乙丑朔四川馬軍統制高師中與金人戰于摧沙敗死丙寅吳玠與金人戰于德順軍己巳以翰林學士史浩爲參知政事戊寅率羣臣詣德壽宮奉上太上皇帝太上皇后尊號册寶丁亥班寬恤事十八條起居舍人洪邁知閤門事張掄坐奉使辱命罷甲申吳玠敗金人于北山戊子追復李光資政殿學士趙鼎范冲並還合得恩數庚寅以生日爲會慶節追册故妃郭氏爲皇

后九月甲午以子愔爲少保承興軍節度使進封鄧王愔爲雄武軍節度使開府儀同三司進封慶王愔
爲鎮洮軍節度使開府儀同三司進封恭王甲午金人攻德順軍東山堡中軍將李摩戰死丁酉詔開講
日召輔臣觀講川陝宣諭使虞允文以論邊事不合罷己亥詔侍從臺諫舉知四川利害可爲都轉運使
者庚子以金人來索舊禮詔宰執侍從臺諫各陳應敵定論以聞辛丑詔吳璘審度措置保全川蜀乙巳
詔纂錄勳臣名次丙午轉補朱震范冲子孫官庚戌諡皇后郭氏曰恭懷辛亥振淮東義兵及歸正人以
總領四川財賦軍馬錢糧王之望爲戶部侍郎川陝宣諭使仍命將調兵同防守興州川口乙卯詔虞允
文赴吳璘軍議事辛酉以吳璘爲少師冬十月丙寅詔朝臣舉堪監司郡守者戊辰以岳陽軍節度使居
廣開府儀同三司史浩兼權知樞密院事己巳葉義問罷詔登聞鼓院毋沮抑進狀庚午以恩平郡王璩
爲少保詔會慶節權免上壽戊寅詔張浚陳俊卿覆實諸將所陳功賞改諡皇后郭氏曰安穆壬午官岳
飛孫六人甲申契丹招討蕭鷓巴來奔金人攻德順城吳璘擊走之復遣兵追襲遂爲所敗乙酉升建州
爲建寧府戊子以資政殿學士張燾同知樞密院事己丑安南都護南平王李天祚闍婆國王悉里地茶
蘭固野占城國王鄒時巴蘭並加食邑實封十一月庚子以蕭鷓巴爲忠州團練使乙巳金人攻水洛城
丙午賜忠義軍統制皇甫侗軍帛五千匹綿萬兩戊申詔改明年爲隆興元年辛亥免楊存中所獻酒坊

進貢錢四十萬緡甲寅定內侍官額辛酉史浩免權知樞密院事裁定文武臣宮觀嶽廟員數立措置京西營田司十二月乙丑詔宰臣復兼樞密使金人攻隴城縣官軍拒却之丙寅詔帥臣監司具部內知州治行臧否以聞詔棄德順城徙兵民于秦州以裏屯住丁卯以陳康伯兼樞密使令江淮宣撫司增招武勇效用軍戊辰詔侍從臺諫集議當今弊事仍命盡率其屬使極言無隱辛未劉珙張說還自盱眙戊寅蠲四川赦前登帶白契稅錢丙戌詔觀察使已上各舉所知三人三省樞密院詳議立格以聞庚寅罷建康鎮江營田官兵辛卯廣西賊王宣破藤州守臣廖顒棄城遁是歲諸路斷大辟四十一人

隆興元年春正月壬辰朔羣臣朝于文德殿帝朝德壽宮立武臣薦舉格甲午四川宣撫司奉詔班師庚子以史浩爲尙書右僕射同中書門下平章事兼樞密使張浚進樞密使都督江淮東西路軍馬丙午誅殿前司後軍謀變者戊申詔禮部貢院試額增一百人丁巳詔吳璘軍進退可從便宜璘已棄德順道爲金人所邀將士死者數萬計二月壬戌朔用史浩策以布衣李信爲兵部員外郎齎蠟書問道往中原招豪傑之據有州郡者許以封王世襲安慶軍節度使士籤乞減奉賜之半以助軍用自是諸宗室有請悉從之戊辰宰執陳康伯等乞再減奉止存舊格之半許之己卯振兩淮流民及山東歸正忠義軍癸未黃祖舜罷庚寅逐秦檜黨人仍禁輒至行在三月壬辰朔金右副元帥紇石烈志寧以書取侵地癸巳以張

燾爲參知政事御史中丞辛次膺同知樞密院事葉義問落端明殿學士饒州居住丙申雨雹丁酉詔戶部置局議節浮費己亥楊存中等乞減半奉如宰執例許之庚子以龍大淵知閤門事曾覲同知閤門事壬寅陳康伯上欽宗陵名曰永獻乙巳詔求遺逸丁未詔修太上皇帝聖政罷龍大淵別與差遣曾覲復帶御器械召張浚己酉張燾罷立選人減舉主法甲寅復以龍大淵知閤門事曾覲同知閤門事給事中中書舍人留黃不行乙卯詔飭郡縣吏庚申以久雨命有司振災傷察刑禁夏四月乙丑定選人改官歲額戊辰張浚入見議出師渡淮三省樞密院不預聞壬申賜禮部進士李待問以下五百三十八人及第出身乙亥王之望罷壬午詔戶部臺諫議節浮費癸未詔以白金二十五萬兩給江淮都督府軍費戊子張浚命邵宏淵帥師次盱眙乙丑又命李顯忠帥師次定遠是月金人拔環州守臣強靄及其弟震死之五月壬申申嚴鋪翠銷金及神祠僭擬之禁丁酉李顯忠復靈壁縣邵宏淵次虹縣金人拒之戊戌顯忠東趨虹縣庚子復虹縣金知泗州蒲察徒穆及同知泗州大周仁降辛丑命左右史日更立前殿壬寅張浚渡江視師癸卯金右翼軍都統蕭琦降于李顯忠甲辰顯忠及宏淵敗金人于宿州乙巳史浩罷追復司馬康右諫議大夫丙午復宿州戮金兵數千人建康前軍統領官王瑛巷戰死之丁未以辛次膺爲參知政事翰林學士承旨洪遵同知樞密院事督諸路開營田辛亥詣德壽宮賀天申節金紘石烈志盜自

睢陽引兵至宿州李顯忠擊卻之壬子欽宗大祥帝服衰服詣几筵易祥服行祥祭禮顯忠與金人戰于宿州邵宏淵不援顯忠失利是夜建康中軍統制周宏及邵宏淵之子世雄殿前司統制官左士淵逃歸癸丑進李顯忠開府儀同三司淮南京畿京東河北招討使邵宏淵檢校少保寧遠軍節度使招討副使金人攻宿州城顯忠大敗之殿前司統制官張訓通等七人統領官十二人以二將不叶而遁甲寅李顯忠邵宏淵軍大潰于符離乙卯下詔親征丙辰召汪澈以張浚兼都督荆襄軍馬李顯忠邵宏淵至濠州張浚以劉寶爲鎮江諸軍都統制丁巳以蒲察徒穆大周仁蕭琦並爲節度使徒穆大同軍周仁彰國軍琦威塞軍遣御前忠勇軍赴都督府是月成都地震三六月庚申朔日有食之遣內侍趣上淮東將士功賞癸亥汪澈罷張浚乞致仕且請通好皆不許丁卯以觀文殿大學士湯思退爲醴泉觀使兼侍讀戊辰召虞允文以兵部侍郎周葵爲參知政事汪澈落資政殿學士台州居住庚午張浚自盱眙還揚州辛未李顯忠罷軍職壬申以太傅同安郡王楊存中爲御營使節制殿前司軍馬癸酉下詔罪己張浚降授特進仍前樞密使江淮東西路宣撫使官屬各奪二官邵宏淵降武義大夫職仍舊詔楊存中先詣建康措置營砦檢視沿江守備戊寅詔展巡幸之期辛次膺罷己卯李顯忠責授清遠軍節度副使筠州安置辛巳命浙西副都總管李寶兼御營統制官措置浙西海道甲申右諫議大夫王大寶入對論移蹕以敷文

閣學士虞允文爲兵部尙書兼湖北京西宣諭使戊子放宮人三十人以蕭琦爲檢校少保河北招撫使
秋七月庚寅朔以虞允文爲湖北京西制置使癸巳以湯思退爲尙書右僕射同中書門下平章事兼樞
密使李顯忠再責授果州團練副使潭州安置乙未詔宿州棄軍將佐奪官貶竄有差丙申太白晝見經
天罷江淮宣撫司便宜行事乙巳以旱蝗星變詔侍從臺諫兩省官條上時政闕失丁未詔徵李顯忠侵
欺官錢金銀免籍其家乙卯裁減省部寺監官吏戊午給還岳飛田宅八月丙寅張浚復都督江淮軍馬
庚午以劉寶兼淮東招撫使丙子以飛蝗風水爲災避殿減膳罷借諸路職田之令戊寅金紇石烈志盜
又以書求海泗唐鄧四州地及歲幣癸未復以龍大淵知閤門事曾覲同知閤門事丙戌遣淮西安撫司
幹辦公事盧仲賢等齎書至金帥府戒勿許四州差減歲幣仍命諸將毋遣兵人出境九月己酉楊存中
罷冬十月戊午朔大臣奏金帥書言四事帝曰四州地歲幣可與名分歸正人不可從辛酉御殿復膳己
巳遣護聖軍戍江南丙子詔太上皇后教旨改稱聖旨立賢妃夏氏爲皇后丁丑地震辛巳升洪州爲隆
興府詔江淮軍馬調發應援從都督府取旨餘事悉以聞十一月己丑盧仲賢自宿州以金都元帥僕散
忠義遣三省樞密院書來庚子遣王之望等爲金國通問使辛丑詔侍從臺諫於後省集議講和遣使禮
數士貢四事仍各薦可備小使者丙午盧仲賢擅許四州下大理寺奪三官召張浚癸丑以胡昉楊由義

爲使金通問國信所審議官十二月己未陳康伯罷乙丑張浚入見丁丑以湯思退爲尙書左僕射張浚爲右僕射並同中書門下平章事兼樞密使浚仍都督江淮東西路軍馬壬午西南方有白氣是歲以兩浙大水旱蝗江東大水悉蠲其租

二年春正月辛卯詔增德壽宮車輦儀衛壬辰御文德殿册皇后癸巳修三省法乙未及皇后朝德壽宮丙申命虞允文調兵討廣西諸盜庚子罷諸州招軍丙午金僕散忠義復以書來庚戌申嚴卿監郎官更出迭入之制壬子振歸正人甲寅白氣互天是月福建諸州地震二月辛未蠲秀州貧民逋租壬申容州妖賊李雲作亂癸酉復王權武義大夫命權廣西路都鈐轄專一措置盜賊丙子詔飭將帥減文武官及百司吏郊賜之半罷兩浙福建江西湖南夔州路參議官丁丑雨雪及雪獲李雲其黨悉平乙酉胡昉自宿州還初金帥以昉等不許四郡械繫之昉等不屈金主命歸之三月丙戌朔詔張浚視師于淮又詔王之望等以幣還丁亥詔荆襄川陝帥臣嚴邊備毋先事妄舉盧仲賢除名械送郴州編管壬寅詔知光州皇甫偁毋招納歸正人丙午王宣等降詔三衙戍兵歸司建康鎮江大軍更番歸若庚戌芝生德壽宮以戶部侍郎錢端禮爲淮東宣諭使吏部侍郎王之望爲淮西宣諭使詔撫諭兩淮軍民壬子以廣西賊平詔減高藤雷容四州雜犯死罪囚釋杖以下蠲夏秋稅賦以忠勇軍隸步軍司神勁右軍隸鎮江都統司

癸丑以王彥爲建康諸軍都統制兼淮西招撫使夏四月庚申召張浚還朝甲子以李顯忠侵欺官錢給還諸軍丁卯以建康歸正人爲忠毅軍鎮江爲忠順軍命蕭琦蕭鷓巴分領之戊辰罷江淮都督府高麗入貢丁丑張浚罷癸未言者論宰相執政徇欺之弊命書寘政事堂五月壬辰復置環衛官丙申詔吳璘毋招納歸正人辛丑詔劉寶量度泗州輕重取舍事宜以聞江西總管邵宏淵責授靖州團練副使南安軍安置仍徵其盜用庫錢乙巳率羣臣詣德壽宮賀天申節始用樂丁未蝗詔內外職私不法官吏尙書省置籍檢勘庚戌罷招神勁效用軍辛亥鬻兩淮所招戶馬六月甲寅朔日有食之辛酉以淫雨詔州縣理滯囚戊辰太白晝見壬申命虞允文棄唐鄧允文不奉詔丁丑賑江東兩淮被水貧民秋七月乙酉召虞允文以戶部尙書韓仲通爲湖北京西制置使丁亥洪遵罷己丑以周葵兼權知樞密院事遣主管馬軍司公事張守忠以兵詣淮西措置邊備庚子太白經天詔內外文武官年七十不請致仕者遇郊毋得蔭補己巳命海泗州撤戍丁未雨雪戊申蠲淮東內庫坊場錢一年庚戌洪遵落端明殿學士癸丑以江西浙西大水詔侍從臺諫卿監郎官館職陳闕失及當今急務是月罷內侍押班梁珂爲在外宮觀移廣西提刑司于容州八月甲寅朔以災異避殿減膳戊午南丹州莫延廩爲諸蠻所逐來歸詔補修武郎命江東浙西守臣措置開決圍田甲子秦國大長公主薨已久雨決繫囚庚辰以資政殿大學士賀允中爲

知樞密院事兼參知政事辛巳詔擬淮東被水州縣張浚薨壬午遣魏杞等爲金國通問使九月甲申罷內侍李珂賜諡甲午詔江東浙西監司守臣講明措置田事乙未交趾入貢丁酉嚴賊吏法辛丑以王之望爲參知政事權刑部侍郎吳芾爲給事中兼淮西宣諭使金人犯邊以久雨出內庫白金四十萬兩糴米賑貧民壬寅王彥帥師濟江軍昭關癸卯命湯思退都督江淮東西路軍馬辭不行乙巳復命楊存中爲同都督錢端禮吳芾並爲都督府參贊軍事罷宣諭司仍易國書以付魏杞少保崇信軍節度使趙密落致仕權領殿前司職事冬十月甲寅魏杞至盱眙金帥以國書未如式弗受欲得商秦地及俘獲人且邀歲幣三十萬杞未得進丁卯賀允中罷爲資政殿大學士致仕己巳以周葵兼權知樞密院事王之望兼同知樞密院事庚午詔輔臣夕對便殿丙子大風庚辰蠲京西湖北運糧所經州縣秋稅之半以靖海軍節度使李寶爲沿海駐劄御前水軍都統制辛巳金人分道渡淮劉寶棄楚州遁十一月乙酉知楚州魏勝與金人戰死之州遂陷濠州亦陷壬彥棄昭關遁滁州又陷丙戌詔諭沿邊將士丁亥詔魏杞等以所賞禮幣犒軍杞弗從命留鎮江候旨復命王之望督視江淮軍馬戊子以金人侵擾詔郊祀改用明年又詔諭歸正官民軍士命王之望同都督江淮軍馬湯思退罷都督召陳康伯己丑王之望罷同都督庚寅命楊存中都督江淮軍馬辛卯湯思退罷尋以尹穡晁公武論之落觀文殿大學士永州居住未至而

卒甲午以黃榜禁太學生伏闕是日太學生張觀等七十二人上書請斬湯思退王之望尹穡竄其黨洪
适冕公武而用陳康伯胡銓等以濟大計丙申遣國信所大通事王抃持周葵書如金帥府請正皇帝號
爲叔姪之國易歲貢爲歲幣減十萬割商秦地歸被俘人惟叛亡者不與誓目大略與紹興同以金人犯
淮南詔避殿減膳丁酉詔擇日視師戊戌以少保觀文殿大學士陳康伯爲尙書左僕射同中書門下平
章事兼樞密使庚子遣兵部侍郎胡銓右諫議大夫尹穡分詣兩浙措置海道贈魏勝靈國軍節度使諡
忠壯辛丑兵部尙書錢端禮賜出身簽書樞密院事兼提領德壽宮壬寅詔侍從兩省官日一至都堂議
事有關臺諫者亦聽會議以顯謨閣學士虞允文同簽書樞密院事癸卯遣王之望勞師江上甲辰金人
犯六合縣步軍司統制崔阜擊却之乙巳以錢端禮兼權參知政事丁未以顯謨閣直學士沈介爲沿江
制置使命沿江諸州調保甲分守渡口己酉劉寶落節鉞爲武泰軍承宣使王彥落龍神衛四廂都指揮
使閏月甲寅陳康伯入見詔康伯問日一朝肩輿至殿門給扶升殿丙辰周葵罷王抃見金二帥皆得其
報書以歸戊午蕭琦卒壬戌詔罷胡銓尹穡丙寅召韓仲通以沈介爲兵部尙書湖北京西制置使戊辰
以金人且退詔督府擇利擊之王之望執不可乙亥之望罷丙子以王抃爲奉使金國通問國信所參議
官持陳康伯報書以行丁丑金遣張恭愈來迓使者詔臺諫侍從兩省官舉楚廬滁濠四州守臣十二月

甲申罷陝西路轉運司戊子魏杞始渡淮詔郊祀大禮遵至道典故改用來年正月一日上辛辛卯以錢端禮爲參知政事兼知樞密院事虞允文同知樞密院事兼權參知政事禮部尙書王剛中簽書樞密院事丙申制曰比遣王抃遠抵潁濱得其要約尋澶淵盟誓之信做大遼書題之儀正皇帝之稱爲叔姪之國歲幣減十萬之數地界如紹興之時憐彼此之無辜約叛亡之不遣可使歸正之士咸起靈居之心重念數州之民罹此一時之難老穉有蕩析之裁丁壯有係累之苦宜推蕩滌之宥少慰彫殘之情應沿邊被兵州軍除逃遁官吏不赦外雜犯死罪情輕者減一等餘並放遣遣洪适等賀金主生辰詔吳挺市馬赴行在己亥雨雹壬寅罷三衙江上荆襄諸軍招軍甲辰遣沿海水軍還屯己酉朝獻景靈宮庚戌朝饗太廟

乾道元年春正月辛亥朔合祀天地于圜丘大赦改元丁巳淮西安撫韓璣勒停賀州編管庚申以錢端禮兼德壽宮使辛酉召楊存中通問使魏杞至燕山丁卯以王抃使金有勞進五官庚午西北方有白氣詔館職更迭補外辛未立兩淮守令勸民種桑賞壬申詔兩浙振流民以紹興流民多死罷守臣徐嘉及兩縣令癸酉蠲沿邊殘破州軍官賦一年甲戌劉寶責果州團練副使瓊州安置乙亥罷兩淮招撫司及陝西河東宣撫招討司丙子淮西守將孔福以遇敵棄城伏誅頓遇奪官刺面配吉陽軍牢城二月庚辰

朔朝德壽宮從太上皇太上皇后幸四聖觀乙酉罷江淮都督府遣官檢察兩淮州縣振濟饑民庚寅雨
雹癸巳移濠州戍兵于藕塘庚子以楊存中爲靈遠昭慶軍節度使甲辰以久雨避殿減膳蠲兩淮災傷
州縣身丁錢絹決繫囚丁未陳康伯薨諡文恭三月甲寅太白晝見己未御殿復膳庚申以虞允文爲參
知政事兼同知樞密院事王剛中同知樞密院事命淮西湖北荆襄帥臣措置屯田復置榷場癸亥黃祖
舜薨戊辰白氣亙天己巳罷諸軍額外制領將佐乙亥太白經天是春湖南盜起入廣東焚掠州縣官軍
討平之夏四月庚子金報問使完顏仲等入見乙巳吳璘入見五月庚戌以璘爲太傅封新安郡王丙辰
詔有司治皇后家廟壬戌詔監司帥守講究弊事以聞合廣南東西路監事爲一司癸亥詔總領帥漕臣
諸軍都統制並兼提領措置屯田沿邊守臣兼管屯田事丁卯詔吳璘措置馬綱水路壬申蠲四川州縣
虛額錢吳璘改判興元府乙亥詔未銓試人毋得堂除丙子遣李若川等使金賀上尊號增置諸路鈐轄
都監郴州盜李金等復作亂遣兵討捕之六月癸未王剛中薨乙酉詔恭王府直講王淮傾邪不正有違
禮經可與外任丙戌以翰林學士洪适簽書樞密院事戊子步軍司統制官崔阜坐奏功冒濫奪所遷觀
察使止進橫行三官令本軍自效辛卯以武經郎令德爲安定郡王壬辰以淮南轉運判官姚岳言境內
飛蝗自死奪一官罷之丙申以兩淮守令勞祿安集無效下詔戒飭之仍以詔置守令治所壬寅蠲廣東

殘破郡縣稅賦甲辰罷湖北京西制置司秋七月辛亥詔知州年七十以上者與宮觀癸丑輔臣晚對選
德殿御坐後有大屏記注諸道監司郡守姓名因令都堂視此書之甲寅借職田租二年以裨經費己未
鑄當二錢己巳蠲關外四州民今年租稅及湖南賊蹂郡縣夏稅八月己卯以永豐圩田賜建康都統司
癸未獲李金乙酉詔立子愔爲皇太子丁亥虞允文罷戊子大赦己丑以洪适爲參知政事兼權知樞密
院事吏部侍郎葉顥簽書樞密院事兼權參知政事庚寅立知州軍諸路總管鈐轄都監辭見法癸巳錢
端禮以避東宮親嫌罷爲資政殿大學士提舉萬壽觀戊戌吏部侍郎章服以論虞允文阿附罷謫居汀
州九月乙卯立廣國夫人錢氏爲皇太子妃丁巳甲巖百司官出入局之制丁卯升鼎州爲常德府甲戌
以端明殿學士汪澈知樞密院事洪适兼同知樞密院事乙亥置沿淮諸州都巡檢冬十月己卯遣方愔
等使金賀正旦戊子增頭子錢歸正人右通直郎劉蘊古坐以軍器法式送北境伏誅壬辰御大慶殿冊
皇太子癸巳詣德壽宮稱謝乙未詔侍從各舉所知宗室一二人丁酉金遣高衍等來賀會慶節乙巳淮
北紅巾賊踰淮劫立賞討捕之己而知楚州胡明遣巡尉擊殺其首蕭榮十一月辛亥招收兩淮流散
忠義人丙寅白氣互天辛未遣龍大淵撫諭兩淮措置屯田督捕盜賊十二月戊寅以洪适爲尙書右僕
射同中書門下平章事兼樞密使汪澈爲樞密使命廣東提刑司招安李金餘黨癸未遣王曠等質金主

生辰庚寅以葉顥爲參知政事兼同知樞密院事辛卯詔侍從臺諫兩省舉堪監司郡守者各一人三衙知閣舉材武可守邊者一人庚子罷兩淮諸州權攝官壬寅金遣烏古論忠弼等來賀明年正旦癸卯詔樞密院文書依三省式經中書門下畫黃書讀至正

二年春正月辛酉省六合戍兵以所墾田給還復業之民辛未命湖南監司存恤寇盜殘破郡縣二月丁丑罷盱眙屯田振兩浙江東饑戊寅幸玉津園宴射遂幸龍井三月乙巳禁京西利州路科役保勝義士壬子詔戒飭刑獄官戊午殿中侍御史王伯庠請裁定奏薦詔三省臺諫集議具條式以聞詔縣令非兩任毋除監察御史非任守臣毋除郎官著爲令丁卯賜禮部進士蕭國梁以下四百九十有三人及第出身戊辰再增諸州軍離軍添差員闕辛未罷洪适右僕射癸酉以給事中權吏部尙書魏杞同知樞密院事兼權參知政事丁丑罷和糴夏四月戊寅以久雨命侍從臺諫議刑政所宜以聞減大理三衙臨安府及浙西州縣雜犯死罪以下囚一等釋杖以下庚辰詔兩浙漕臣王炎開平江湖秀園田辛巳避殿減膳甲申太白晝見癸巳御殿復膳乙未汪澈罷丁酉以知荆南府李道憑恃戚里妄作罷之五月戊申張壽薨己酉罷權借職田庚戌葉顥罷以魏杞爲參知政事右諫議大夫林安宅同知樞密院事兼權參知政事申書舍人蔣芾簽書樞密院事癸丑太白晝見經天禁浙西修築園田罷修建康行宮丁卯命監司守

臣預備水旱六月甲戌罷兩浙路提舉市舶司詔諸路監司帥臣各察守令臧否以聞丙子刑部上乾道
新編特旨斷例戊寅詔制科權罷注疏出題守臣監司亦許解送庚辰封孫挺爲福州觀察使榮國公摠
爲左千牛衛大將軍癸未詔使相毋奏補文資七色補官人毋任子堂吏遷朝議大夫以五員爲額乙酉
申嚴內外牒式法裁其額丙戌廢永豐圩戊戌詔改官人實厯知縣一任方許關升著爲定式秋七月己
酉調泉州左翼軍二千人屯許浦鎮甲寅以鎮江都統制戚方爲武當軍節度使八月辛未朔詔兩淮行
鐵錢銅錢毋過江北癸酉以武鋒軍隸步軍司甲戌罷任子年三十得免試參選之令丁丑蠲淮南放歸
萬弩手差役二年壬午詔諸州守臣兼訓練禁軍癸未降會子交子于鎮江建康務場令江淮之人對換
丙戌林安宅劾葉顥之子受金失實罷之丁亥詔安宅筠州居住温州大水戊子以魏杞兼同知樞密院
事蔣芾權參知政事召葉顥庚寅少保新興郡王吳蓋薨甲午立中興以來十三處戰功格目乙未詔吳
璘復判興州丙申升宣州爲監國府罷戶部諸路歲糴一年九月甲辰知上元縣李允升犯贓貸死杖脊
刺面配惠州牢城籍其貲丙午建康守臣王佐坐縱允升去官奪三官勒停建昌軍居住餘失按官吏及
薦舉官奪官有差辛亥遣官按視温州水災振貧民決繫囚乙卯詔改造大厓辛酉追封子恪爲邵王諡
曰悼蕭甲子詔監司各舉部內知縣縣令二三人守臣各舉屬縣一二人己巳魏杞等上神宗哲宗徽宗

三朝帝紀太上皇聖政太白晝見是月詔舉將帥置章奏簿冬十月癸酉上太上皇聖政于德壽宮乙亥遣薛良朋等使金賀正旦己卯減饒州歲貢金三之一蠲諸路酒坊逋賦戊子知峽州呂令問坐縱賊吏知夷陵縣韓贄胄去官奪二官鄂州居住辛卯雨雹金遣魏子平等來賀會慶節十一月丙午楊存中薨己酉盡出內藏及南庫銀以易會子官司並以錢銀支遣民間從便兩淮總領所許自造會子鬻諸路營田壬子詔修祥曦殿記注乙卯密詔四川制置使汪應辰如吳璘不起收其宣撫使牌印權行主管職事甲子大閱戊辰築鄧州城是月詔汰冗兵十二月庚午朔白氣互天癸酉詔三省侍從臺諫兩淮漕臣郡守條具兩淮鐵錢交子利害以聞乙亥遣梁克家等賀金主生辰己卯以資政殿學士葉顥知樞密院事辛巳詔免進呈欽宗日麻送國史院修纂實錄壬午追封楊存中爲和王甲申以葉顥爲尙書左僕射魏杞右僕射並同中書門下平章事兼樞密使蔣芾參知政事吏部尙書陳俊卿同知樞密院事兼樞密參知政事庚寅詔宰相領兼制國用使參知政事同知國用事癸巳詔監司守臣舉廉吏丙申金遣烏古論元忠等來賀明年正旦以江東兵馬鈐轄王抃爲帶御器械是歲裁定內外軍額

宋史卷三十三

宋史卷三十四

元中書右丞相總裁脫脫等修

本紀第三十四

孝宗二

三年春正月甲辰詔廷尉大理官毋以獄情白宰執探刺旨意爲輕重庚戌置三省戶房國用司初以國用置之罷江州屯駐軍馬至是復留之癸亥罷銅錢過江之禁裁定利州西路諸軍額二月壬申詔國用司月上宮禁及百司官吏三衙將士請給之數癸酉出龍大淵爲江東總管會覲爲淮西總管甲戌大淵改浙東覲改福建乙亥罷成都潼州路轉運司輪年銓試以其事付制置司辛巳以端明殿學士虞允文知樞密院事癸未雨雹甲申爲知陳州陳亨祖立廟于光州賜名愍忠丙戌以武經總管孫子賜鎮江都統戚方建康都統劉源癸巳措置淮東山水砦丙申從太上皇太上皇后幸玉津園戊戌直祕閣前廣東提刑石敦義犯贓刺面配柳州籍其家正月甲辰從太上皇太上皇后幸聚景園辛亥詣德壽宮恭請裁定醫官員額丁巳詔四川宣撫司創招人置司所在屯駐壬戌伯母秀王夫人張氏薨夏四月辛未蠲諸路州軍逋負癸酉爲秀王王夫人成服于後苑百官進名奉慰丁丑合利州東西路爲一戊寅以吳璘

知興元府充利州路安撫使四川宣撫使五月癸卯葉顥等上三祖下仙源積慶圖及太宗真宗玉牒哲宗寶訓甲寅吳璘薨庚申命四川制置使汪應辰主管宣撫司事移司利州修揚州城壬戌大減三衙官屬六月己巳命汪應辰權節制利州路屯駐御前軍馬辛未復分利州東西路爲二甲戌以虞允文爲資政殿大學士四川宣撫使乙亥金遣使來取被俘人詔實俘在民間者還之軍中人及叛亡者不預戊寅復以虞允文爲知樞密院事充宣撫使帝親書九事戒之罷淮西江東總領所營田募人耕佃壯丁各還本屯癯老存留戚年請給甲申詔鎮江都統制戚方武鋒軍都統制陳敏各上清河口戰守之策追封吳璘爲信王丁亥詔後省參攷理檢院典故辛卯皇后夏氏崩振泉州水災秋七月己亥立薦舉改官額壬寅以皇太子疾減雜犯死罪囚釋流以下乙巳皇太子薨諡曰莊文己酉東宮醫官杜揖除名昭州編管尋改瓊州閏月辛未詔諸軍復置副都統制文字與都統制連書軍馬調發從都統制違者奏劾戚方罷癸酉權攬安恭皇后于臨安修古寺丁亥戚方落節鉞信州居住八月丁酉內侍陳瑜李宗回坐交結戚方受賂瑜除名決杖黥面配循州宗回除名筠州編管方責授果州團練副使潭州安置籍所盜庫金以犒軍甲寅以久雨命臨安府決繫囚丁巳葉顥等請罷不許蠲光濠廬三州壽春府賦一年戊午遣官分決滯獄壬戌以知建康府史正志兼沿江水軍制置使自鹽官至鄂州沿江南北及沿海十五州水軍悉

隸之癸亥詔給舍討論考課舊法四川旱賜制置司度牒四百備振濟九月戊子太白晝見冬十月乙未朔占城入貢丁酉遣唐瑑等使金賀正旦戊戌修真州城以嗣濮王士輅爲開府儀同三司庚子定內外薦舉改官人歲額癸卯詔歸正借補官資人充樞密院劾士於指定州軍以官庫酒息贍之者毋罷其給乙卯金遣蒲察莎魯窩等來賀會慶節十一月丙寅合祀天地于圜丘大赦戊辰雷已巳詔戒飭武臣及百官癸酉以郊祀雷葉顯魏杞並罷命陳俊卿爲參知政事翰林學士劉珙同知樞密院事甲戌蔣芾陳俊卿請罷不許丁丑以雷發非時詔臺諫侍從兩省官指陳闕失辛巳詔侍從兩省臺諫卿監郎官舉堪郎官寺監丞監司郡守者癸巳罷川路馬船十二月丙申增修六合城己亥遣王瀹賀金主生辰乙巳置鹽儲倉增印會子辛亥以吳益爲太傅庚申金遣徒單忠衛等來賀明年正旦是歲兩浙水四川旱江東西湖南北路蝗振之

四年春正月戊辰籍荆南義勇民兵增給衣甲遇農隙日番教壬午奪秦墳秦堪郊恩蔭補癸未雨雹甲申幸天竺寺遂幸玉津園辛卯罷吳益郊恩蔭補壬辰葉顯薨二月甲午朔罷福建路賣鈔鹽蠲轉運司歲發鈔鹽錢十五萬緡詔四川宣撫使虞允文集四路漕臣會計財賦所入對立兵額丁酉命湖北安撫司給田募辰沅靖三州刀弩手戊戌置和州鑄錢監己亥以蔣芾爲尙書右僕射同中書門下平章事兼

樞密使兼制國用使觀文殿大學士史浩爲四川制置使浩辭不行庚子詔蔣芾常朝贊拜不名芾辭許之乙巳賜王炎出身簽書樞密院事癸丑五星皆見乙卯雪雨雹三月庚午以敷文閣待制晁公武爲四川安撫制置使戊寅詔贈果州團練使韓崇岳立廟賜名忠勇宣州觀察使朱勇立廟賜名忠節己丑四方霧下若塵庚寅蠲楚州壯丁社民稅役諡陳亨祖曰愍節夏四月乙未置漢陽軍收發馬監詔官吏非犯公罪毋得引用併計案問發己亥置郢州轉般倉癸卯遣使撫邛蜀二州饑民爲亂者己酉追封韓世忠爲蘄王甲寅蔣芾等上欽宗帝紀實錄丙辰禮部員外郎李燾上所著續通鑑長編自建隆至治平一百八卷丁巳詔大使局參用新舊麻戊午詔販牛過淮者論如興販軍須之罪是月振綿漢等州饑五月癸亥出度牒千道續減四川科調乙丑太白晝見以邛州安仁縣荒旱失于蠲放致饑民擾亂守貳縣令降罷追停有差甲申諡趙鼎曰忠簡丙戌行乾道新麻丁亥以饒信二州建寧府饑民嘯聚遣官措置賑濟是月西夏任敬德遣使至四川宣撫司約發兵攻西番六月辛卯朔太白晝見經天甲午詔罷廣西鈔鹽復官般官賣法歲減轉運司鈔錢十九萬緡其秋苗毋得科折戊戌蠲諸路逋負乾道元年二月和市折帛雜色錢辛丑龍大淵卒詔以爲監武軍節度使致仕五星皆見癸卯詔四川宣撫司增印錢引一百萬對償民間預借錢蠲邛蜀二州夏稅丁巳召興化軍布衣林彖赴行在戊午蔣芾以母喪去位秋七月

壬戌以劉琪兼參知政事召建寧府布衣魏揆之赴行在申禁異服異樂癸亥徽州大水己巳罷沿江水軍制置司辛未衢州大水戊寅知衢州王悅以盛暑禱雨蔬食減膳憂勤致疾而死贈直龍圖閣丁亥以經總制餘剩錢二十一萬緡椿留邛蜀州以備振濟己丑以久雨御延和殿慮囚減臨安府三衙死罪以下囚釋杖以下是月西夏遣間使來八月乙未班祈雨雪之法于諸路己亥五星皆見丁未主管殿前司公事王琪傳旨不實擅興工役降三官放罷庚戌劉琪罷辛亥陳俊卿請罷政不許九月庚申立內外將佐升差審察法庚午從太上皇幸天竺寺限品官子孫名田是秋罷關外四州營田官兵募民耕佃冬十月壬辰遣鄭聞等使金賀正旦甲午禁歸正人藏匿金人者乙未臣僚言天下之事必歷而後知試而後見爲縣令者必爲丞簿爲郡守者必爲通判爲監司者必爲郡守皆有等差自今職事官吏局務官必任滿方許求外未歷親民任使卽未得擬州郡且授通判詔從之庚子蔣芾起復尙書左僕射陳俊卿右僕射並同中書門下平章事兼樞密使兼制國用使甲辰大閱己酉金遣移刺神獨幹等來賀會慶節庚戌大風十一月壬戌遣知無爲軍徐子寅措置楚州官田招集歸正忠義人以耕甲戌嚴盜賊法乙亥詔峽州布衣郭雍赴行在壬申兩淮歸正忠義有田產者蠲役五年癸未岳陽軍節度使居廣封永陽郡王十二月丙申遣胡元質等賀金主生辰甲辰賜魏揆之同進士出身爲太學錄蔣芾辭起復許之減兩浙江

東西路明年夏稅和市之半甲寅金遺完顏仲仁等來賀明年正旦

五年春正月甲戌措置兩淮屯田二月己丑詔申嚴太廟季黠法乙未命楚州兵馬鈐轄羊滋專一措置沿淮海盜賊先是海州人時旺聚眾數千來請命旺尋爲金人所獲其徒渡淮而南者甚眾故命滋彈壓之戊戌贈張浚太師諡忠獻壬寅以給事中梁克家簽書樞密院事癸卯大風甲辰以王炎參知政事兼同知樞密院事丙午雨雹辛亥詔自今詔令未經兩省書讀者毋輒行給舍駁正毋連銜同奏三月丁巳朔詔趣修廬和二州城己巳蠲成都府路民戶歲輸對糶米脚錢三十五萬緡乙亥以王炎爲四川宣撫使仍參知政事召虞允文赴行在丙子賜禮部進士鄭僑以下三百九十有二人及第出身壬午賜郭雍號冲晦處士癸未罷利州路諸州營田官兵募民耕佃詔侍從監司帥臣管軍薦武舉出身人可將佐者夏四月己丑復置將作軍器少監壬辰以梁克家兼參知政事辛丑詔福建路貧民生子官給錢米庚戌修襄陽府城辛亥振恤衢婺饒信四州流民五月己巳帝以射弩弦斷傷目不視朝金牒取俘獲人王抃議盡遣時旺餘黨陳俊卿持不可帝然之六月庚寅太白晝見戊戌始視朝己酉以虞允文爲樞密使秋七月乙丑召曾覲入見陳俊卿及虞允文請罷之不許覲至行在俊卿允文復言其不可留詔以覲爲浙東總管八月甲申朔日有食之己丑以陳俊卿爲尙書左僕射虞允文爲尙書右僕射並同中書門下平

章事兼樞密使兼制國用使辛亥命淮西路鑄小鐵錢九月己未罷淮東屯田官兵募民耕佃辛酉詔淮東諸州農隙教闔民丁甲子詔侍從臺諫集議欽宗配饗功臣壬申大風命淮西安撫司參議官許子中措置淮西山水砦招集歸正忠義人耕墾官田冬十月乙酉遣汪大猷等使金賀正旦戊子振溫台二州被水貧民以守臣監司失職降責有差戊戌大風己亥命饒信二州歲各留上供米三萬石以備振糶癸卯金遣高德基等來賀會慶節十一月癸丑朔復置淮東萬弩手名神勁軍庚申增置廣東水軍乙丑以孫濱爲右千牛衛大將軍以明州定海縣水軍爲御前水軍丙寅爲岳飛立廟于鄂州己巳太白晝見辛未詔侍從臺諫兩省官各舉歲朝官以上才堪監司郡守者三人壬申復成閔慶遠軍節度使鎮江諸軍都統制十二月己丑遣司馬伋等賀金主生辰辛卯大風丁酉置應城縣馬監復李顯忠威武軍節度使乙巳復置成都府廣惠倉戊申金遣完顏毅等來賀明年正旦

六年春正月癸丑雅州沙平蠻寇邊焚礮門砦四川制置使晁公武調兵討之失利乙卯修楚州城丁巳復強盜舊法其四年十一月指揮勿行癸亥初降金字牌下四川宣撫司備邊奏己丑增築豐儲倉庚午以奉國軍承宣使知廬州郭振爲武泰軍節度使二月乙酉詔戶部侍郎二人分領諸路財賦丁亥復置舒州同安監鑄鐵錢辛卯王炎遣人約沙平蠻歸部稍捐邊稅與之丙申廣西路復行鈔鹽法仍增收通

貨錢四十萬緡以備漕計壬寅詔諭大臣均役法嚴限田抑游手務農桑已酉置應城縣孳生監庚戌以會覲爲福州觀察使遣司農寺丞許子忠詣淮西措置鐵錢三月癸丑用三省官兩淮守帥宜久其任二年後察其能否以行賞罰乙卯裁減樞密院吏額一百十有四人丁巳詔步軍司權以三萬五千人爲額以王抃兪知閣門事專一措置三衙揀選官兵贈彰國軍節度使大周仁爲太尉庚申從太上皇太上皇后幸聚景園乙丑以晁公武王炎不協罷四川制置司歸宣撫司辛未從太上皇太上皇后幸聚景園甲戌裁減三省吏額七十人戊寅以知紹興府史浩爲檢校少傅保寧軍節度使己卯詔兩淮州縣官以繁簡易其任復置江浙荆湖兩廣福建等路都大發運使以新知成都府史正志爲之夏四月辛巳朔罷鑄錢司歸發運司併淮東總領所歸淮西總領所以敷文閣直學士張震知成都府充本路安撫使乙未賜發運使史正志緡錢二百萬爲均輸和糴之用吏部尙書汪應辰三上疏論發運司戊戌以應辰知平江府五月甲寅裁減六部吏額百五十人其餘百司三衙以是爲差己未陳俊卿虞允文等上神宗哲宗徽宗欽宗四朝會要太上皇玉牒己巳陳俊卿以議遣使不合罷爲觀文殿大學士知福州罷行在至鎮江征稅所比近者十有三甲戊詔誠飭百官丁丑知潮州曾造犯贓貸命南雄州編管籍其家戊寅詔給舍臺諫言事閏月壬午詔監司帥臣舉守令贓否失實依舉清要官法定罪甲申卽給諸州上供綱目季申

而歲校之以爲殿最戊子遣范成大等使金求陵寢地且請更定受書禮辛卯吏部侍郎陳良祐論祈請使不當遣恐生邊釁詔以良祐妄興異論不忠不孝放罷送筠州居住癸巳增環衛官奉以梁克家爲參知政事兼同知樞密院事壬寅以江東漕臣黃石不親按行水災州郡降二官甲辰辛次膺薨戊申復置武臣提刑六月壬子申嚴卿監郎官更迭補外之制壬申增武學生爲百人癸酉置蘄州蘄春監黃州齊安監鑄鐵錢是月榮國公挺自東宮出居外第秋七月癸未詔以沙田蘆場歲收租稅六十餘萬緡入左藏南庫丙戌詔川廣監司郡守任滿奏事詔方調己丑置興國軍興國監甲午詔除郎官並引對畢供職辛丑復置御前弓馬子弟所命吳挺兼提舉賜岳飛廟曰忠烈八月庚戌虞允文請蚤建太子癸丑復置詳定一司勅令所丙寅置閤門舍人十員是月虞允文上乾道勅令格式九月壬辰賜蘇軾謚曰文忠辛丑沅州獠人相讐殺守臣孫叔傑出兵擊之失利獠人進迫州城安撫司諭解之叔傑尋抵罪是月范成大至自金許以遷奉及歸欽廟梓宮而不易受書禮冬十月己酉以孫摠爲左千牛衛大將軍丙辰詔發運使置司行在諡司馬朴曰忠潔辛酉遣呂正己等使金賀正旦丁卯金遣耶律子敬等來賀會慶節甲戌起居舍人趙雄請置局議恢復詔以雄爲中書舍人十一月丁丑朔復置軍器監一員壬午合祀天地于圜丘大赦乙未復置神武中軍以吳挺爲都統制召曾覲提舉佑神觀丁酉加上光堯壽聖太上皇

帝尊號曰光堯壽聖憲天體道太上皇帝壽聖太上皇后尊號曰壽聖明慈太上皇后是月遣趙雄等賀金主生辰別函書請更受書之禮置左藏南上庫十二月戊申大閱甲子置江州廣寧監臨江軍豐餘監撫州裕國監鑄鐵錢壬申金遣蒲察愿等來賀明年正旦癸酉罷發運司以史正志奏課不實責爲楚州團練副使永州安置是歲兩浙江東西福建水旱

七年春正月丙子率羣臣奉太上皇太上皇后冊寶于德壽宮庚辰虞允文復請建太子帝命允文擬詔以進壬寅命三省旬錄宣諭聖語及時政記同進是月復鑄錢司二月癸丑詔立子惇爲皇太子大赦以慶王愷爲威武保寧軍節度使判寧國府進封魏王丁巳增置皇太子宮講讀官庚申罷會子庫仍賜戶部內藏南庫緡錢二百萬銀九十萬兩以增給官兵之奉甲子詔寺觀毋免稅役丁卯太傅大寧郡王吳益薨壬申大風三月乙亥朔趙雄至金金拒其請詔訓習水軍丙子立恭王夫人李氏爲皇太子妃戊寅徙侍衛馬軍司戍建康己卯起復劉珙同知樞密院事以明州觀察使知閤門事兼樞密都承旨張說簽書樞密院事左司員外郎兼侍講張栻言說不宜執政乙酉立沿海州軍私齎銅錢下海船法丙戌復置將作監殿中侍御史李處全乞遣張說按行邊戍以息衆論中書舍人范成大乞不草詞戊子說罷爲安慶軍節度使提舉萬壽觀庚寅遣使覈兩淮種麥丙申御大慶殿冊皇太子禮部侍郎鄭聞工部侍郎

胡銓樞密院檢詳文字李衡祕書丞潘慈明並罷虞允文乞留銓乃以爲寶文閣待制兼侍講己亥皇太子謝于紫宸殿宰相率百官赴東宮賀夏四月戊申以曾覲爲安德軍承宣使庚申詔諸路增收無額錢物並輸南上庫壬戌從太上皇太上皇后幸聚景園甲子詔皇太子判臨安府己巳詔侍從臺諫兩省官舉任刑獄錢穀及有智略吏能者各一人辛未詔皇太子領臨安尹五月戊寅復置淮東總領所丁亥劉珙起復同知樞密院事爲荆襄宣撫使珙辭不拜庚寅金人葬欽宗于鞏原丁酉詔廣西帥臣措置南丹州市馬是月遣知閤門事王抃點閱荆襄軍馬六月丙午復主管馬軍司公事李顯忠爲太尉己巳賜吳璘諡曰武順壬申詔兩淮墾田毋創增稅賦秋七月庚子以王炎爲樞密使四川宣撫使八月丙辰詔兩淮民丁充民兵者本名丁錢勿輸辛酉復修襄陽城九月壬申朔以江西南南旱命募民爲兵甲申從太上皇太上皇后幸東園戊子安定郡王令德薨冬十月丁未罷紹興宗正行司改恩平郡王璩判西外宗正己酉遣莫濛等使金賀正旦壬戌金遣烏林答天錫等來賀會慶節天錫要帝降榻問金主起居虞允文請帝還內僉知閤門事王抃諭天錫以明日見天錫沮退癸亥會慶節金使隨班入見十一月甲戌御集英殿策試應賢良方正能直言極諫科李廙戊寅錫廙制科出身十二月丁未遣翟絳等賀金主生辰庚申詔閤門舍人依文臣館閣以次輪對癸亥罷太醫局丙寅金遣完顏宗憲等來賀明年正旦是歲湖

南江東西路旱振之

八年春正月庚午朔班乾道勅令格式丁酉朝獻景靈宮遂幸天竺寺玉津園二月乙巳詔改尙書左右僕射同中書門下平章事爲左右丞相丙午詔六察分隸事有違戾許監察御史隨事具實狀糾劾以聞戊申遣姚憲等使金賀上尊號附請受書之事辛亥以虞允文爲左丞相梁克家爲右丞相並兼樞密使癸丑以安慶軍節度使張說吏部侍郎王之奇並簽書樞密院事侍御史李衡右正言王希呂交章論說不可爲執政不報禮部侍郎兼直學士院周必大不草答詔權給事中莫濟封還錄黃詔並與在外宮觀丙辰詔罷王希呂與達小監當尋詔與宮觀丁巳李衡罷爲起居郎丙寅戶部尙書曾懷賜出身參知政事三月戊子詔省侍中中書尙書令員以左右丞相充其位夏四月庚子賜禮部進士黃定以下三百八十有九人及第出身己酉殿中侍御史蕭之敏劾虞允文擅權不公允文請罷政許之翼日復留出之敏提點江東刑獄甲子措置兩淮官田徐子寅等坐授田歸正人逃亡奪官有差乙丑詔再蠲兩淮二稅一年五月戊子福建鹽行鈔法丙申立宗室銓試法六月庚子以武德郎令擅爲金州觀察使封安定郡王壬寅蠲兩淮歸正人撮收課子淮東巡尉有縱逸歸正戶口過淮者奪官有差壬子省監司薦舉員秋七月辛巳罷淮西屯田官兵募歸正人耕佃姚憲曾覲至自金金人拒其請癸未以覲爲武泰軍節度使壬

辰雨雹九月戊辰定江西四監鐵錢額乙亥詔王炎赴都堂治事戊寅以虞允文爲少保武安軍節度使四川宣撫使封雍國公己丑賜允文家廟祭器壬辰允文入辭帝諭以決策親征令允文治兵竣報冬十月丁未遣馮榘等使金賀正旦丙辰金遣夾谷清臣等來賀會慶節罷借諸路職田十一月辛未遣官鬻江浙福建二廣湖南八路官田辛巳復四川諸州教授田庚寅進檢校少傅知福州史浩開府儀同三司十二月戊戌蠲兩淮明年租賦甲辰詔京西招集歸正人授田如兩淮甲寅四川試武舉丙辰追封劉光世爲安成郡王丁巳遣韓元吉等賀金主生辰庚申復置鑄錢司提點官二員辛酉金遣曹望之等來賀明年正旦是歲隆興府江筠州臨江興國軍大旱四川水

九年春正月辛未王之奇罷爲淮南安撫使王炎罷爲觀文殿大學士提舉洞霄宮乙亥以張說同知樞密院事戶部侍郎沈夏簽書樞密院事戊寅遣官鬻兩浙營田及沒官田次及江東西四川如之以刑部尙書鄭聞簽書樞密院事乙酉福建鹽復官賣法是月以措置兩淮荆襄十六事勅安撫轉運司督諸州守臣月具所行事奏仍審擇臧否以議黜陟閏月戊申以久雨命大理三衙臨安府及兩浙州縣決繫囚減雜犯死罪以下一等釋杖以下乙卯修廬州城辛酉大風幸天竺寺玉津園二月壬申蠲江西旱傷五州逋貢米乙亥青羌奴兒結寇安靜若黎州推官黎商老戰死乙酉孫榮國公挺薨追封豫國公丁亥特

贈蘇軾爲太師三月甲午禁北界博易銀絹戊申從太上皇太上皇后幸聚景園癸丑復以進奏院隸門下後省丙辰復分淮南安撫司爲東西路夏四月丁丑裁定武鋒軍軍額己丑皇太子解臨安尹事五月壬辰朔日有食之己未以迪功郎朱熹屢詔不起特改宣教郎主管台州崇道觀六月甲戌禁兩淮荆襄四川諸州籍民戶馬己丑戒飭監司守令勸農秋七月壬寅青羌奴兒結降辛亥吐蕃彌羌畜列陷安靜砦引兵深入黎州守臣誘邛部川蠻擊却之八月丙子詔興修水利癸未合荆鄂二軍爲一以吳挺充都統制九月丙申梁克家等上中興會要太上皇及皇帝玉牒庚子命盱眙軍以受書禮移牒泗州示金生辰使金使不從冬十月甲子遣留正等使金賀正巨右丞相梁克家與同知樞密院張說議使事不合乃求去辛未克家罷爲觀文殿大學士知建寧府壬申喬雲見甲戌以曾懷爲右丞相張說知樞密院事鄭聞參知政事沈夏同知樞密院事庚辰金遣完顏襄等來賀會慶節丁亥襄等入辭別函申議受書之禮仍示虞允文速爲邊備十一月辛卯詔樞密院除授及財賦事關中書門下省其邊機軍政更不錄送戊戌合祀天地于圜丘大赦改明年爲淳熙元年十二月己未朔戒勅沿邊諸軍毋輒遣問探招納叛亡甲子沈夏罷乙丑以御史中丞姚憲簽書樞密院事遣韓彥直等賀金主生辰辛未交趾入貢癸酉罷廣西客鈔鹽復官般官賣法甲戌遣使措置宜州市馬乙亥以嗣濮王士勰永陽郡王居廣並爲少保乙酉金

遣完顏璋等來賀明年正旦以議受書禮不合詔俟改日以太上皇有旨姑聽仍舊丁亥璋等入見是歲浙東江東西湖北旱

淳熙元年春正月乙未禁淮西諸關採伐林木戊戌罷坐倉糴米賞庚子罷兩淮將帥權攝官丙午禁兩淮耕牛出境以交趾入貢詔賜國名安南封南平王李天祚爲安南國王二月癸酉虞允文薨辛巳爲郭浩立廟于金州三月戊子朔詔寄祿官及選人並去左右字丙申以鄭聞爲資政殿大學士四川宣撫使戊申幸玉津園癸丑金遣梁肅等來計事夏四月戊辰從太上皇幸聚景園壬申許桂陽軍谿洞子弟入州學聽讀乙亥詔四川宣撫司教閱諸州將兵戊寅遣張子顏等使金報聘己卯以姚憲參知政事戶部尙書葉衡簽書樞密院事五月壬寅班鄭興裔所創檢驗格目六月丙辰朔詔禮官討論別建四祖廟正太祖東嚮位戊午以興州都統制吳挺爲定江軍節度使癸酉改江陵府爲荆南府戊寅曾懷罷癸未姚憲罷甲申落憲端明殿學士罷宮觀以葉衡參知政事秋七月丁亥以鄭聞參知政事罷四川宣撫司以成都府路安撫使薛良朋爲四川安撫制置使戊子詔舉廉吏壬辰以曾懷爲右丞相己酉姚憲南康軍居住八月己未張說罷爲太尉提舉隆興府玉隆觀以徽猷閣學士楊傑爲昭慶軍節度使簽書樞密院事九月乙酉朔以曾覲開府儀同三司壬寅幸玉津園宴射乙巳罷宜州市馬冬十月辛酉立金銀出界

罪賞壬戌遣蔡洸使金賀正旦癸亥以積雨命中外決繫囚丙寅鄭聞薨乙亥金遣完顏讓等來賀會慶節戊寅占城入貢辛巳再蠲林安府民身丁錢三年壬午以魏王愷判明州蠲郴州桂陽軍借貸常平米十一月甲申朔日有食之戊戌以禮部侍郎龔茂良參知政事楊傑罷以葉衡兼權知樞密院事丙午曾懷罷戊申以葉衡爲右丞相兼樞密使十二月丁巳以吏部尙書李彥穎簽書樞密院事壬戌遣吳琚等賀金主生辰丙辰罷鐵錢改鑄銅錢庚午詔禮官論復魏悼王襲封壬申葉衡等上真宗玉牒金遣劉仲誨等來賀明年正旦以資政殿學士知江陵府沈夏升大學士爲四川宣撫使仍命升差從主帥場務還軍中新四川制置使范成大改管內制置使

二年春正月癸巳前宰相梁克家曾懷坐擅改堂除克家落觀文殿學士懷降爲觀文殿學士甲午廢同安蘄春監丁未以兩淮諸莊歸正人安業徐子寅等行賞有差庚戌詔籍諸軍子弟爲背鬼軍三月丙申以太上皇壽七十詔禮官討論慶壽典禮乙巳詔武舉第一人補秉義卽堂除諸軍計議官夏四月乙卯賜禮部進士詹曠以下四百二十有六人及第出身己巳幸玉津園是月茶寇賴文政起湖北轉入湖南江西官軍數爲所敗命江州都統皇甫倜招之五月辛卯諭宰相以朝政闕失士民皆得獻言庚子命鄂州都統李川調兵捕茶寇乙巳詔知縣三年爲任六月庚戌朔詔自今宰執侍從以下除外任非有功績

者不除職名外任人非有勞效亦不除職以沈夏同知樞密院事辛酉罷四川宣撫司以倉部郎中辛棄疾爲江西提刑節制諸軍討捕茶寇丁卯用左司諫湯邦彥言落蔣芾王炎觀文殿大學士張說落節度使芾建昌軍炎袁州說撫州並居住戊辰振濟湖南江西被寇州縣是月茶寇自湖南犯廣東秋七月辛丑有星孛于西方八月丙辰江西總管賈和仲以捕茶寇失律除名賀州編管甲子賜安南國王印丁卯蠲湖南江西被寇州縣租稅丁丑遣左司諫湯邦彥等使金申議九月乙卯朔湯邦彥請分揚廬州荆南襄陽府金州興元府興州爲七路每路文臣一人充安撫使以治民武臣一人充都總管以治兵三載視其成以議誅賞從之乙酉振恤淮南水旱州縣乙未葉衡罷丁未沈夏罷贈趙鼎爲太傅還其爵邑追封豐國公閏月丁巳以李彥穎參知政事翰林學士王淮簽書樞密院事甲子詔武臣從軍毋帶內職是月辛棄疾誘賴文政殺之茶寇平冬十月戊寅朔賞平茶寇功湖南江西廣東監帥黜陟有差庚辰大風壬午詣德壽宮加上光堯壽聖憲天體道太上皇帝尊號曰光堯壽聖憲天體道性仁誠德經武緯文太上皇帝壽聖明慈太上皇后尊號曰壽聖齊明廣慈太上皇后乙酉遣謝廓然等使金賀正旦戊戌金遣完顏禱等來賀會慶節十一月戊申朔奉上太上皇太上皇后冊寶于德壽宮庚戌麗正門內火癸丑大風戊午提點坑冶王揖進羨餘十萬緡詔却之十二月辛巳班瀆熙吏部七司法遣張宗元等賀金主生辰

甲午朝德壽宮行慶壽禮大赦文武官封父母賞諸軍議放天下苗稅三之一大臣言國用不足迺止丙申更定強盜贓法甲辰金遣完顏迨等來賀明年正旦

三年春正月甲寅以常州旱寬其逋負之半刪犯贓陰補法振淮東饑仍命貸貧民種乙丑振恤歸正人二月壬午蠲兩淮教閱民兵夏稅癸未以伯圭爲安德軍節度使甲申詔四川監司帥守聞命之官毋候告勅賜韓世忠諡曰忠武是月罷諸路鬻沒官田三月丙午朔日有食之霧雲不見辛亥上太上皇日麻于德壽宮己未置六部編勅司癸亥幸報恩寺遂幸聚景園己巳併左藏四庫爲二辛未詔四川制置司歲擇梁洋義士材武者二人遣赴樞密院壬申立任子參選覆試法夏四月戊寅詔侍從臺諫兩省官歲舉監司郡守各五人辛巳靖州蠻寇邊遣兵討捕之丁亥雨雹己丑責授葉衡安德軍節度副使彬州安置丁酉湯邦彥陳雷奉使無狀除名邦彥新州雷永州編管己亥詔諸路提刑歲五月理囚五月癸丑合利州東西路爲一安南國王李天祚卒戊午遣使弔祭壬申太白晝見六月乙酉減四川酒課四十七萬餘緡甲午以朱熹屢詔不起特命爲祕書郎熹不就秋七月乙丑禁浙西園田八月乙亥以王淮同知樞密院事禮部尙書趙雄簽書樞密院事詔六察官糾察庶務臺綱益振各進二官庚辰太上皇詔立貴妃謝氏爲皇后壬午以久雨命中外決繫囚戊戌靖州蠻寇平九月癸亥詔自今犯公罪至死者其陰補

其所犯奏裁著爲令冬十月甲戌以久雨命中外決繫囚丙子御文德殿册皇后丁丑命臨安守臣嚴禁踰侈庚辰詔自今非獻歲不許鬻會癸未遣閻蒼舒等使金賀正旦壬辰金遣蒲察通等來賀會慶節十一月癸丑合祀天地于圜丘大赦庚午遣張子正等賀金主生辰十二月己丑黎州蠻寇邊官軍失利蠻亦遁去甲午詔職事官補外者復除職如故事追封吳玠爲涪王丁酉定鑄錢司歲鑄額爲十五萬緡戊戌金遣劉琬等來賀明年正旦是歲京西湖北諸州興元府金洋州早紹興府台婺州水並振之

四年春正月戊申詔自今內外諸軍歲一閱試庚申詔沿江諸軍歲再習水戰丙寅雨雹丁卯班淳熙麻二月乙亥幸太學祇謁先聖退御敦化堂命國子祭酒林光朝講中庸下詔遂幸武學謁武成王廟監學官進秩一等諸生推恩賜帛有差己卯詔諸軍毋以未補官人任軍職戊子立邊人逃入溪洞及告捕法癸巳立武臣授環衛官法戊戌以新知荆南府胡元質爲四川安撫制置使兼知成都府三月乙巳以史浩爲少保觀文殿大學士醴泉觀使兼侍讀進封永國公己酉龔茂良等上仁宗玉牒徽宗實錄皇帝玉牒庚戌幸玉津園宴射壬子貸隨郢二州饑民米詔李龍翰襲封安南國王甲寅修韶州城丙寅幸聚景園夏四月甲戌以魏王愷爲荆南集慶軍節度使行江陵尹判明州如故乙亥參知政事龔茂良以曾覿從騎不避道杖之戊寅上奏乞罷政不許甲午給歸正官子孫田屋五月庚子朔幸佑聖觀罷四川和羅

六月丁丑龔茂良罷己卯以王淮參知政事辛巳班幸學詔癸未升蜀州爲崇慶府甲申詔自今宰執朝
殿得旨事須覆奏乃行秋七月辛丑禁江上諸軍盜易戰馬振襄陽饑民壬寅立待補太學試法戊申班
御史臺彈奏格乙酉罷臨川伯王雱從祀癸丑龔茂良責授監遠軍節度副使英州安置甲寅申嚴四川
入蕃茶禁甲子班澶熙重修勅令格式八月辛巳禁耕牛過淮九月丁酉朔日有食之己亥命修築海潮
所壞塘岸辛丑免宰執以下會慶節進奉庚戌命禮官定開寶政和祀禮戊午閣蹴鞠于選德殿冬十月
丙子以久陰命中外決繫囚遣錢良臣等使金賀正旦丁丑詔監司守臣歲舉武臣堪知縣者各二人己
卯詔將士智勇傑出者躡等升差丁亥金遣完顏忠等來賀會慶節十一月丁酉詔兩淮歸正人爲強勇
軍庚子以趙雄同知樞密院事壬戌太白晝見癸亥遣趙思等賀金主生辰十二月丁卯試四川所上義
士二人官而遣之己巳詔行薦舉事實格法乙亥大閱辛巳蠲太平州民貸常平錢米壬辰金遣完顏炳
等來賀明年正旦是歲福州建寧府南劍州水並振之

宋史卷三十四考證

孝宗紀二壽聖太上皇后尊號曰壽聖明慈太上皇后○臣蒲封按玉堂雜記初議太上皇后加慈明二

字議者謂天聖二年賜太宗女中國大長公主謚曰慈明當避於是改用明慈二字

宋史卷三十四考證

宋史卷三十五

元 中 書 右 丞 相 總 裁 脫 脫 等 修

本紀第三十五

孝宗三

五年春正月辛丑侍御史謝廓然乞戒有司毋以程頤王安石之說取士從之癸卯罷特旨免臣僚及寺觀科徭庚戌大風己未詔侍從臺諫兩省官集議考課法二月己巳置州縣丁稅司辛未申嚴武臣呈試法詔二廣毋以攝官人治獄丁丑禁解鹽入京西界甲申雨土庚寅威州蠻寇邊討降之三月丁未李彥穎罷給辰沅澧靖四州刀弩手田壬子以史浩爲右丞相丁巳幸玉津園己未以王淮知樞密院事趙雄參知政事是春黎州蠻出降夏四月乙丑朔詔葉衡任便居住丙寅以禮部尙書范成大參知政事辛未知紹興府張津進羨餘四十萬緡詔以代民輸和買身丁之半賜禮部進士姚穎以下四百十有七人及第出身丁丑雨土己卯以趙思奉使不如禮罷起居舍人仍降二官丁亥命後省擇中外所言利病不戾成法者以聞五月庚子置武學國子員丁未修臨安府城禁諸路州軍責屬縣進羨餘六月庚午飭百官及諸監司毋得請託乙亥范成大罷癸未詔京西湖北商人以牛馬負茶出境者罪死甲申詔翰林學士

諫議大夫給事中中書舍人侍御史各舉堪御史者二人以給事中錢良臣簽書樞密院事己丑罷諸州私置稅場減四川茶課十五萬餘緡庚寅蠲大理寺贓錢三萬九千餘緡閏月丙申贈強電強震官立廟西和州賜名旌忠丁酉限四川總領會子額戊戌罷興州都統司營田官兵募民耕佃己亥復分利州東西路爲二壬寅置鎮江建康府轉般倉龔茂良卒于英州乙巳以魏王愷爲永興成德軍節度使雍州牧判明州如故庚戌蠲秀州民折帛錢秋七月甲子太尉提舉萬壽觀李顯忠薨癸未禁砂毛錢丁亥以歲豐命沿江糴米百六十萬石以廣邊儲八月甲午詔諸路監司戒所部民稅毋以重價強折輸錢復制科舊法丁酉詔關外四州增募民兵爲忠勇軍戊午增銓試爲五場呈試爲四場九月甲子定廣西賣鹽賞罰壬申幸祕書省戊寅賜岳飛諡曰武穆冬十月戊戌史浩等上三祖下第六世仙源類譜仁宗玉牒庚子遣宇文侂等使金賀正旦辛亥遣張九思等來賀會慶節乙卯奉國軍節度使殿前都指揮使王友直以募兵擾民降爲武靈軍承宣使罷軍職統制以下奪官有差軍民謹叟者執送大理寺鞠之戊午以孫右千牛衛大將軍擴爲明州觀察使封英國公十一月丙寅詔軍民喧鬪者並從軍法史浩言民不宜律以軍法不聽王友直再降爲宜州觀察使信州居住浩請罷政甲戌浩罷爲少傅還舊節充醴泉觀使兼侍讀乙亥以錢良臣參知政事丁丑以趙雄爲右丞相王淮爲樞密使戊寅以兩川禁卒千人爲成都

府雄邊軍庚辰復監司互察法十二月庚寅朔班新定薦舉式辛卯遣錢冲之等賀金主生辰丁酉罷興元都統司營田官兵募民耕佃辛丑復同安蘄春監丙午禁兩淮銅錢復行鐵錢丙辰金遣烏延察等來賀明年正旦是歲階福建興化軍水通泰楚州高郵軍田鼠傷禾三佛齊國入貢

六年春正月戊辰振淮東饑民庚午復置內侍省合同憑由司壬申蠲夔州路上供金銀丁丑雨雹辛巳復置光州中渡權場二月己丑朔幸佑聖觀召史浩曾覲賜酒壬辰錢良臣以失舉賊吏奪三官丙申詔前宰執待從有己見利便聽不時以聞辛丑立武臣關升蔭補法丙午詔逃軍犯強盜者毋擬貸癸丑命州縣毋撓義役乙卯詔自今歸正官親赴部授官以革冒濫丁巳裁特奏名試法三月庚申幸聚景園丙寅錄趙鼎岳飛子孫賜以京秩己巳郴州賊陳峒等破連道州桂陽軍諸縣命湖南帥臣討捕之置廣西義倉辛未再振淮東饑民壬申雨雹丁丑詔戒勵諸道轉運使庚辰幸玉津園夏五月壬戌裁宗室換官法庚午蠲四川鹽課十萬緡乙亥郴寇平癸未給襄陽歸正忠義人田六月甲午建豐儲倉丙申詔特奏名毋授知縣縣令戊戌蠲郴州運糧丁夫今年役錢之半辛亥廣西妖賊李接破鬱林州守臣李端卿棄城遁遂圍化州命經略司討捕之端卿除名勒停梅州編管秋七月癸亥籍郴州降寇隸荆鄂軍戊辰班隆興以來寬恤詔令于諸路趙雄等上會要乙亥詔諸軍五口以上增給緡錢癸未太白晝見經天八月

庚寅罷諸路監司帥守便宜行事壬寅以知楚州翟暵過淮生事奪五官鉞州居住九月辛未合祭天地于明堂大赦癸未詔福建二廣賣鹽毋擅增舊額冬十月乙酉朔蠲連州被寇民租稅辛卯遣陳峴等使金賀正巨丙申詔太學兩優釋褐與殿試第二人恩例庚子四川行當三大錢再蠲四川鹽課十七萬餘緡辛丑除紹興府民逋賦五萬餘緡乙巳金遣蒲察鼎壽等來賀會慶節戊申廣西妖賊平十一月乙卯朔帝著論數百言深原用人之弊因及誅賞之法命宰執示從臣于都堂辛酉裁宗子試法戊寅罷金州管內安撫司壬午詔宗室有出身人得考試及注教授官癸未遣傅淇等賀金主生辰十二月丙戌班重修瀛熙敕令格式丙申修百司省記法己亥詔自今鞫賊吏後雖原貸者毋以失入坐獄官庚戌金遣耶律慥等來賀明年正旦辛亥蠲臨安府征稅一年是歲温台州水和州旱

七年春正月甲子減廣西諸州歲賣鹽數乙丑劉焯以平李接功擢集英殿修撰將佐幕屬吏士進官減磨勘年有差己卯詔京西州軍並用鐵錢及會子民戶銅錢以鐵錢或會子償之滿二月不輸官許告賞庚辰蠲淮東民貸常平錢米二月癸未朔初置廣南煙瘴諸州醫官丙戌復置皇太子宮小學教授辛卯魏王愷薨乙未詔撥廣西兵校五百人隸提刑司戊戌罷鳳洲孳生馬監己亥出湖南椿積米十萬石振糶永邵郴三州甲辰命利州路守貳縣令兼領營田乙巳限改官員歲毋過八十人封子棟爲宜州觀察

使安定郡王三月壬戌詔舉賢良方正能直言極諫者庚午迎太上皇太上皇后宴翠寒堂乙亥減內外官薦舉員丁丑再蠲臨安府民身丁錢三年詔諸州招補軍籍之闕自今歲以爲常夏四月甲申幸聚景園丙戌趙雄等上仁宗哲宗玉牒戊子除明州積欠諸司錢十五萬緡辛卯再免沿邊歸正人請占官田賦役三年甲辰黎州五部落犯盤陀砦兵馬都監高冕以綿潼大軍三千人與戰敗走蠻人深入大掠而去己酉命膺補武舉宗室小使臣行三年喪五月戊辰以吏部尙書周必大參知政事刑部尙書謝廓然簽書樞密院事袁州分宜縣大水捐其稅戊寅詔舒蘄二州鑄錢歲以四十五萬貫爲額己卯申飭書坊擅刻書籍之禁庚辰詔特奏名年六十人毋注縣尉六月丙戌以特進觀文殿大學士判建康府陳俊卿爲少保壬辰五部落再犯黎州制置司鈐轄成光延戰敗官軍死者甚衆提點刑獄權州事折知常棗城遁甲午制置司益兵遣都大提舉茶馬吳總往平之壬寅詔試刑法官增試經義秋七月癸丑詔一廣帥臣監司察所部守臣臧否以聞丁卯以旱決繫囚分命羣臣禱雨于山川壬申移廣西提刑司于鬱林州八月癸未禁黎州官吏市蕃商物甲申以禱雨未應諭輔臣欲令職事官以上各實封言事是夕雨丁酉置湖南飛虎軍戊戌雨甲辰五部落犯黎州塞與州左軍統領王去惡拒却之折知常重賂蠻使之納款九月癸亥詔自今常朝毋稱丞相名甲子命樞密使亦如之乙丑詔宰執使相給使減年恩數身後三年

者毋收使丙寅詔知縣成資始聽監司薦舉壬申禁諸路過糴癸酉名省記法爲淳熙重修百司法冬十月丙戌詔限田太寬民役煩重其令臺諫給舍同戶部長貳詳議以聞戊子遣葉宏等使金賀正且乙未黎州五部落進馬乞降詔却獻馬許其互市庚子金遣李偕等來賀會慶節十一月癸丑詔邊吏存恤江西過淮饑民丁巳禁淮南諸司州郡抑配民酒辛酉蠲兩淮州軍二稅一年癸亥黎州戍軍伍進等作亂折知常遁去王去惡誘進等誅之壬申南康軍旱詔出檢放所餘苗米萬石充軍糧癸酉遣蓋經等賀金主生辰十二月庚寅趙雄等上神宗哲宗徽宗欽宗四朝國史志壬辰以四川制置使胡元質不備蕃部致其猖獗奪兩官罷之丙申嗣濮王士勗薨戊戌以新除成都府路提點刑獄祿東之權四川制置司應黎州邊事隨宜措置癸卯詔臨安府承宣旨審奏如故事甲辰金遣徒單守素等來賀明年正旦是月詔以太上皇明年七十有五議行慶壽禮太上皇不允帝進黃金二千兩爲壽是歲江浙淮西湖北旱蠲租發廩貸給越州縣決獄募富民振濟補官故歲雖凶民無流殍安南入貢

八年春正月甲寅停折知常官汀州居住丙辰詔內侍見帶兵官並與在京宮觀著爲令乙亥詔福建歲撥鹽於邵武軍市軍糧二月壬午詔去歲旱傷郡縣以義倉米日給貧民至閏三月半止黎州土丁張百祥等不堪科役爲亂統領官劉大年引兵逆擊之士丁潰去大年坐誅戊子禁浙西民因旱置圍田者裁

童子試法己丑禁廣西諸州科賣亭戶食鹽庚寅詔三省樞密六部置籍稽考興利除害等事戊戌以保康軍節度使士欽爲嗣濮王三月丁未朔幸佑聖觀戊午以潮州賊沈師爲亂趣帥憲捕之辛未幸聚景園閏月辛巳命諸路帥臣監司分州郡臧否爲三等歲終來上戊子賜禮部進士黃由以下三百七十有九人及第出身庚寅修揚州城甲午幸玉津園減在京及諸路房廊錢什之三德壽宮所減月以南庫錢貼進禁潭道等州官賣鹽甲辰立宗室命繼法夏四月癸丑修湖南諸州城丙辰以臨安疫分命醫官診視軍民庚申復以強盜配隸諸軍重役丁卯安定郡王子棟薨癸酉立郴州宜章桂陽軍臨武縣學以教養峒民子弟五月戊寅詔監司守令勸課農桑以奉行勤怠爲賞罰壬午詔諸路轉運司趣民間補葺經界簿籍辛卯以久雨減京畿及兩浙囚罪一等釋杖以下貧貧民稻種錢壬寅以史浩爲少師六月己酉詔放殿前司平江府牧馬草場二萬畝聽民漁采戊午除淳熙七年諸路旱傷檢放米一百三十七萬石錢二千六萬緡辛酉罷諸路坊場監官聽民承買戊辰史浩薦薛叔似楊簡陸九淵陳謙葉適袁燾越普譽等十六人詔並赴都堂審察七月癸未復以許浦水軍隸殿前司永陽郡王居廣薨追封永王辛未賞監司守臣修舉荒政者十六人以不雨決繫囚壬辰紹興大水出秀婺州平江府米振糶丁酉嚴州水詔被災之家蠲其和買三等以上戶減半辛丑錄范質後八月丙午以旱罷招軍庚戌趙雄罷壬子詔紹興

府諸縣夏稅和市折帛身丁錢絹之類不以名色截日並令住催癸丑以王淮爲右丞相樞密使措置營砦檢視沿江守備戊寅詔展巡幸之期辛次膺罷己卯李顯忠責授清遠軍節度副使筠州安置辛巳命浙西副都總管李寶兼御營統制官措置浙西海道甲申右諫議大夫王大寶入對論移蹕以數文閣學士虞允文爲兵部尙書兼湖北京西宣諭使戊子放宮人三十人以蕭琦爲檢校少保河北招撫使秋七月庚寅朔以虞允文爲湖北京西制置使癸巳以湯思退爲尙書右僕射同中書門下平章事兼樞密使李顯忠再責授果州團練副使潭州安置乙未詔宿州棄軍將佐奪官貶竄有差丙申太白晝見經天罷江淮宣撫司便宜行事乙巳以旱蝗星變詔侍從臺諫兩省官條上時政闕失丁未詔徵李顯忠侵欺官錢金銀免籍其家乙卯裁減省部寺監官吏戊午給還岳飛田宅八月丙寅張浚復都督江淮軍馬庚午以劉寶兼淮東招撫使丙子以飛蝗風水爲災避殿減膳罷借諸路職田之令戊寅金紇石烈士靈又以書求海泗唐鄧四州地及歲幣癸未復以龍大淵知閤門事會觀同知閤門事丙戌遣淮西安撫司幹辦公事盧仲賢等齎書至金帥府戒勿許四州差減歲幣仍命諸將毋遣兵人出境九月己酉地震甲寅以謝廓然同知樞密院事丙辰更後殿幄次爲延和殿己未以觀文殿大學士新四川制置使趙雄知瀘州戊辰旨者請自今歛歲蠲減經費有虧令戶部據實以聞毋得督趣已蠲闕之數從之罷諸路補葺經

界簿籍九月庚辰命諸路提舉司貸民麥種辛巳錢良臣罷庚寅以謝廓然兼權參知政事冬十月己酉遣施師點等使金賀正旦辛酉錄黎州戰歿將士四百三人甲子金遣完顏實等來賀會慶節詔災傷州縣諭民振糶十一月甲戌以旱傷罷喜雪宴戊寅蠲富陽新城錢塘夏稅庚寅前池州守趙粹中誤斬遞卒汪青落職仍詔給青家衣糧十五年辛卯詔兩省侍從臺諫各舉所知浚行在至鎮江府運河丁酉遣燕世良賀金主生辰己亥振臨安府及嚴州饑民庚子再詔臨安府爲粥食饑民辛丑以淳熙元年減半推賞法募民振糶十二月癸卯朔以徽饒二州民流者衆罷守臣官出南庫錢三十萬緡付浙東提舉常平朱熹振糶丁未禁諸州營造戊申諡劉安世曰忠定辛亥蠲諸路旱傷州軍明年身丁錢物甲寅兩覆以度僧牒募閩廣民入米丙辰詔縣令有能舉荒政者監司郡守以名聞甲子下朱熹社倉法于諸路戊辰金遣魏貞吉等來賀明年正旦以爭執進書儀帝還內遣王抃往諭自己巳貞吉奉書入見是月廣東安撫鞏湘誘潮賊沈師出降誅之是歲江浙兩淮京西湖北潼川夔州等路水旱相繼發蠲蠲租遣使按視民有流入江北者命所在振業之

九年春正月甲戌詔四孟朝獻分用三日如在京故事丁丑命兩淮戍兵歲一更癸未罷樞密都承旨王抃爲在外宮觀因罷諸軍承受復密院文書關錄兩省舊法以文臣爲都承旨戊子糶廣南米赴行在庚

寅詔江浙兩淮旱傷州縣貧民稻種計度不足者貸以糶積錢二月庚戌遣使訪問二廣鹽法利害戊辰四川制置司言獲敘州賊大波浪三月辛未朔幸佑聖觀詔振濟忠萬恭涪四州癸未振濟鎮江壬辰遣使按視淮南江浙振濟甲午罷諸路寄招軍兵三年就揀軍子弟補其闕夏四月甲辰詔自今盜發所在親臨帥守監司論罰平定有勞者議賞乙卯詔諸路提刑文武臣通置一員癸亥帝覽陸贄奏議諭講讀官曰今日之政恐有如德宗之弊者卿等條陳來上無有所隱五月癸酉以孫柄爲右千牛衛大將軍丙子詔輔臣擇監司郡守必先才行六月壬寅詔侍從臺諫各舉操脩端亮風力彊明可充監司者一二人甲寅蠲犒賞庫酒課二十二萬餘緡汀漳二州民爲沈師蹂躪者除其賦丁已給臨安府貧民棺瘞錢戊午謝廓然薨庚申太白晝見臨安府蝗詔守臣亟加焚瘞甲子太白晝見經天秋七月甲戌以江西常平義倉及椿管米四十萬石付諸司預備振糶辛巳出南庫錢三十萬緡付浙東提舉朱熹以備振糶壬辰以資政殿學士李彥穎參知政事詔發所儲和糶米百四十萬石補淳熙八年振濟之數于沿江屯駐諸州椿管八月己亥朔詔紹興民戶去歲已納夏稅應減者三十萬緡理爲今年之數庚子減皇后內命婦蔭補數立文武臣遇郊奏薦員限致仕遺表恩澤視舊法損三之一淮東浙西蝗壬子定諸州官捕蝗之罰乙卯復賞脩舉荒政監司守臣九月己巳朔罷諸路科買軍器物料三年庚午以王淮爲左丞相梁克

家爲右丞相丙子以子彤爲容州觀察使封安定郡王辛巳大享明堂大赦乙酉以錢引十萬緡賜瀘州備振糶辛卯封伯圭爲滎陽郡王以旱減蒸合渠昌州今年酒課癸巳太白晝見乙未禁蕃舶販易金銀蕃爲令十月戊戌朔遣王藺等使金賀正旦丙午罷軍器所招軍辛亥塞四川沿邊支徑戊午金遣完顏宗回等來賀會慶節甲子蠲諸路旱傷州軍淳熙七年八年通賦出縣官緡錢以償戶部十一月戊辰朔禁臣庶之家婦飾僭擬庚午振饑路饑乙酉進奏院火丙戌遣賈選等賀金主生辰戊子大風十二月己亥更二廣官賣鹽法復行客鈔仍出緡錢四十萬以備漕計之闕癸亥金遣字朮魯正等來賀明年正旦十年春正月丁丑以給事中施師點簽書樞密院事命州縣掘蝗甲申李彥穎罷乙酉命二廣提舉鹽事宮互措置鹽事丙戌以施師點兼權參知政事丁亥詔終身任宮觀人毋得奏子己丑詔罷廣南官鬻鹽法壬辰罷江東浙西寄招鎮江諸軍二年二月癸卯提舉德壽宮陳源有罪竄建寧府尋移郴州仍籍其家貲進納德壽宮三月戊辰李燾上續資治通鑑長編六百八十七卷辛未有司請造第七界會子辛巳免四川和糴三年癸未幸玉津園戊子詔四川類試自今十六人取一人己丑除詐稱災傷籍產法癸巳復銓試舊法罷試雜文夏四月丙申再蠲臨安府民丁身錢三年己亥命湖南廣西壅塞溪洞徑路五月丙寅增皇太子宮小學教授一員甲戌以潭州飛虎軍隸江陵都統司戊寅幸聚景園辛卯詔疏襄陽水

渠以渠傍地爲屯田尋詔民間侵耕者就給之廢舒州宿松監六月戊戌監察御史陳賈請禁僞學乙巳
罷昭州歲貢金己未詔諸路監司帥臣歲舉廉吏庚申嚴賊吏禁秋七月乙丑以不雨決繫囚丙寅幸明
慶寺禱雨甲戌以夏秋旱曠避殿減膳令侍從臺諫兩省卿監郎官館職各陳朝政闕失分命羣臣禱雨
于天地宗廟社稷山川左丞相王淮等以旱乞罷不許丁丑詔除災傷州縣淳熙八年欠稅甲申雨己丑
御殿復膳八月戊申以施師點參知政事兼同知樞密院事御史中丞黃洽參知政事庚戌以史浩爲太
保魏國公致仕庚申以左藏南庫隸戶部九月乙丑長溪寧德縣大水丙寅嚴盜賊解鹽法丁丑幸佑聖
觀壬午蠲諸州逋負內藏庫錢六十萬緡乙酉遣余端禮等使金賀正旦丁亥禁內郡行鐵錢冬十月乙
未詔兩浙義役從民便壬子金遣完顏方等來賀會慶節十一月壬戌朔日有食之乙丑降會子收兩淮
銅錢甲戌幸龍山大闔遂幸玉津園閏月壬寅詔却安南獻象丁巳遣陳居仁等賀金主生辰十二月丙
子朝德壽宮行太上皇后慶壽禮推恩如太上皇故事丁亥金遣完顏婆盧火等來賀明年正旦是歲福
漳台信吉州水京西金澧州南平荆門興國廣德軍江陵建康鎮江紹興寧國府旱

十一年春正月辛卯朔雨土辛丑安化蠻蒙光漸等犯宜州思立砦廣西兵馬鈐轄沙世堅出兵討之獲
光漸丙午詔江東西路諸監司義役差役從民便甲寅雨土二月甲申詔兩淮京西湖北萬弩手今在家

開習每州許歲上材武者一二人試授以官如四川義士之制三月辛卯詔刑部御史臺每季以仲月錄囚徒癸巳命利路三都統吳挺郭鈞彭杲密陳出師進取利害以備金人復金州管內安撫司甲午以上津潮陽旱蠲其稅辛丑罷秀州御馬院莊歸其侵地于民丁未禁淮民招溫處州戶口除職田官田八年通租庚戌詔御試策有及軍民利害者考官裏類以聞辛亥史浩入謝賜宴于內殿夏四月甲子以興元義勝軍移戍襄陽戊辰賜禮部進士衛溼以下三百九十四人及第出身癸未重班紹興申明刑統五月戊子朔蠲崇德等十六縣小民淳熙十年欠稅十四萬緡癸卯命刑部大理寺議減刺配法甲寅出緡錢三十萬犒給四川久戍將士乙卯太白晝見六月戊午朔詔諸道總領舉偏裨可將帥者庚申以周必大爲樞密使壬戌詔在內尙書侍郎兩省諫議大夫以上御史中丞學士待制在外守臣監司不限科舉年分各舉賢良方正能直言極諫一人己卯詔諸州歲實稻種備農民之闕秋七月癸卯蠲減浙東敗闕坊場酒課癸丑以浙西江東水禁諸州遏糴甲寅築黎州要衝城八月庚申遣章森使金賀正旦九月丁亥詔諸路添差官自今毋創置乙巳詔殿前軍子弟許權收刺一次甲寅再減四川酒課六十八萬餘緡冬十月甲子初命舉改官人犯贓者舉主降二官乙丑遣王信等賀金主生辰庚午禁諸州增收稅錢丙子金遣張大節等來賀會慶節盱眙軍言得金人牒以上京地寒來歲正旦生辰人使權止一年壬午詔諸

以忠義立廟者兩淮漕臣繕治之十一月壬寅禁福建民私有兵器癸卯助廣西諸州歲計十萬緡甲寅令峽州歲時存問處士郭雍十二月丁巳修湖南府城己卯詔戒監司州縣毋得於常賦外追取於民是歲江東浙西諸州水福建廣東吉贛州建昌軍興元府金洋西和州旱

十二年春正月己丑禁交趾鹽入省地壬辰四川制置使留正遣人誘青羌奴兒結殺之戊戌日中有黑子戊申賜任伯雨諡曰忠敏庚戌日中復有黑子二月辛酉雨雹乙亥罷諸軍額外制領將佐庚辰置黎州防邊義勇三月乙酉進孫擴爲安慶軍節度使封平陽郡王辛卯禁習渤海樂辛亥命侍從臺諫兩省總領管軍官各舉堪都副統制者一二人癸丑除稅場高等累賞法夏四月甲子幸聚景園戊辰班瀆熙寬恤詔令丙子諫言故遼大石林牙假道夏人以伐金密詔吳挺與留正議之己卯幸玉津園五月庚寅地震辛卯福州地震詔帥臣趙汝愚察守令擇兵官防盜賊六月乙卯立淮東疆勇軍效用効士法壬戌除諸軍逋欠營運錢丁丑詔浙東帥臣監司不以時上諸州臧否奪一官戊寅太白晝見秋七月丁酉太白晝見經天壬寅詔二廣試攝官如銓試例取其半甲辰以淮西屯田鹵莽總領軍帥漕臣守臣奪官有差八月癸亥詔太上皇壽八十令有司議慶壽禮乙丑詔戶部給舍臺諫詳議官民戶役法以闕九月甲申復二廣監司以下到罷酬賞法丙戌詔恤潮州台州被水之家庚寅遣王信等使金賀正旦丁丑詔諸

路總領軍帥漕臣守臣歲上屯田所收之數冬十月辛亥加上太上皇尊號曰光堯壽聖憲天體道性仁誠德經武緯文紹業興統明謨盛烈太上皇帝太上皇后曰聖壽齊明廣慈備德太上皇后甲寅蠲施黔州經制無額錢命侍從各舉宗室二三人癸亥詔諸路減否以三月終四川二廣以五月終來上十一月丁亥鄂州大火戊子雷壬辰遣章森等賀金主生辰辛丑合祀天地于圜丘大赦十二月庚戌朔帥羣臣奉上太上皇太上皇后冊寶于德壽宮推恩如紹興三十三年故事甲子以知福州趙汝愚爲四川制置使丙子金遣僕散守忠等來賀明年正旦

十三年春正月庚辰朔率羣臣詣德壽宮行慶壽禮大赦文武臣僚並理三年磨勘免貧民丁身錢之半爲一百一十餘萬緡內外諸軍犒賜共一百六十萬緡癸巳以史浩罷太傅陳俊卿爲少師嗣濮王士欽爲少保庚子以昭慶軍節度使士峴爲開府儀同三司二月甲寅詔強盜兩次以上雖爲從論死庚申詔舉歸正添差任滿人才藝堪從軍者三月丁酉詔職事官改官許在歲額八十員之外合提舉廣南東西鹽事司爲一甲辰幸玉津園夏四月辛亥詔吳挺結約夏人戊辰再蠲四川和糴軍糧三年辛未幸聚景園五月癸未日中有黑子甲申詔非泛補官及七色補官人非曾在朝侍從者品秩雖高毋得免役丙申賜沖晦處士郭雍號曰頤正先生仍遣官就問雍所欲言備錄來上秋七月壬辰詔內外諸軍主帥各

舉堪統制者二三人壬寅謚胡銓曰忠簡閏月丙午朔雨雹戊申以敷文閣學士留正簽書樞密院事己酉施師點乞免兼同知樞密院事許之己未五星皆伏八月乙亥朔日月五星聚于軫丙子以故相曾懷鬻奏補恩追落觀文殿大學士壬午新築江陵城成九月乙巳詔僞造會子凡經行用並處死是月遣李獻等使金賀正旦冬十月甲戌朔福州火甲午金遣完顏老等來賀會慶節十一月戊午詔四川制置司通知馬政量收水渠民包占荒田租庚申遣張叔椿等賀金主生辰甲子王淮等上仁宗英宗玉牒神宗哲宗徽宗欽宗四朝國史列傳皇帝會要丙寅梁克家罷爲觀文殿大學士醴泉觀使兼侍讀辛未裁定百司吏額十二月丙子思州田氏獻納所賈黔州民省地詔償其直辛巳減汀州鹽價歲萬緡甲午陳俊卿薨乙未振臨安府城內外貧乏老疾之民戊戌大理寺獄空己亥金遣耶律子元等來賀明年正旦辛丑再賜軍士雪寒錢是歲利州路饑江西諸州旱

十四年春正月癸亥出四川椿積米貸濟金洋州及關外四州饑民二月丁亥以周必大爲右丞相戊子以施師點知樞密院事三月甲子幸玉津園夏四月己卯置籍考諸路上供殿最以爲賞罰戊子賜禮部進士王容以下四百三十五人及第出身五月乙巳成都火己酉遣官措置汀州經界六月戊寅以久旱班畫龍祈雨法甲申幸太一宮明慶寺禱雨丁亥梁克家薨庚寅臨安府火辛卯太白晝見癸巳王淮等

以旱求罷不許詔衡州葺炎帝陵廟己亥減兩浙路囚罪一等釋杖以下秋七月辛丑罷戶部上供殿最
丙午詔羣臣陳時政闕失及當今急務丁未以旱罷汀州經界己酉詔監司條上州縣弊事民間疾苦辛
亥避殿減膳徹樂癸丑命檢正都司看詳羣臣封事有可行者以聞詔省部漕臣催理已蠲逋欠者令臺
諫覺察權減秀州經總制糴本錢半年丙辰命臨安府捕蝗募民輸米振濟除紹興新科下戶今年和市
布帛二萬八千匹辛酉江西湖南饑給度僧牒鬻以糴米備振糶戊辰兩命給會看詳監司所條弊事八
月辛未賜度牒一百道米四萬五千石備振紹興府饑甲戌御殿復膳癸未以留正參知政事兼同知樞
密院事丙戌復鑾路酬賞法九月癸卯太上皇不豫乙巳詣德壽宮問疾丙午遣萬鍾等使金賀正己巳
未詣德壽宮問疾乙丑罷增收水渠民田租丙寅除官軍私負冬十月辛未以太上皇不豫赦壬申詣德
壽宮問疾癸酉分遣羣臣禱于天地宗廟社稷甲戌以太上皇未御常膳自來日不視朝宰執奏事內殿
乙亥詣德壽宮侍疾太上皇崩于德壽殿遺詔太上皇后改稱皇太后奉皇太后旨以奉國軍承宣使甘
昇主管太上皇喪事丙子以韋璞等爲金告哀使戊寅以漿陽郡王伯圭爲攢宮總護使翰林學士洪邁
言大行皇帝廟號當稱祖詔有司集議以聞己卯詔尊皇太后辛巳詔曰大行太上皇帝奄棄至養朕當
衰服三年羣臣自遵易月之令可令有司討論儀制以聞甲申用禮官顏師魯等言大行太上皇帝上繼

徽宗正統廟號稱宗乙酉百官五上表請帝還內聽政丙戌詔俟過小祥勉從所請戊子帝衰絰御素輦還內以顏師魯等充金國遺留國信使己丑金遣田彥臯等來賀會慶節詔免入見却其書幣甲午詣德壽宮自是七日皆如之十一月戊朔詣德壽宮自是朔望皆如之己亥大行太上皇帝大祥自是帝以白布巾袍御延和殿詣德壽宮衰絰而杖如初詔皇太子惇參決庶務庚子皇太子三辭參決庶務不許辛丑詣德壽宮禱祭百官釋服甲辰羣臣三上表請御殿聽政詔俟過祔廟戊申遣胡晉臣等賀金主生辰辛亥冬至詣德壽宮甲寅西南方有赤氣隨日入乙卯雷戊午詔皇太子參決庶務于議事堂在內寺監在外守臣以下與宰執同除授詔乃奏己未詔三日一朝德壽宮十二月庚午大理寺獄空壬午東北方有赤氣隨日出癸巳金遣完顏崇安等來賀明年正旦見于垂拱殿之東楹系纏詔禮物毋入殿付之有司是歲兩浙江西淮西福建旱振之

十五年春正月丁酉朔詣德壽宮几筵行禮戊戌皇太子初決庶務于議事堂辛丑復置左右補闕拾遺乙巳詔免諸州軍會慶節進奉二年詔自今御內殿令皇太子侍立庚申施師點罷甲子以黃洽知樞密院事吏部尚書蕭燧參知政事二月丁亥金遣滿察克忠等來弔祭行禮于德壽殿次見帝于東楹之素幄癸巳遣京鎧等使金報謝三月庚子王淮等上大行太上皇諡曰聖神武文憲孝皇帝廟號高宗乙巳

上高宗諭冊寶于德壽殿又上懿節皇后改諡憲節冊寶于別廟本室丁未右丞相周必大攝太傅持節
導梓宮癸丑用洪邁議以呂頤浩趙鼎韓世忠張俊配饗高宗廟庭吏部侍郎章森乞用張浚岳飛祕書
少監楊萬里乞用浚皆不報丙寅權攢高宗于永思陵夏四月壬申帝親行奉迎虞主之禮自是七虞八
虞九虞卒哭奉辭皆如之乙亥詔洪邁楊萬里並予郡甲申用禮官尤袤請詔羣臣再集議配享臣僚丙
戌祔高宗神主于太廟詔曰朕比下令欲衰經三年羣臣屢請御殿易服故以布素視事內殿雖詔俟過
祔廟勉從所請然稽諸典禮心實未安行之終制乃爲近古宜體至意勿復有請己丑詔減臨安紹興府
囚罪一等釋杖以下民緣攢宮役者蠲其賦庚寅用御史冷世光言罷再議配享皇太后有旨車駕一月
四詣德壽宮如舊禮五月己亥王淮罷乙巳帝旣用薛叔似言罷王淮詔諭叔似等曰卿等官以拾遺補
闕爲名不任糾劾今所奏乃類彈擊甚非設官命名之意宜思自警丁巳詔修高宗實錄己未祈門縣大
水壬戌始御後殿詔歲出錢五萬六千餘緡減廣東十二州折納米價錢六月丁卯雨雹戊辰罷敕令所
己巳以伯圭爲少傅帶御器械夏執中爲奉國軍節度使癸酉以新江西提點刑獄朱熹爲兵部郎官熹
以疾未就職侍郎林栗劾熹慢命熹乞奉祠太常博士葉適論栗襲王淮鄭丙陳賈之說爲道學之目妄
廢正人詔熹仍赴江西熹力辭不赴庚寅熒惑犯太微秋七月戊戌上高宗廟樂曰大勳禘曰大德己未

出兵部侍郎林栗壬戌恩平郡王璩薨追封信王八月甲子朔日有食之九月庚子夜南方有赤黃氣覆大內辛丑大饗明堂以太祖太宗配大赦癸卯更試補醫官法己酉遣鄭僑等使金賀正旦甲寅上皇太后宮名慈福冬十月癸未金遣王克溫等來賀會慶節見于垂拱殿東楹甲申會慶節詔北使百官詣東上閤門拜表起居免入賀己丑再罷諸州科買軍器物料三年十一月庚子建煥章閣藏高宗御集遣何澹賀金主生辰甲辰詔百官輪對毋過三奏十二月丙寅追復龔茂良資政殿學士壬午命朱熹主管西太一宮兼崇政殿說書辭不至戊子金遣田彥阜等來賀明年正旦是歲江西北兩淮建寧府徽州水十六年春正月癸巳金主雍殂孫璟立甲午封孫柄爲嘉國公丙申黃洽罷己亥以周必大爲左丞相留正爲右丞相蕭燧兼權知樞密院事禮部尙書王藺參知政事刑部尙書葛郊同知樞密院事乙巳蕭燧罷丙午皇太后移御慈福宮戊申以昭慶軍承宣使郭師禹爲保大軍節度使辛亥罷淮西屯田是日帝始諭二府以旬日當內禪命周必大留身呈詔草丙辰罷拘催錢物所復二廣官賣鹽法己未更德壽宮爲重華宮諡李綱曰忠定二月辛酉朔日有食之壬戌下詔傳位皇太子是日皇太子卽皇帝位帝素服駕之重華宮辛未上尊號曰至尊壽皇聖帝皇后曰壽成皇后紹熙五年五月壬戌壽皇聖帝不豫六月戊戌崩于重華殿年六十有八十月丙辰諡曰哲文神武成孝皇帝廟號孝宗十一月乙卯權擯于

永阜陵十二月甲戌附于太廟慶元三年十一月辛丑加諡紹統同道冠德昭功哲文神武明聖成孝皇帝

贊曰高宗以公天下之心擇太祖之後而立之乃得孝宗之賢聰明英毅卓然爲南渡諸帝之稱首可謂難矣哉卽位之初銳志恢復符離邈遁失利重違高宗之命不輕出師又值金世宗之立金國平治無憂可乘然易表稱書改臣稱姪減去歲幣以定鄰好金人易宋之心至是亦寔異於前日矣故世宗每戒羣臣積錢穀謹邊備必曰吾恐宋人之和終不可恃蓋亦忌帝之將有爲也天厭南北之兵欲休民生故帝用兵之意弗遂而終焉然自古人君起自外藩入繼大統而能盡宮庭之孝未有若帝其間父子怡愉同享高壽亦無有及之者終喪三年又能却羣臣之請而力行之宋之廟號若仁宗之爲仁孝宗之爲孝其無愧焉其無愧焉

宋史卷三十五

宋史卷三十六

元 中 書 右 丞 相 總 裁 脫 脫 等 修

本紀第三十六

光宗

光宗循道憲仁明功茂德溫文順武聖哲慈孝皇帝諱惇孝宗第三子也母曰成穆皇后郭氏紹興十七年九月乙丑生于藩邸二十年賜名授右監門衛率府副率轉榮州刺史孝宗卽位拜鎮洮軍節度使開府儀同三司封恭王及莊文太子薨孝宗以帝英武類己欲立爲太子而以其非次遲之乾道六年七月太史奏木火合宿主册太子當有赦是時虞允文相因請蚤建儲儲孝宗曰朕久有此意事亦素定但恐儲位既正人性易驕卽自縱逸不勤於學浸有失德朕所以未建者更欲其練庶務通知古今庶無後悔爾七年正月丙子朔孝宗上兩宮尊號册寶禮成丞相允文復以請孝宗曰朕既立太子卽令親王出鎮外藩卿宜討論前代典禮允文尋以聞二月癸丑乃立帝爲皇太子慶王愷爲雄武保寧軍節度使判寧國府進封魏王三月丁酉受皇太子册四月甲子命判臨安府尋領尹事帝之爲恭王與講官商較前代時出意表講官自以爲不及逮尹臨安究心民政周知情僞孝宗數稱之且語丞相趙雄曰太子資

質甚美每遣人來問安朕必戒以留意問學淳熙十四年十月乙亥高宗崩十一月己亥百官大祥畢孝宗手詔皇太子可令參決庶務以內東門司爲議事堂十五年二月戊戌帝始赴議事堂自是間日與輔臣公裳繫鞋相見內外除擢自館職部刺史以上乃以聞九月乙巳又詔每遇朝殿令皇太子侍立十一月丞相周必大乞去孝宗諭曰朕比年病倦欲傳位太子卿須少留會陳康伯家以紹興傳位御劄來上十二月壬申孝宗遣中使密持賜必大因令討論典禮既又密以禪意諭參知政事留正十六年正月辛亥兩府奏事孝宗諭以倦勤欲禪位皇太子退就休養以畢高宗三年之制因令必大進呈詔草二月壬戌孝宗吉服御紫宸殿行內禪禮應奉官以次稱賀內侍固請帝坐帝固辭內侍扶掖至七八乃微坐復興次丞相率百僚稱賀禮畢樞密院官升殿奏事帝立聽班退孝宗反喪服御後殿帝侍立尋登輦同詣重華宮帝還內卽上尊號曰至尊壽皇聖皇后曰壽成皇后壽皇聖帝詔立帝元妃李氏爲皇后甲子帝率羣臣朝重華宮太赦百官進秩一級優賞諸軍蠲公私逋負及郡縣淳熙十四年以前稅役丙寅帝率羣臣詣重華宮上尊號冊寶以閣門舍人譙熙載姜特立並知閣門事庚午詔五日一朝重華宮辛未尊皇太后曰壽聖皇太后壬申詔內外臣僚陳時政闕失四方獻歌頌者勿受遺羅點等使金告卽位癸酉詔戒敕將帥賜前宰執從官詔訪以得失乙亥詔兩省官詳定內外封章其要切者以聞遺諸葛廷瑞

等使金弔祭丙子詔戒敕官吏己卯詔官吏贓罪顯著者重罰毋貸辛巳以生日爲重明節丁亥詔百官輪對己丑詔編壽皇聖政庚寅詔中書舍人羅點具可爲臺諫者點以葉適吳鎰孫逢吉張體仁馮震武鄭湜劉崇之沈清臣八人上之二月壬辰以周必大爲少保留正轉正奉大夫丙申遣沈揆等使金賀卽位詔侍從兩省臺諫各舉可任湖廣及四川總領者一人己亥子擴進封嘉王癸卯金遣王元德等來告哀戊申以壽皇却五日之朝詔自今月四朝重華宮甲寅以史浩爲太師伯圭爲少師少保士欽爲少傅昭慶軍節度使士峴爲少保戊午金遣張萬公等來致遺留物己未以左補闕薛叔似爲將作監右拾遺許及之爲軍器監拾遺補闕官自此罷詔東宮書籍並賜嘉王夏四月丙寅有事于太廟丁卯四川應起經總制錢存留三年代輸鹽酒重額癸酉姪柄進封許國公乙亥以兩浙犒賞酒庫隸諸州歲入六十五萬尋減三十萬戊寅金遣徒單鎰等來告卽位以權兵部侍郎何澹爲右諫議大夫丙戌有事于景靈宮五月甲午以王藺知樞密院事兼參知政事丙申周必大罷爲觀文殿大學士判潭州常德府辰沅靖州大水入其鄆丁酉詔丞相以下月一朝重華宮戊戌罷周必大判潭州之命許以舊官爲醴泉觀使戊申以和義郡夫人黃氏爲貴妃右丞相留正論知閤門事姜特立罷之閏月庚申朔詔內侍陳源許在外任便居住免郡縣漙熙十四年以前私負十五年以後輸息及本者亦蠲之壬戌以趙雄爲靈武軍節度使

開府儀同三司進封衛國公仍判江陵府庚午詔罷賣浙西常平官田癸酉詔季秋有事于明堂以高宗配丙子趙雄疾甚改判資州戊寅蠲郡縣第五等戶身丁錢及臨安第五等戶和買絹各一年仍出錢二十三萬緡振臨安貧民己卯階州大水入其郭壬午大理獄空乙酉御後殿慮囚六月庚寅鎮江大水入其郭癸卯詔自今臣僚奏請事涉改法者三省樞密院詳具以聞秋七月辛酉儒林郎倪恕等以封事可采遷官免文解有差戊辰遣謝深甫等賀金主生辰庚辰下詔恤刑八月甲午升蒸州爲重慶府丙申減兩浙月椿等錢歲二十五萬五千緡己亥王淮薨癸丑金遣溫迪罕肅等來賀卽位九月癸亥金遣完顏守真等來賀重明節減紹興和買絹歲額四萬四千餘匹乙丑戒執政侍從臺諫毋移書以薦舉請託南劍州火降其守臣一官仍令優加振濟戊辰詔侍從各舉公正彊敏之士嘗任守令及職事官材堪御史者一人甲戌詔監司帥守秩滿到闕薦所部廉吏一二人遣郭德麟等使金賀正旦冬十月庚子罷樞密院審察諸軍之制壬寅蠲楚州高郵盱眙軍民負常平米一萬四千餘石甲寅大閱十一月庚午詔改明年爲紹熙元年復置嘉王府翊善以祕書郎黃裳爲之乙亥詔陳源毋得輒入國門丁丑減江浙月椿錢額十六萬五千餘緡十二月壬子金遣裴滿餘慶等來賀明年正旦

紹熙元年春正月丙辰朔帝率羣臣詣重華宮奉上壽聖皇太后至尊壽皇聖帝壽成皇后册寶壬申再

兩臨安府民身丁錢三年壬午何澹請置紹熙會計錄詔何澹同戶部長貳檢正都司稽考財賦出入之數以聞二月丁酉雨雹辛亥殿中侍御史劉光祖言道學非程氏私言乞定是非別邪正從之三月丁卯詔秀王襲封置國廟班安僖王諱錄趙普後一人庚午以久雨釋杖以下囚夏四月乙酉詔兩淮措置流民己丑以伯圭爲太保嗣秀王丁未殿中侍御史劉光祖以論帶御器械吳端罷戊申賜禮部進士余復以下五百三十有七人及第出身五月乙卯趙雄坐所舉以賄敗降封益川郡公削食邑一千戶己未出吳端爲浙西馬步軍副總管丙寅脩楚州城丙子太白晝見六月丁亥遣卍密等賀金主生辰丙申以上供等錢償廣州放免身丁錢數甲午御後殿慮囚秋七月癸丑詔秀王諸孫並授南班甲寅以葛邲參知政事給事中胡晉臣簽書樞密院事乙卯以留正爲左丞相王藺樞密院使癸酉建秀王祠堂于行在八月辛卯立任子中銓人吏部簾試法己亥帝率羣臣上壽皇聖帝玉牒日厯于重華宮己酉詔造新厯九月丁巳金遣王脩等來賀重明節己未升劍州爲隆慶府辛酉雷庚午遣蘇山等使金賀正旦冬十月丁酉詔內外諸軍自今毋置額外制領以下官丙午詔內外軍帥各薦所部有將才者庚戌詔諭郡縣吏奉法愛民十一月甲寅安南入貢壬戌潼川轉運判官王漑擢節漕計代輸井戶重額錢十六萬緡詔獎之十二月辛巳朔贈左千牛衛大將軍挺爲保寧軍節度使壬午賜王倫諡曰節愍丙戌罷王藺樞密使戊

子以葛邲知樞密院事胡晉臣參知政事兼同知樞密院事癸卯詔歲減廣東官賣鹽丙午金遣把德固等來賀明年正旦戊申浦城盜張海作亂詔提點刑獄豐誼捕之

二年春正月庚戌朔命兩淮行義倉法壬子詔尊高宗爲萬世不祧之廟庚申修六合城辛酉金主母徒單氏歿戊寅雷電雨雹二月庚辰朔大雨雪壬午遣宋之瑞等使金弔祭癸未名新歷曰會元甲申福建安撫使趙汝愚等以盜發所部與守臣監司各降秩一等縣令追停乙酉詔以陰陽失時雷雪交作令侍從臺諫兩省卿監郎官館職各具時政闕失以聞出米五萬石賑京城貧民權罷修皇后家廟辛卯布衣余古上書極諫帝怒詔送筠州學聽讀丁未金遣完顏亶等來告哀三月丙辰詔監司郡守互送以臧論丁巳詔自今邊事令宰相與樞密院議仍同簽書丙寅詔福建提點刑獄陳公亮知漳州朱熹同措置漳泉汀三州經界丁卯增廣州摧鋒軍三百人癸酉建寧府雨雹大如桃李壞民居五千餘家温州大風雨雷電田苗桑果蕩盡丙子出右司諫鄧驛夏四月乙酉從壽皇聖帝壽成皇后幸聚景園丙申詔侍從兩省臺諫及在外侍從之臣各舉所知嘗任監司郡守可充郎官卿監及資歷未深可充諸職事官者各三人辛丑徽州火二日乃滅五月己酉朔福州水辛亥詔六院官許輪對仍入雜壓庚申詔侍從經筵翰苑官自今並不時宣對庶廣咨詢以補治道戊辰金州大火己巳潼川崇慶二府大安石泉淮安三軍興利

果合綿漢六州大水六月戊寅詔監司到任半年條上裕民事如郡守庚辰遣趙靡等賀金主生辰丁亥以伯圭判大宗正事癸巳詔宰臣執政自今不時內殿宣引奏事秋七月丁未朔詔故容州編管人高登追復元官仍贈承務郎己未出會子百萬緡收兩淮私鑄鐵錢乙丑復置太醫局己巳興州大水漂沒數千家八月戊寅何澹以本生繼母喪去官甲申寬兩浙權鐵之禁九月壬子金遣完顏亮等來賀重明節召知福州趙汝愚爲吏部尙書壬戌禁職田折變癸亥遣黃甲等使金賀正旦乙丑以久雨命大理三衙臨安府及兩浙決繫囚釋杖以下己巳詔侍從於嘗任卿監郎官內選堪斷刑長貳一二人以聞冬十月丙子朔詔罷經界丁丑築福州外城庚辰減百官大禮賜物三之一甲申復吳端帶御器械辛卯詔守令毋征斂病民庚子下詔撫諭四川被水州軍十一月戊申安定郡王子彤薨己巳冊加高宗徽號曰受命中興全功至德聖神文武昭仁憲孝皇帝辛未有事于太廟皇后李氏殺皇貴妃以暴卒聞壬申合祭天地于圜丘以太祖太宗配大風雨不成禮而罷帝旣聞貴妃薨又值此變震懼感疾罷稱賀肆赦不御樓壽皇聖帝及壽成皇后來視疾帝自是不視朝十二月庚辰築荆門軍城丁亥帝始對輔臣于內殿乙未增楚州戍兵一千五百人庚子復出會子百萬緡收兩淮鐵錢辛丑金遣完顏宗璧等來賀明年正旦壬寅資簡普榮四州及富順監旱甲辰詔慶遠軍承宣使內侍省都知楊皓懷姦兇恣刺面杖脊配吉州

和州防禦使內侍省押班黃邁私相朋附決杖編管撫州尋送皓撫州邁常州居住是歲建寧府汀州水階成西和鳳四州及淮東旱振之

三年春正月乙巳朔帝有疾不視朝庚戌蠲秀州上供米四萬四千石歲蠲四川鹽酒重額錢九十萬緡出度僧牒二百收淮東鐵錢丁巳命夔路轉運使通融漕計糶米以備凶荒壬戌罷文州民雜役詔輔臣代行恭謝之禮二月甲戌朔復以兩浙犒賞酒庫隸戶部丁酉申嚴錢銀過淮之禁閏月丙午禁郡縣新作寺觀甲寅以王藺爲端明殿學士四川安撫制置使藺辭不行壬戌詔州縣未斷之訟監司毋得移獄違者許執奏甲子成都府路轉運判官王漑以代民輸激賞等絹錢三十三萬緡詔進一官仍令再任詔賣郡縣沒官田屋及營田三月甲戌修天長縣城辛巳帝疾稍愈始御延和殿聽政以子濤爲安定郡王甲申罷雅州稅場五築峽州城乙酉留正乞去位不許庚寅宜州蠻寇邊改知鬱州沙世堅知宜州以討之辛卯復監司列薦法丁酉罷廣東增收鹽斤錢己亥詔技藝補授之人毋得奏補著爲令庚子監察御史郭德麟以察事失體出爲湖北提舉常平茶鹽夏四月癸卯補童子吳綱官甲寅振四川旱傷郡縣乙卯以戶部侍郎卮密爲煥章閣直學士四川安撫制置使戊午帝朝重華宮丁卯蠲臨安民元年二年逋賦五月帝有疾不視朝乙未命漢陽荆門軍復州行鐵錢己亥蠲四川水旱郡縣租賦仍以兩浙犒賞酒

庫隸諸州令戶部郎官提領歲以四十五萬緡爲額庚子晦常德府大水入其郛六月辛丑朔下詔戒飭風俗禁民奢侈與士爲文浮靡吏苟且飾僞者以權禮部尙書陳騭同知樞密院事甲辰遣錢之望等賀金主生辰丁未罷四川諸軍歲起西兵廢光州定城監壬子慮囚戊午以伯圭爲太師甲子增捕獲私鑄銅錢賞格丙寅以太尉郭師禹爲少保秋七月己巳刺沿邊盜萬人爲諸州禁軍壬申監文思院常良孫坐贓配海外益國公周必大坐繆舉良孫降榮陽郡公省廣西郡縣官甲戌台州水壬子瀘州騎射卒張信等作亂殺其帥臣張孝芳甲申軍士卞進張昌擊殺信增嘉王府講讀官二員壬辰修揚州城八月甲寅詔兩淮行鐵錢交子戊午總領西川財賦楊輔奏己蠲東西兩川畸零絹錢四十七萬緡激賞絹六萬六千匹詔獎之自是歲以爲例九月甲戌修安德府外城乙亥金遣僕散端等來賀重明節戊子遣鄭汝諧等使金賀正旦丙申勸兩淮民種桑冬十月壬寅修大禹陵廟丙午修潭州城辛亥帝詣重華宮進香庚申會慶節丞相率百官詣重華宮拜表稱賀十一月壬申振襄陽府被水貧民癸酉減蘄州歲鑄錢三十萬緡丙戌日南至丞相率百官詣重華宮拜表稱賀兵部尙書羅點給事中尤袤中書舍人黃裳皆上疏請帝朝重華宮吏部尙書趙汝愚亦因面對以請帝開納辛卯帝朝重華宮皇后繼至都人大悅癸巳蠲湖南北京西江西郡縣月椿經總制錢歲二十三萬餘緡戊戌詔李純乃皇后親姪可特除閤門宣贊

舍人十二月癸卯帝率羣臣上壽皇聖帝玉牒聖政會要于重華宮丙午蠲歸正人賦役三年辛亥以留
正爲少保乙丑金遣溫敦忠等來賀明年正旦是歲江東京西湖北水

四年春正月己巳朔帝朝重華宮辛卯蠲臨安府民身丁錢三年二月戊戌朔詔陳源特與在京宮觀丙
寅貸淮西民市牛錢出米七萬石振江陵饑民甲戌皇孫生三月丙子帝朝重華宮皇后從辛巳以萬鄴
爲右丞相胡晉臣知樞密院事陳騭參知政事趙汝愚同知樞密院事甲申監察御史汪義端奏汝愚執
政非祖宗故事請罷之疏三上不報辛卯義端罷癸巳帝從壽皇聖帝壽成皇后幸聚景園乙未修巢縣
城夏四月己酉罷括賣四川沿邊郡縣官田五月丙寅朔復永州義保己巳賜禮部進士陳亮以下三百
九十有六人及第出身進士李僑年五十四調成都司戶參軍自以祿不及養乞以一官回贈父母帝嘉
其志特詔以本官致仕父母皆與初品官封丙子淮西大水丙戌紹興大水召浙東總管姜特立丞相留
正以論特立不行乞罷相不報壬辰太尉利州安撫使吳挺卒四川制置使卍審承制以總領財賦楊輔
權安撫使命統制官李世廣權管其軍六月丙申朔留正出城待罪振江浙兩淮荆湖被水貧民戊戌祕
書省著作郎沈有開著作佐郎李唐卿祕書郎范黼彭龜年校書郎王爽正字蔡幼學顏械吳嶺項安世
上疏乞寢裏特立召命己亥遣許及之等賀金主生辰壬寅詔市淮馬充沿江諸軍戰騎戊申朔晉臣薨

己酉御後殿慮囚癸丑蠲臨安增民稅錢八萬餘緡甲寅太白晝見甲子雨雹秋七月乙丑朔太白晝見丙寅大雨雹己巳留正復論姜特立繳納出身以來文字待罪于范村丙子以不雨命諸路提刑審斷滯獄戊寅命臨安府及三衢決繫囚釋杖以下壬午以趙汝愚知樞密院事吏部尙書余端禮同知樞密院事陳源爲內侍省押班癸未禁邕州左右兩江販鬻生口乙酉敘州夷賊沒該落無等寇邊遣兵討平之八月丙申蠲紹興丁鹽茶租錢八萬二千餘緡丁酉罷郡縣賣沒官田癸丑詔三省議振恤郡縣水旱丁巳贈吳挺少保其子曦落階官起復濠州團練使帶御器械戊午振江東浙西淮西旱傷貧民九月己巳金遣董師中等來賀重明節庚午重明節百官上壽侍從兩省請帝朝重華宮不聽己卯上壽聖皇太后尊號曰壽聖隆慈備福皇太后壬午遣倪思等使金賀正旦甲申帝將朝重華宮皇后止帝中書舍人陳傅良引裾力諫不聽戊子著作郎沈有開祕書郎彭龜年禮部侍郎倪思等咸上疏請朝重華宮冬十月丙午內教三衙諸軍己酉朝獻于景靈宮夜地震庚戌朝獻于景靈宮夜地又震壬子祕書省官請朝重華宮疏三上不報甲寅雨土工部尙書趙彥逾等上疏重華宮乞會慶聖節勿降旨免朝壽皇曰朕自秋涼以來思與皇帝相見卿等奏疏已令進御前矣明日會慶節帝以疾不果朝丞相萬俟卨率百官賀于重華宮侍從上章居家待罪詔不許嘉王府翊善黃裳上疏請誅內侍楊舜卿臺諫張叔椿章穎上疏乞罷

黜戊午太學生汪安仁等二百一十八人上書請朝重華皆不報己未丞相以下奏事重華宮庚申帝將朝重華宮復以疾不果丞相以下上疏自劾請罷政彭龜年請逐陳源以謝天下皆不報十一月辛未日中有黑子壬申侍從兩省趙彥逾等十一人同班奏事癸酉太白晝見地生毛夜有赤雲白氣戊寅帝朝重華宮都人大悅遣右司郎官徐誼召留正于城外庚辰正始入朝復赴都堂視事命姜特立還故宮日中黑子滅癸未帝率羣臣奉上皇太后冊寶于慈福宮十二月戊戌帝朝重華宮壬寅右司諫章穎以地震請罷萬鄙疏十餘上不報甲辰命沿邊守臣三年爲任己酉詔監司帥守毋獨員薦士庚戌趙雄薨甲寅復四川鹽合同場舊法丁巳振江浙流民己未金遣完顏弼等來賀明年正旦

五年春正月癸亥朔帝御大慶殿受羣臣朝遂朝重華宮次詣慈福宮行慶壽禮推恩如淳熙十年故事癸酉壽皇聖帝不豫丙子大理獄空癸未葛邲罷丙戌寬紹興民租稅二月乙未趙汝愚余端禮以奏除西帥不行居家待罪戊戌荆鄂諸軍都統制張詔爲成州團練使興州諸軍都統制庚戌禁湖南江西過糴三月癸亥合利州東西爲一路己巳壽成皇后生辰免過宮上壽夏四月甲午帝幸玉津園皇后及後宮皆從乙未壽皇聖帝幸東園丙申史浩薨己亥朝獻于景靈宮壬寅以不雨命大理三衛臨安府及兩浙決繫囚釋杖以下癸卯雨土甲辰侍從入對請朝重華宮己酉太學生程肖說等以帝未朝移書大臣

事聞帝將以癸丑日朝至期丞相以下入宮門以俟日昃帝復以疾不果出侍從館學官上疏乞罷黜居
家待罪職事官請去待罪者百餘人詔不許丙辰侍講黃裳祕書少監孫逢吉等再上疏以請丁巳起居
郎兼樞中書舍人陳傅良請以親王執政或近上宗戚一人充重華宮使臺諫交章劾內侍陳源楊舜卿
林億年離間兩宮請罷逐之五月辛酉朔辰州獠賊寇邊甲子侍從入對未得見宰執詣重華宮問疾不
及引陳傅良繳上告敕出城待罪丁卯以壽皇聖帝疾棘命丞相以下分禱天地宗廟社稷戊辰丞相留
正等請帝待疾正引裾隨帝至福靈殿久之乃泣而出辛未丞相以下以所請不從求退帝命皆退於是
丞相以下遂出城待罪知閤門事韓侂胄請宣押入城許之追封史浩爲會稽郡王乙亥帝將朝重華宮
復不果戊寅以壽皇聖帝疾赦權刑部尙書京鏜入對請朝重華宮庚辰丞相以下詣重華宮問疾癸未
起居舍人彭龜年叩頭請奏事詔令上殿乃請朝重華宮甲申從官列奏以請嘉王府翊善黃裳講讀官
沈有開彭龜年奏乞令嘉王詣重華宮問疾許之王至重華宮壽皇爲之感動丙戌權戶部侍郎袁說友
入對請朝重華宮六月遣梁總等賀金主生辰戊戌夜壽皇聖帝崩遺詔改重華宮爲慈福宮建壽成皇
后殿於宮後以便定省以重華宮錢銀一百萬緡賜內外軍先是丞相留正知樞密院事趙汝愚參知政
事陳騤同知樞密院事余端禮聞壽皇聖帝大漸見帝于後殿力請帝朝重華宮皇子嘉王亦泣以請不

聽至是丞相正等聞壽皇聖帝崩乃率百官聽遺詔于重華宮己亥丞相以下上疏請詣重華成禮庚子遺薛叔似等使金告哀辛丑丞相率百官拜表稱就喪次成服壬寅壽皇大斂皇子嘉王復入奏事詔俟疾愈過宮行禮丞相以下請皇太后垂簾聽政不許請代行祭奠禮許之仍有旨皇帝有疾聽就內中成服夜白氣互天乙巳尊壽聖隆慈備福皇太后爲太皇太后壽成皇后爲皇太后己酉白氣互天乙卯遣林湜等使金致遺留物秋七月辛酉丞相留正稱疾乞罷政遂逃歸初正等屢請立嘉王爲皇太子帝許之正擬指以進奉御筆歷事歲久念欲退閑正得之大懼乃謀退焉甲子太皇太后以皇帝疾未能執喪命皇子嘉王卽皇帝位于重華宮之素幄尊皇帝爲太上皇帝皇后爲壽仁太上皇后移御泰安宮慶元元年十一月戊戌上尊號曰聖安壽仁太上皇帝六年八月庚寅太上皇帝不豫辛卯崩于壽康宮年五十有四十一月丙寅諡曰憲仁聖哲慈孝皇帝廟號光宗嘉泰三年十一月壬申加諡循道憲仁明功茂德溫文順武聖哲慈孝皇帝

贊曰光宗幼有令聞嚮用儒雅逮其卽位總權綱屏嬖幸薄賦緩刑見於紹熙初政宜若可取及夫宮闈妬悍內不能制驚憂致疾自是政治日昏孝養日怠而乾瀆之業衰焉